

**NATIONAL ASSEMBLY OF
SEYCHELLES**

Wednesday 13th July, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab, nou *staff* ki dan Lasanble e piblik ki pe swiv nou fidelman. Mersi pou partaz zot letan avek nou pou ankor enn fwa.

Dabor mon dwa Onorab Mondon en pti parol lo partisipasyon nou delegasyon dan *meeting Pan African Parliament*. Onorab Mondon.

HON TERENCE MONDON

Mersi Mr Speaker. Bonzour tou Manm koleg *MNAs* e tou dimoun ki pe ekout nou Lasanble. Mr Speaker, mersi pou donn mwan sa loportinite pou dir 2 mo lo nou partisipasyon lo nou sesyon parlman Lafrik. Parlman *Pan African* ti re pran son aktivite Parlmanter dan en latmosfer tre kalm apre en sesyon ordiner ki ti ganny fer *Midrand*, Sid Afrik le 27 Zen ziska le 2 Zilyet 2022.

Nou Lasanble Nasyonal ti ganny reprezante par Onorab Sylvanne Lemiel, Onorab Conrad Gabriel lo kote *US*. Onorab Wavek Woodcock, Onorab Deshiela Bastienne e mwan menm Terence Mondon sorti lo kote *LDS*.

Lazanda prensipal Mr Speaker, sa sesyon travay ti eleksyon nouvo biro Parlman Lafrik e lezot striktir ki form parti sa Lenstitisyon ki enkli 11 konmisyon permanan, 5 *Caucus* rezyonal e en *Caucus* Madanm e *Caucus* Lazenés.

Mr Speaker, i fer premye fwa ki Sesel i ganny swazir atraver en eleksyon pou okip 2 pozisyon *leadership* dan striktir Parlman Lafrik. Alors i en plezir pou enform sa Lasanble ki mon'n ganny elekte koman *Chairperson Caucus* rezyon Les Lafrik e mon *Vice-Chair* i sorti *Uganda* e raporter sorti *Djibouti*.

Sesel i pe osi okip en lot pozisyon enportan dan striktir Parlman Lafrik atraver Onorab Wavel Woodcock ki'n ganny selekte san okenn *challenge* koman katriyenm Vis-Prezidan *Youth Caucus*.

Les Lafrik ki reprezentant en kenzyenm pei, i osi enkli Komor, Moris ek Madagascar sorti dan Losean Endyen.

Parmi bann fonksyon prensipal en *Caucus* rezyonal se pou reprezant nou rezyon Les Lafrik o nivo biro Parlman, fasilite partisipasyon bann manm dan lezot aktivite Parlmanter o nivo nou kontinan, perform tou fonksyon ki ganny demande par nou lenstitisyon Parlman Lafrik atraver en rezolisyon.

Mr Speaker, mon pou dir ki sa sesyon travay ki nou'n partisip ladan ti enn ki tre diferan, konpare avek bann sesyon presedan. Sesyon in deroul dan en latmosfer byen *calm* e pozitiv. Pou mwan sa in mark en nouvo depar pou Parlman Lafrik e en nouvo loportinite pou nou fer sa ki esansyel pou nou kontinan.

Fas a tout sort defi, pep Afriken, i bezwen en Parlman ki pou sed tou pouvwar lezislatif. Nou annan konfyans ki nou Lasanble i ava fer son bout dan sa demars.

Fodre osi note ki Parlman Lafrik i annan en rol fondamantal pou ede akseler adopsyon e lenplantasyon Polisi e desizyon Linyon Afriken, anver laspirasyon azanda 2063. Lo mon kote mon'n aksepte sa *challenge* avek tou imilite e i touzour en loner pou deservi mon pei e nou Lasanble

Nasyonal avek lentegrite. Mersi Mr Speaker.

(APPLAUSE)

MR SPEAKER

Mersi Onorab Mondon. Mersi nou bann Manm ki'n dan sa misyon. E felisitasyon e kouraz bann Manm ki'n ganny elekte dan bann pozisyon dan bann striktir.

Bon lo biznes ozordi nou annan Mosyon, e nou annan premye Mosyon Onorab Waven William. Onorab mon a envit ou pou met ou Mosyon silvouple.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, Mosyon i lir *comme swivan*;-

Swivan bann defayans, lenzistis e diferans dan *package* saler travayer etranze e Seselwa dan pei, sa Lasanble i demann Gouvernman pou koriz sa bann lenzistis dan en legzersis revizyon saler e pou ankouraz Sekter Prive pou form parti sa revizyon.

Mr Speaker ...

MR SPEAKER

Onorab mon a les ou Mosyon ganny segonde avan, apre ou

ava adrese. Mon a demann segonnman. Onorab Romain.

HON GEORGES ROMAIN

Mersi Mr Speaker. Bonzour tou Manm koleg Onorab. Mr Speaker, mon segonn Mosyon, apre mon ti ava kontan fer en lentervansyon lo Mosyon Mr Speaker. Mersi.

MR SPEAKER

Mersi. Onorab, mon a met ou lo lalis. Nou a demann Onorab William pou fer son ladres.

HON WAVEN WILLIAM

Mersi Mr Speaker. Mr Speaker, ankor enn fwa mon pa pou mank sa lokasyon pou remersi nou Bondye tou pwisan pou son faver e lagras lo Sesel, pou son mizerikord e konpasyon. Remersi li dan sa moman difisil pou provizyon ki i kontinyelman fer ki Gouvernman in kapab pran mezir pou soulaz kous popilasyon ki pe ganny bokou afekte.

Mr Speaker, mon sezi lokasyon osi pou remersi e felisit tou travayer Seselwa e etranze ki pe solider dan sa moman dir, pou zot kontribisyon senser pou kree larises dan Sesel.

Mon osi remersye Bondye ki pe gid nou bann dirizan ki'n

reste konsistan, brav, responsab, pridan e saz dan zot fason pran desizyon e atraver zot bann aksyon.

Permet mwan osi pou felisit delegasyon Lasanble Nasyonal, ki'n retournen ek rezilta pozitiv pou pran serten rol prominan dan serten Komite *Pan African Parliament*.

Mr Speaker, i enportan ki boner menm mon met keksoz dan konteks direksyon ki Mosyon pe vize. Byen koze i fer byen konpran e evit konplikasyon. Mosyon i osi kre lokasyon atraver novo zefor, pou transform servis siporte par standar dan performans, ki ofisyelman demare dan servis piblik 2023. Ki yer atraver kestyon Onorab Aglae e Onorab Deputy Speaker, Vis-Prezidan e *Chief Secretary* ti donn nou en avan gou.

Mosyon in en size ki'n ganny mansyonnen dan plizyer deba Lasanble oparavan. In osi size konsern plizyer kous travayer Seselwa, swa dan sekter piblik ouswa prive kot travayer Seselwa ki annan leksperyans, sertifika konsekans dan serten pozisyon ki zot okipe, zot santi ki pou sa kantite letan ki zot in deservi dan serten pos, zot pa pe ganny rekonnet pou promosyon e

logmantasyon saler pou plizyer rezon.

Zot dir ki zot in kaye e napa provizyon ouswa lentere dan sa ki ansarz, pou regard dan zot konsern. De lot kote, ou vwar etranze ki ganny anploye kot zot bann diferan kondisyon, i fer ki zot *package* saler lafen dimwan i bokou pli o ki pou sa travayer Seselwa.

Mr Speaker, Sesel in fer bokou progre dan devlopman entegral imen konpare avek lepok avan miltiparti.

Ozordi nou annan bokou zenn profesyonnel kalifye, pou plizyer pozisyon, swa dan sektor piblik ek prive. En gran mazorite paran ozordi pe met lanfaz ver asire ki zot zanzan o nivo skoler zot sorti ek pli meyer rezilta posibil. I evidan atraver pei Mr Speaker, sependan mon rekonnèt ki lekòl Leta i annan bokou travay pou *bridge the gap* ant nivo rezilta lekòl prive.

Mr Speaker, sa i en lot deba dan li menm. Mr Speaker, Mosyon pe osi a diferan nivo pe demann paran, pe demann zanzan, Gouvernman koman fasilitater ek sektor prive pou reflesir lo zot bann diferan pozisyon kwa ki kapab ganny fer an plis lo merit, e kot i posibil, sirtou dan sa konzonktir devlopman ki Sesel in arive.

Ki size sa Mosyon a ganny son merit, ki dan sa demars e prosesis transformasyon, konpran ava pli enkliziv ver benefis pozitiv Seselwa e kreasyon larises.

Mr Speaker, dan konteks sa Mosyon an realite i se ki, atraver listwar devlopman mondyal travayer etranze pou reste en konponan devlopman enportan devlopman en nenport pei. Sesel pa en leksepsyon. San zot prezans Seselwa i rekonnèt ki nou devlopman entegral, nivo e progre pa ti pou le ka ozordi.

Gouvernman koman sektor prive, sirtou pou sektor prive ki moter lekonomi, sa swa e sa konponan travay etranze pou grandi pou progrese e dan en dele letan ki rantab i tre enportan Mr Speaker. Enportan pou gard fleksibilite, pou zot reste efisyan dan kreasyon larises atraver garanti serten nivo e degre servis e komodite.

Mr Speaker, sa term *brain drain* dan servis piblik, i pou reste en rutin, si travayer Seselwa kalifye ouswa eksperyanse, pa ganny byen peye ouswa valorize dan sektor piblik e prive. An realite i en fenomenn mondyal, ki en nenport Gouvernman i kapab fer koman fasilitater, se koriz

serten bann lenzistis pou anpes sa arive Mr Speaker.

Vi ki devlopman pei i en proze tou zabitan, en target Gouvernman e sekter prive, Mosyon pe demande ki dan sa legzersis revizyon ki sekter prive i ganny ankouraze pou partisipe dan lentera soutenabilite devlopman Sesel dan tou sekter.

I evidan ki atraver letan apre lendependans, dan tranzisyon sorti dan faz kolonyal e kontrol, serten kous Sesel ki pa ti edike ti per pou pran linisyativ e sezi loportinite. 44an apre koudeta, Seselwa in viv en lot faz kot Seselwa in *put up* avek nenport kwa. Kontante ek sa ki i gannyen. Per pou koze, per pou montre ki i vwar keksoz diferaman ek sa ki Lotorite pe dir. Ti bezwen soumet e aksepte.

Mr Speaker, en gran mazorite fanmir Seselwa dan zot devlopman zot fanmir pa'n konsyan ki se travay dir zot zanfan lekol ki pou fer zot lib e frot zepol ek bann etranze sorti dan bann pei devlope. Serten Seselwa zot in vwar zot dan zot prop pei kot koman en sitwayen dezyenm *class*, akoz sete etranze ki ti pe okip pozisyon dan plizyer *post* sirtou dan

kontab parmi lezot pozisyon ankor.

Nou'n vwar serten etranze ki'n profit lo linyorans Seselwa pou vol epi disparet Mr Speaker. Nou konn plizyer legzanp ki'n arive dan lepase. Nou'n osi vwar serten Dirizan ki'n eksplwat linyorans Seselwa pou fer enport kwa e pa vreman diriz Seselwa lo nivo akademik pou *think outside the box*; ankouraz linisyativ e promot lekselans dan sistenm skoler.

Ek legzizans miltiparti nou ti eksperyans serten degre lepanouisman dan devlopman zeneral. Plizyer Seselwa ti pran linisyativ a laporte pou progrese. Anmezir ki Leta i al dan proses les Sekter Prive pran son vre plas koman moter lekonomi e Gouvernman pran son vre plas koman fasilitater.

Mr Speaker, bann rezilta skoler ozordi pe montre nou bann rezilta legren ki nou'n senmen koman en Nasyon, ki pa'n met lenportans dan devlopman entegral resours imen ek benzwen nasyonal ver lekselans.

Mon konpran dinamiz devlopman pei. Mon konpran ki bann defi sekter prive pe fer fas avek dan plizyer sekter pou reste soutenab koman moter lekonomi. Sirtou defi lo kalite, lakantite e profesyonnalizm

dan zot diferan kategori pozisyon lanplwa. Mon rekonnèt sa nesesite pou enport travayer etranze pou enfliyans devlopman.

Mon rekonnèt ki dan plizyer sektè, si ti napa travayer etranze, nou pa ti pou lo sa nivo ki nou ete. Sesel parey lezot pei, pou kontinyen bezwen plis travay etranze dan son parkour prosesis devlopman nasyonal, anmezir lemond i progrese dan son devlopman.

De lot kote, mon osi konpran serten manipilasyon pou anpese ki sa Seselwa dan serten Sektè zot ganny peze pou pa ganny promosyon, ouswa logmantasyon saler ki apropiye pou zot kontribisyon dan zot travay.

Chief Secretary Mohideen ki en madanm determinen atraver stratezi e plan travay, ki i pe promote pou vin anmars lannen prosenn. Parey li, mon annan bokou lespwar e rezon se ki en direksyon ki servis piblik i bezwen pran e i pou benefisye pou pei.

Mon okouran serten bann Seselwa dan serten pozisyon *human resource*, ki osi ede pou pez son frer e ser Seselwa pou pa progrese, akòz li in ganny son *deal* pou fer sir ki i akonplir misyon ki Sef in dir li fer. Pou

fer antre travayer etranze olye ed son prop frer e ser Seselwa dan serten ka, Mr Speaker.

Mr Speaker, Mosyon pe demande ki dan sa prosesis transformasyon zeneral dan pei, ki sa bann lenzistis i ganny idantifye e kot i posib e merite zot ganny korize. Annou enn fwa pour tou, get dan *welfare* nou Seselwa kot zot merite.

Mon pou dir ki sa defayans ozordi i plis dan sektè prive atraver bann diferan sektè lekonomi tel parey lapès, tourizm, lagrikiltir, konstriksyon, komers e dan aktivite donn valer azoute.

Vites devlopman i egzize ki Gouvernman e atraver bann diferan Lakor Bilateral, Rezyonal e Miltilateral ki Sesel in form parti, sa demars mondyal pou entegre zefor devlopman, marse lokal lanplwa in bezwen ouver pou partisipasyon travayer etranze.

Sirtou kot lenvestisman direk etranze ki devlop dan kad en *time frame* pou komanse e fini pou biznes e kreasyon larises.

Devlopman imen Sesel in osi pran en lelan ki ozordi nou annan serten kous profesyonnel Seselwa, ki saler ki leta pe ofer i pa atiran baze

lo sa ki zot kalifikasyon i demande.

Mr Speaker, sa i evidan dan diferan Departman e ou tann bokou nou bann frer e ser Seselwa profesyonnel pe koz lo la. I annan osi travayer Seselwa ki pa'n al Liniversite dan plizyer sektor ki son leksperyans e performans pe travay parye bann profesyonnel. Me akoz zot napa sertifika, zot pe ganny mal rekonpanse Mr Speaker, osi.

Atraver sa Mosyon mon pe osi demande ki dan revizyon saler, zot form parti sa eleman koreksyon akoz zot bann levidans reel pou konparezon.

La mon demann sa bann travayer dan sa kategori pou kontinyen ek zot kanpanya pou lazistis, enkli bann profesyonnel ki merite ganny plis valorize.

La ki deba lo sa size i piblik, bann ki anvi anvoy nenport Manm bann legzanp - pou montre ki wi nou pe solider pou ankouraz bann ki dan pozisyon pran desizyon pou ekoute, evalye e lo merit e *fairness* annou koriz zot kot i posib.

Mr Speaker, i pa mon lentansyon ditou vin enpoz sa Mosyon dan en fason diktater lo sektor prive, pou diriz zot ladministrasyon resours imen. Mosyon pe demande ki

Gouvernman ki'n deza komans en legzersis ki dan konteks sa Mosyon, i enkli sektor prive ki anploy ozordi anviron 62 poursan lafors travayer koman moter lekonomi.

Mr Speaker, lafors travayer Sesel sif ofisyel dezyenm kar lannen dan tou sektor i reprezant 52mil 433 travayer dan sektor prive e piblik. Poursantaz lanplwa in ogmante par 5.1poursan. Tandis *average* reveni in desann par 1.1poursan konpar ek menm kar lannen 2021.

Sa ki remarkab se ki Lendistri Tourizm in eksperyans en logmantasyon 14.3 poursan. Bann madanm i for pari 64.3poursan dan sektor piblik, tandis ki dan parastatal zonm i form 57.1 poursan travayer. Travayer etranze i form parti 5 poursan travayer dan sektor piblik e 14.3 poursan dan parastatal. Zot sirtou dan sektor ladministrasyon e servis sipor. Dan Gouvernman zot dan Sektor Ledikasyon e Lasante ek travay Sosyal.

Sektor prive i anploy 65 poursan lafors travayer e sektor piblik 21poursan. Tandis ki parastatal i anploy 15poursan, ki reprezant 34mil 81 travayer e preski lanmwatye i etranze Mr Speaker. Ou

kapab konpran Mr Speaker, si pa in ler pou vreman revwar si sa sif i korek, pou nou kapab koriz serten sa bann lenzistis.

Mr Speaker, sa ki konn lepanouisman dan sekter prive, nou konnen dan ki bann sou seksyon kot etranze pe ganny anploye, pou plizyer rezon pou sa lakonpanyen e lantrepriz bouze.

Nou'n ganny dir ki 17mil laplikasyon pou permi travay in vin devan pou fer vini travayer etranze. Ladan 15 mil in ganny aprouve.

Mr Speaker, Mosyon pe demande san ki nou limit lepanouisman sekter prive ki moter lekonomi, Mosyon pe demande ki Gouvernman i koriz lenzistis e diferan dan *package* saler Seselwa ki merite. Pou motiv travayer Seselwa pou reste solider e patriyotik. Sa i a osi ankouraz e motiv zanfan lekol, pou aprann e pran bann travay e pozisyon kot olye anmenn plis etranze, se nou Seselwa ki a benefisyè.

Mr Speaker, sa osi ava redwir koripsyon Mr Speaker, aköz letan saler osi i ba i annan tandans e tantasyon pou bann lezot aktivite ki pa dezirab pran plas, dan sekter piblik avek prive.

Mr Speaker, pou konklir mon pe propoz *comme* swivan;

ki Gouvernman i a lekout deliberasyon Lasanble Nasyonal. Ki zot tenir kont e rezondet sa Mosyon parey zot in ekout nou pou pran bann mezir pou soulaz bann ki pe pli ganny afekte avek kou lavi. Ki Gouvernman e sekter prive dan sa partenarya Gouvernman ek sekter prive ki mon konnen zot pou form parti sa dyalog lo sa siz e sa Mosyon.

Mon konnen ki plizyer antreprenner zot ti a swete anploy otan travayer Seselwa olye fer vini etranze. Pou plizyer rezon, pou reste soutenab zot bezwen pran serten desizyon pou sirviv.

Mr Speaker, mon osi demande ki Departman konsernen pou gidans karyer zot ansanm ek sekter prive, zot revwar stratezi ver asir mendev Seselwa kalifye byen formen pou pran serten sa bann pozisyon ki etranze pe okipe.

Mr Speaker, ki Minister Ledisyon ki pe revwar son stratezi dan laprantisaz, zot ekip bann ansenyan pou transfer konesans akademik pli byen. Pou annan en misyon, pou met an plas sistenm motivasyon pou ansyen e zanfan pou zot bouz ver nivo ekselans.

Mr Speaker, ki paran zot swivre byen devlopman pei,

pou motiv zot zanfan pou aprann e travay dir lekòl e sivre li, pou asire ki son priyorite i son letid me pa dan lot preokipasyon ki pou gat son lavenir pou en meyer lavi e lanplwa demen.

Mr Speaker, finalman mesaz pou bann zanfan, servi zot letan skoler byen o maksimonm. Demann kestyon si zot pa kler lekòl, ekoute e met target pou en meyer rezilta tou le term. Si zot fer sa, zot pou vin sa ki zot anvi. *The sky is the never the limit*, ki lontan zot ti fer nou krwar. Regard oter zot, premye dan zot fanmir, kot zot vwazen, dan kominote e dan sosyete. Idantifye lekel ki'n progrese dan lavi, ki fason in fer li pou fer li ariv kot in arive ozordi. E fer li dan en fason onnet me pa atraver bann aksyon aktivite ilegal.

Dan sa direksyon Mr Speaker, se zot zefor skoler, rezilta ava ed pei ekonomiz larzan. Ed Gouvernman e sekte prive pou osi koriz sa bann lenzistis ek diferans dan kad saler pou travayer Seselwa.

Mazorite zanfan Seselwa ava en nivo pou donn konpetisyon travayer etranze. Mr Speaker, avek sa de mo mon remerci tou Manm ki'n ekoute e mon demann tou bann Manm - aköz mon konnen koman

Manm Parlman, a plizyer lokazyon nou'n rankontre en profesyonnel, en travayer a tou nivo. Kot serten sa bann diskisyon e sa bann dyalog in deroule. Alors mon enplor zot pou donn sipor sa Mosyon. Mersi.

MR SPEAKER

Mersi. Onorab Georges Romain.

HON GEORGES ROMAIN

Mersi Mr Speaker. Ankor enn fwa bonzour tou koleg Onorab e tou dimoun ki a lekout. Mr Speaker, mon pou donn mon sipor pou sa Mosyon anmennen par Onorab William, aköz i vremen enportan pou en tel revi ganny fer lo bann reminerasyon ki travayer dan Sesel, an zeneral, i gannyen konpare avek bann etranze ki pe fer preski menm louvraz ek zot.

Parey loter Mosyon in fer resorti, i annan bokou lenstans kot nou vwar en gran diferans dan saler en Seselwa avek en etranze, ki pe fer menm louvraz e menm parfwa annan menm kalifikasyon. Sa i pa akseptab Mr Speaker, in plis ki ler ki nou regard reminerasyon nou bann koleg vizavi bann etranze dan menm louvraz, oubyen dan menm domenn.

Mr Speaker, nou konpran ki Sesel koman en pti pei, i limite an term resours imen dan serten domenn. E i normal alors pou nou al rod etranze pou kapab fer sa bann travay, kot napa Seselwa ki kalifye pou fer. Me par kont Mr Speaker, i annan bokou lenstans e la mon fer referans dan Sekter Tourizm. Par egzanp dan lotel kot i annan Seselwa ki'n travay bokou letan dan sa sekter e akimil bokou leksperyans.

Me an retour zot vwar etranze ki travay akote zot pe ganny en *package* ki bokou pli bon ki pou zot. E sa Mr Speaker, i en lazistis total anver nou bann frer e ser Seselwa.

Nou konpran ki sa anlwaye i bezwen donn sa etranze landrwa reste, transpor ek serten benefis. Me lo kote saler nou pa espekte vwar sa gran diferans pou deservi menm responsabilite. Sa i dekouraz bokou nou Seselwa pou fer sa travay, e i osi en fakter ki anpes en endividi pou reste dan sa metye pou li kapab fer en karyer a longer ditan. E la se Sesel ki perdi.

Mr Speaker, i annan ki di Seselwa napa leksperyans. Me nou vwar kot bokou zenn in al etidye pou travay dan sa Sekter Tourizm e apre menm i annan ki'n al fer letid pli avanse kot

menm zot in atase avek bann gran lasenn lotel 5 zetwal dan Lerop.

Mr Speaker, sa i enkli bann etidyan lakademi tourism ki'n al Shannon College, ki'n ganny ekspoze ek sa kalite leksperyans. Me ler zot retournen e travay pou en pe letan Sesel, zot saler pa konparab, avek pou en etranze ki pe fer menm louvraz malgre bann sakrifis ki zot in fer pou ganny sa kalifikasyon.

Mr Speaker, zis mazin dezapwentman letan nou frer e ser Seselwa ki'n kit nou fanmir deryer, al etidye, me apre rekonpans i totalman diferan ek lekspektasyon oubyen sa ki zot merite.

Nou konpran leksperyans i zwe en rol mazer dan lapey en travayer. Ee wi se etranz ozordi i kapab pli eksperyanse ki sa Seselwa. Me avek letan sa Seselwa osi merit kapab monte e pran bann pozisyon pli o ek en pli bon saler. Annou pa bliye Mr Speaker, ki i osi annan lenstans kot nou Seselwa, menm si i pli eksperyanse ki sa etranze i vwar li dan en sityasyon ki li ki pe *train* sa etranze pou konpran sa travay. Selman sa etranze pe ganny plis ki li.

Mr Speaker, sa disparite i vremen dekourazan pou nou

profesyonnel Seselwa, ki santi zot valer pa ganny rekonnèt parey en etranze i ganny gete. Sa sanmenm rezon ki enn ler nou vwar nou bann Seselwa kalifye ki dekouraze, e deside pou al aletranze pou rod meyer kondisyon.

Mr Speaker, nou pti pei Sesel in prodwi bokou travayer profesyonnel tel ki pilot, ki ozordi nou fyer pou vwar nou bann Seselwa pe *fly* bann gran laliny aryèn, tel ki parey *Emirates*, Qatar ek lezot ankor.

Nou osi annan Ners Seselwa Mr Speaker, ki pe travay dan plizyer pei o monn, tel ki parey Langleter, kot zot pe tenir bann pozisyon ase o. Sa i montre ou Mr Speaker, ki nou Seselwa i annan abilite, pou mont lo en nivo vremen o e alors annou pa *underestimate* nou ser, frer Seselwa.

Mr Speaker, mon krwar ki tou mon koleg isi i ava agree ek mwan ki ler nou perdi bann travayer kalifye, pa anmenn okenn benefis pou nou pti pei sesel. E la mon kontan tande ki sa nouvo *Board* Lakademi Tourizm atraver zot *chairman*, i pe *echo* menm santiman ki sa Mosyon pe anmenn ozordi, ki montre ki i annan en bezwen pou rezourd sa problem ozordi.

Se sa rezon Mr Speaker, kis a Mosyon devan nou ozordi, pe demann Gouvernman e egalman sekter prive pou re get dan bann kondisyon ki en etranze i benefisye, konpare avek en Seselwa.

Sa Mosyon i anvi retir sa disparite ki egziste ozordi e re dres sa lenzistis. Kot a lafen nou ava vwar nou bann profesyonnel pe benefisye. Akoz letan nou pe rezourd sa lenzistis, nou pa pe ed zis sa endividi. Me nou pe ed osi en manman oubyen en papa ki pe okip en lakour. Se sa nou vizyon, pou amelyor kondisyon lavi nou bann Seselwa.

Mr Speaker, zis mazine ki si nou Seselwa ki ti pe ganny pli byen rekonnèt akoz zot pe travay dir lo en standar o, bann anplwaye ti pou depans mwens akoz zot ti kapab fer bokou *savings* lo *GOP* par egzanp, tiket avyon, akomodasyon eksetera.

I nepli ler pou met tou nou travayer Seselwa dan menm pannyen e *label* nou koman bann parese. Seselwa i en Nasyon fyer, travayan e nou devret ankouraz bann ki touzour devoue pou avans pli devan. Mon krwar si sa Mosyon i ganny enplimante, i pou ed amelyor kapasite nou resours imen e lokaliz plis pos etranze ki definitivman pou zwe en gran

rol dan nou lekonomi an zeneral.

Mr Speaker avan terminen, mon ti a kontan zis fer resorti, ki nou bezwen serten nonm travayer etranze dan nou pei e Seselwa i apresye zot kontribisyon bokou. Me selman plis lanfaz i merit ganny mete lo redwir disparite ant kondisyon travay en etranze konpare ek Seselwa, pou osi asire ki nou frer e ser Seselwa i ganny peye zot valer pou zot zefor dan travay.

Mr Speaker, la mon oule lans en lapel direk avek tou bann lorganizasyon travay ki anploy etranze, e kot i annan Seselwa ki pe travay a kote zot dan bann pozisyon kle, annou met konfyans dan nou Seselwa e donn zot sa sans pou prouv zot lekor. E mon oule osi felisit tou bann lorganizasyon travay ki pe valoriz nou Seselwa. Parey nou dir, mon tir mon sapo avek zot. Kontinyen ek sa bon travay.

Mr Speaker, mon pe donn mon sipor total anver sa Mosyon. Mersi bokou, Mr Speaker.

(APPLAUSE)

MR SPEAKER

Mersi Onorab Romain e prosen entervenans, mon ava apel Onorab Michel Roucou.

HON MICHEL ROUCOU

Mersi Mr Speaker. Mon dir bonzour a tous, tou mon bann koleg e bonzour spesyal i pou zabitan Mont Fleuri, espesyalman bann travayer Seselwa.

Mr Speaker, sa Mosyon ki ozordi i anmennen par Onorab William, kot i pe demande ki Gouvernman dan revizyon saler ki pe ganny fer, ki osi anmennen en lazistis an bann legzersis pou vwar en pti pe saler bann Seselwa konpare avek bann etranze.

Mr Speaker, mon'n ganny sans pou mwan travay dan plizyer Departman osi prive osi tou, ler mon ti komans mon premye travay apre ki mon ti fini *SIT* sa letan. Mon ti al travay kot *Harry Builders*, kot la mon ti travay avek bann etranze ki plis ti bann Endyen.

Kot la ansanm mon'n aprann konnen en pti pe zot bann koutim e kre en reaksyon avek zot. E sa osi tou, zot in donn mwan sa lankourazman pou mwan aprann en pti pe dan domenn, akoz sa louvraz ki mon ti pe fer sa letan.

Apre sa, mon'n bouz dan bann lezot landrwa travay kot

osi, mon'n ganny sans pou mwan zenn avek detrwa bann etranze osi lo en lot nivo.

Mr Speaker, sa Mosyon nou pa pe dir ki se ki etranze pa devret ganny zot en meyer *package* saler. Nou, nou pe dir ki Seselwa osi i devret ganny gete dan en fason pou nou ankouraz nou bann Seselwa, espesyalman ki ler bann i al *course*, ki zot konnen ki ler zot pou tournen zot garanti zot en meyer *package*.

Mr Speaker, ler Onorab William ti pe anmenn sa Mosyon, mon'n ganny sans pou mwan koz avek detrwa bann zanmi osi zabitan dan nenport ki distrik, pou mwan konn en pti pe zot pwennvi lo la. Mon pa pou tro long, mon pou pas en pti pe bann pwen ki mon'n kapab asize e met ansanm avek detrwa mon bann zanmi li menm.

I annan plizyer bann Departman ki ou kapab dir se ki nou bezwen met plis zefor pou ankouraz nou bann Seselwa. Mon annan en fiy ki mon'n akoz avek, in fer mon konpran poudir son louvraz ki i pe fer, se ki i ti annan en etranze avan li. E li koman en profesyonnel, in ganny sans apre ki sa etranze son kontra in fini pou li mont dan sa pozisyon ki i ete la konmela.

In fer mon ganny en konpran Mr Speaker, ki son Departman kot i pe travay, sa lakonpanyen in fer li en *savings* apepre R100 mil zis akoz son saler ki i pe gannnen avek pou sa etranze ki ti la avan li.

E zis mazine Mr Speaker be konbyen ki sa landrwa kot i pe travay, konbyen i ti pe depanse. In fer mwan ganny en konpran osi, ki zis mazine ler sa etranze i antre dan pei, i ganny li en zoli *package* saler. Osi sa landrwa i bezwen pey lekol bann zanfan sa etranze, ki i pa lekol Gouvernman. Souvandfwa zot met dan lekol prive. Osi en *package*, en landrwa reste osi tou Mr Speaker.

Be zis mazine ler ou pran kont tou sa bann depans ki vin avek, si nou ti kapab envestir sa dan nou Seselwa! Zis mazin sa. Lo sa saler ansanm avek son bann larestan depans ki vin avek, konbyen en bon saler ki nou ti a kapab donn nou bann frer ouswa nou ser Seselwa.

Mr Speaker, parey mon'n dir oparavan, wi nou bezwen etranze be osi nou annan nou Seselwa la ater ki zot kapab fer bokou sa bann louvraz ki etranze pe fer. I annan bokou Departman la ozordi ki annan

en Seselwa ki pe espere pou li monte.

Ki nou vwar, souvandfwa annou vwar poudir se ki, ler sa kontra sa etranze pe fini, dan plas nou fer monte nou Seselwa, nou re donn kontra sa etranze ki ti la. Seselwa i annan bokou la deor ki pe espere pou zot ganny sa loportinite, pou zot osi kapab monte pou demontre kwa ki zot annan.

Mr Speaker, mon annan bann zanmi ki dan militer e souvandfwa zot pe ganny bann loportinite epou zot al bann course. E petet i pa ganny dir, be souvandfwa nou bann Seselwa ki al bann *course* zot fer byen dan zot *course*, lo nivo fizik li menm li, akoz nou bann Seselwa i *sharp*. Nou bann Seselwa pe esper en loportinite pou zot kapab monte, pou prouve. E sa, ler nou Seselwa i monte Mr Speaker, pei pou fer bokou *savings* lo la Mr Speaker.

Mr Speaker, mwan dan mon dyalog ankor avek en lot zenn, ki pe travay dan en letablisman touristik, in fer mon ganny en konpran ki i vremen *happy* kot i pe travay, akoz i ganny i en zoli *package* e i osi vwar li kot i lo menm nivo avek son bann koleg etranz e ki la.

E sa zenn in fer mon ganny en konpran ki li i ti lekol

A Level. I pa'n lekol pou touris. Me selman in lekol *A Level*, kot apre ki i ti pe rod en louvraz apre son *study*, in deside pou li antre dan touris pou li al aprann.

Ou konnen, pa toultan ki nou pou ganny en dimoun ki'n *study* pou sa domenn ki petet i ganny sa loportinite pou li antre ladan. Nou bezwen donn Seselwa loportinite.

Mr Speaker, mwan ler mon ti ganny apros pou mon zwenn konmela i *PMC (Property, Management Corporation)*, mon pa ti konnen sa louvraz ki mon ti pe al fer. Mon ti annan mon bann bagaz avek mwan, me selman ler mon ti ariv laba mon ti ganny sans pou mwan aprann ek bann ki ti laba. Ms Simara, Ms Gendron, Ms Rose, Marlin.

Mon'n ganny sans pou mwan ganny bokou, ekspoze avek sa domenn ki mwan mon'n ganny mete ladan. Ki zour mon'n sorti Mr Speaker, mon'n ganny mwan bokou bagaz. E mwan mon panse e mon krwar poudir nou annan nou Seselwa la deor ki kapab fer en zoli travay.

Malgre ki pa tou ki pou annan sa nivo ledikasyon, ki petet ki pou ganny demande. Me selman nou Seselwa la deor vremen motive Mr Speaker e

mon krwar poudir se ki ler pou annan, parey Onorab William in dir, Gouvernman pou ekout nou, i anmenn sa legzersis i pou vwar, pou ki se ki i annan sa stabilite an term *package* etranze avek Seselwa osi tou, nou pou vwar kot Seselwa i vin plis motive.

E sa osi, parey Onorab William in dir Mr Speaker, i pou elimin bokou koripsyon. I pou elimin bokou trenn lipye dan travay. Akoz ozordi bokou Seselwa lebra i tonbe dan travay, akoz i vwar sa etranze ki li i montre travay pe ganny en gro saler.

Mr Speaker, mon'n ganny sans pou mwan koz avek en group travayer osi, ki'n enform mwan poudir zot annan en *Manager* ouswa en *supervisor* etranze, ki li zis i asiz dan biro li. I ganny li en gro saler ek son bann *allowance* tou ladan menm, i pa vin ditou lo teren.

E ladan menm Mr Speaker, zot pa konn tret nou Seselwa. Zot pa konn tret nou Seselwa. Sa i en lot keksoz ankor, ki mon krwar nou bezwen met devan bann travayer etranze, ki zot osi zot pe vin debourye, nou konnen poudir dan zot pei osi keksoz pa tro byen. Partou dan lemonn antye i annan bouwers la. Me selman ler zot vini zot bezwen

konn aprann respe nou Seselwa. Akoz zot osi in ganny *welcoming* pou zot vini.

Mr Speaker, ler mon'n koz ek sa group atraver, zot in montre mwan en pti pe zot dezapwentman, akoz se ki zot santi poudir enn zot frer la ki kapab fer sa louvraz e osi sa saler ki sa etranze pe gannyen. Zot pa pe demann sa gro saler, petet i kapab lev en pti pe lankourazman, tir en pti pe dezapwentman.

Nou konnen poudir sa size i pa en size ki fek leve la. In la pou bokou letan, me selman nou Lasanble nou pe demande ki i annan sa legzersis ki pe fer.

Mr Speaker, mwan mon pou donn mon sipor mosyon Onorab William, akoz mon santi dan sa letan ki nou ladan la, dan bann revizyon parey Minister Finans in anonse lo kote saler ki zot pe revwar, ki sa osi tou espesyalman la parey Madanm Mohideen in dir, se ki pou annan bokou travayer ki pou ganny bouz lo en kontra. Sa osi tou pou ede lev en pti pe latmosfer dan travay. Tri en pti pe bann trenn lipye parey in ganny dir.

Mr Speaker, mon pou donn mon sipor sa Mosyon, e mon oule tir mon sapo avek nou bann frer e ser Seselwa ki la deor ki ankor pe donner menm

e mon swete ki bokou zot i ape ekout Lasanble la pou konnen poudir bann Manm Lasanble, sa setyenm Lasanble nou tande ler zot pe dir, kwa ki zot pe dir.

E Mr Speaker, mwan mon donn mon sipor sa Mosyon, mon a dir mersi.

(APPLAUSE)

MR SPEAKER

Mersi Onorab. Mon aprezan pas laparol Onorab Labonte.

HON ANDY LABONTE

Mersi Mr Speaker. Mon a dir bonzour tou mon bann koleg Onorab e osi tou dimoun ki a lekout e sirtou en gran bokou spesyal zabitan Lariver Anglez e tou bann travay ki pe travay, ki pe donn tou. Sirtou nou bann travayer Seselwa.

Mr Speaker, pou mwan sa Mosyon anmennen par Onorab William pou anmenn bokou dibyen pou Sesel akoz pou mwan personnelman en labi lo nou prop Seselwa. Ler mon dir i ti en labi, se swivan sa bann defayans, lenzistis e diferans dan saler *package* ant travayer etranz e Seselwa dan nou pei Sesel.

E sa Mosyon pe demann Gouvernman, pou koriz sa lenzistis dan en legzersis revizyon saler, e pe al pli lwen

pou osi ankouraz Sekter Prive pou osi fer parey.

Mr Speaker, ler en etranze ki sorti dan son pei, ki wi nou bezwen rekonnèt nou bezwen zot, me pou en serten letan e pa pou lavi dire. Akoz nou pa kapab annan en sistenm ki travayer Seselwa i vin *class 2* e travayer etranze i vin *class 1*. Pou egalite, omwen tou lede i merit ganny gete parey dan pei Sesel.

En etranze Mr Speaker, pa ankor ni ariv Sesel e deza *GOP*, *airfare*, akomodasyon in fini vin en kou. Apart sa i ganny en gro saler.

I annan posibilite sa sertifika ki i vin avek i pa ni kredib. E la mon ti a kontan lans en lapel avek *SQA* pou osi form parti sa legzersis pou koriz sa bann egalite. Pou azoute, pli tar son konpany, son zanfan zot vin Sesel zot e lekol prive i ganny peye pou zot. Tousala pa i form parti sa *package* ki zot gannyen?

Kan nou pti Seselwa ki pa ganny ni menm lanmwatye sa saler ki sa etranze pe gannyen. Apre nou dir ki Seselwa i pares. Wi nou bezwen aksepte, i annan en pti minorite Seselwa ki pa devoue. Me lamazorite Seselwa, i devoue i donn tou, menm plis ki bann etranze ki fer menm responsabilite avek li.

La Mr Speaker, mon mazin sa madanm La Rosière ki en *accountant*, i kalifye. I anplope avek en Lazans Tourizim, me son saler i vreman ba, konpare avek en etranze ki zis vin donn bal dan sa lakonpanyen Sesel. E ladan menm kontra sa etranze i kontinyen ganny renouvle. Mr Speaker, sa pa akseptab.

E par lao sa, sa etranze i annan lodas pou dir sa madanm se Gouvernman ki tolere. Me Mr Speaker, permet mon pou dir sa, ler ki pep Seselwa ti vote pou en sanzman, pep Seselwa ti vot pou en vre sanzman e pou anmenn lazistis dan Sesel.

Fodre ki Seselwa i vwar sa sanzman ki zot ti vote an Oktob 2020. E rezon, mon pou siport sa Mosyon, akoz la nou pe koz ek nou Gouvernman, sa Gouvernman ki nou ti elekte, ki nou ti vote. Se sanzman pou lazistis dan Sesel. E se sa ki nou anvi vwar pou nou travayer Seselwa.

En lot garson devoue ki reste anler Union Vale ki fek ouver dan sid. I donn tou, me son saler ek sa saler etranze ki pe fer menm louvraz i bokou pli ba ki li. Me granmersi i en garson ki koz byen, i bon labous. Zot in zis donn li en promosyon zis pou li ferm son

labous. Me *still* sa saler ki zot donn li, i pa ekitab avek sa louvraz ki i pe fer.

Mr Speaker, permet mwan pou bouz lo en lot pwen. Nou oule ankouraz bann diaspora pou retourn Sesel, bann travayer etranze ki pe reanvoy aletranze pou vin Sesel pou donn en koudmen pou nou re aranz nou Sesel. E la i en sans ki nou pa merit manke.

Nou osi pe koz lo *performance based management*, me la i ankor en sans pou tou sa ki perform byen, i merit ganny rekonnet *according to* sa ki i pe donner. E pour terminen Mr Speaker, mon pou demann tou bann Manm fer sa ki byen e fer sir ki nou travay Seselwa i re ganny zot dinyite, par vot an faver sa Mosyon e fer Gouvernman tann nou lavwa e lavwa lepep.

Mr Speaker, mon pou dir ou mersi e avek sa de mo mon pou siport sa Mosyon.

(APPLAUSE)

MR SPEAKER

Mersi Onorab. Laparol i prezan pou Onorab Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou mon

bann koleg prezan e tou dimoun ki a lekout.

Mr Speaker, Mosyon ki devan nou ozordi i *comme swivan*; swivan defayans, lenzistis e diferans dan *salary* travayer etranze e Seselwa dan pei, Lasanble i demann Gouvernman pou koriz sa lenzistis dan en legzersis revizyon saler e osi pou ankouraz sekter prive pou zwenn sa legzersis.

Mr Speaker, sa topik saler espesyalman defayans saler parmi bann diferan kategori travayer, i en topik ki lannen apre lannen in monte dan bann plizyer diskisyon.

Mr Speaker, nou tou ki la, mon krwar a plizyer repriz nou'n zwenn en travayer ki'n konplent nou zot saler, ouswa nou'n lir lartik kot travayer Seselwa in eksprim zot mekontantman avek kalite *package* saler ki etranze pe gannyen konpare ek pou Seselwa.

Mr Speaker, parey nou tou nou konnen, tou travay i enportan. I pa pou fasil oubyen korek pou dir tel kalite travay, louvraz i plis ki sa lot group akoz a lafen dizour tou dimoun i travay.

Me selman pandan mon parkour pandan letan kanpanny e menm la koman

MNA, mon'n ganny sa loportinite pou zwenn bokou dimoun, ekout zot lopinyon lo sa topik saler, espesyalman bann ki dan bann sekter kot i annan etranze ki pe fer menm louvraz avek zot.

De legzanp ki mon pou servi, se travayer lasante e ansenyan. Baze lo sa ki mon'n ganny eksplike, *salary package* bann etranze ki pe travay dan sa de domenn, i bokou pli *attractive* e pli eleve ki pou travayer Seselwa.

I vre ki defi mankman travayer Seselwa, i fer ki etranz i bezwen ganny *recruit* pou kapab ranforsi sa bann mankman ki annan, e pou kapab ganny sa bann etranze i bezwen annan bann *package* ki ase *attractive*. Parey nou dir, ki pou ankouraz zot osi pou zot vini.

Me egalman soi nou bezwen pran kont, ki nou Seselwa i travay egalman dir lamazorite fwa lapey ki zot pe gannyen i dekourazan, ki fer ki bokou i kite, al rod lezot meyer kot saler i pli meyer.

Sa bann *package* ki pe ganny ofer i petet osi rezon prensipal akoz bokou Seselwa kalifye e eksperyanse, pa oule pran sa bann domenn, ki fer ki nou bezwen kontinyelman pe rod etranze. Par egzanp en

etranze ki vin travay isi, i ganny lozman swa an *from housing allowance* oubyen lakaz lwe i ganny peye pou zot.

Lo kote, nou vwar sa Seselwa pe ganny difikilte pou ganny en lakaz oubyen en bout later akoz zot saler pa pe permet zot pou kalifye en *loan* ek labank pou kapab konstri en lakaz ouswa pou aste en bout later.

Mon krwar bann *incentive* koumsa ki bann diferan Lotorite konsernen ansanm avek Gouvernman, i devret diskite e vwar ki mannyer sa bann keksoz i kapab form par bann *incentive* pou Seselwa.

Lontan mon rapel ki dan bann plizyer distrik ti annan bann lakaz ki nou ti apel Kan Gard, sa ti ganny *allocate* avek bann zofisye Lapolis ki ti pe travay dans a bann distrik. I vre ki ozordi petet i pa pou posib pou annan en menm *practice*, me selman bann *incentive* dan sa laliny i bann *proposal* ki nou devret pe pran konsiderasyon.

Mr Speaker, diferans dan saler i pa zis dan sekter piblik, me osi dan sekter prive. Mon konnen poudir letan aktyel ki nou pe viv ladan i difisil pou bokou biznes bezwen *mindful* lo zot bann depans e fer bokou sakrifis. Me selman *incentive* i

pa neserman ki i bezwen monneterman toultan.

La mon oule felisit bann lotel ki pe donn loportinite *training* bann zwenn Seselwa pou al *training* ek *attachment* aletranze, pou zot ganny sa sans ekspoz zot avek plizyer leksperyans pou benefisye zot dan zot karyer.

Alors mon ti ava osi ankouraz sekter prive pou osi revwar ki bann fason ki zot kapab ede, pou devlop travayer Seselwa pou donn zot bann fasilite oubyen *incentive* ki pou ankouraz zot pou zwenn oubyen kontinyen dan lanplwa kot zot ete.

Mr Speaker, parey mon'n dir diferans saler i egziste wi e mon totalman dakor ki en legzersis i devret ganny fer, pou vwar ki bann sekter ki annan sa diferans pou ki rezon ki sa bann diferans i egziste e kwa ki nou kapab fer pou fer amelyor sa bann de balansman.

Me an dizan sa mon oule lans en lapel avek travayer Seselwa ki swa dan sekter piblik or sekter prive pou dir ki saler i vin ek performans ek prodiktivite.

Parey granmoun i dir, 'nou bezwen travay dir pou ou larzan.' Alors mon pe demann avek tou travayer pou nou osi fer en refleksyon lo nou

performans. Re etidye nou performans, analiz ki nou fer, ki zistans nou'n arive, ki nou defayans, ki fodre nou fer pou ariv pli devan.

Eski sa metye ki mon pe fer i vreman sa ki mon anvi fer. Eski ler mon vin travay, mon vreman pe travay e an fezan sa nou a osi vwar ki nou menm koman travayer nou kapab amelyore lo la.

Bokou fwa nou'n ganny dir poudir Seselwa pa oule travay. Mon'n rankontre plizyer dimoun ki'n rakont mwan zot difikilte ki'n gannyen ek travayer Seselwa. I vre ki i annan bokou Seselwa determinen ki travay dir pou son dipen e bokou Seselwa ki ankor anvi kontinyen bouze. Me pa ganny loportinite, akoz etranze ki dan sa plas oubyen etranze ki ganny plis loportinite ki zot.

Me i osi annan bokou ki fodre zot redres zot *board* parey koze i dir.

I fasil dir donn nou larzan, me eski sa larzan i bezwen vin sa leman travay. Annou arete sa bann latitid trenn lipye e *kill time*. Annou montre poudir nou annan lanmour pou sa louvraz ki nou fer, e nou kapab fer li pli byen ki sa bann etranze.

Lo sa menm laliny, mon osi mon ti a kontan lans en

lapel ek ban anplwayer, pou sa bann ki pe byen tret zot travayer mon lev mon sapo ek zot. Me pou bann osi ki pe abiz lasyer travayer, fodre ki sa latitid i arete.

Fodre ki lotorite konsernen i merit met lipye ater e fer sir ki bann ka konplent e labi dan travay i ganny pran o serye, i ganny aksyon lo la pou ki bann sityasyon pa kontinyen ganny repete.

Pou terminen Mr Speaker, mon pou donn mon sipor total sa Mosyon, e mon swe se ki sa legzersis ava donn loportinite pou revwar pa zis saler, me bann lenzistis dan kondisyon travayer Seselwa ki dan sekter piblik e prive. Mersi

MR SPEAKER

Mersi Onorab. Mon aprezan pas lo Onorab Naddy Zialor.

HON NADDY ZIALOR

Mersi Mr Speaker. Bonzour tou mon bann koleg Onorab, bonzour Lepep Seselwa e bonzour tou travayer Seselwa. Bomaten mon ti kontan ankor enn fwa remersi loter Mosyon pou en Mosyon ki devan nou Lasanble ozordi, ki annefe i annan lannen ki nou pe fer sa konversasyon.

E i enportan ki dan sa letan ki nou ladan ozordi, nou

ankor enn fwa fer serten refleksyon pou nou regarde ki nou kapab fer pou lavenir. E bomaten mon anv i tir mon sapo pou travayer Seselwa. Ki swa i dan piblik, ki swa i dan prive pou kontribye pou zot kontribisyon san kondisyon, anver lekonomi e lepanouisman nou pei e egalman tou travayer etranze ki pe travay pou ede dan lepanouisman e devlopman Sesel.

Sepandan bomaten atraver sa Mosyon mon'n sezi 3 mo, ki a mon avi i topik konversasyon ozordi. Sa i defayans, lenzistis e revizyon saler pou donn lankourazman sirtou, sirtou dan sekter prive.

E mwan Mr Speaker, parey zot konnen a sak fwa ki en Mosyon i vin devan Lasanble, mon pran li mon devwar pou anmenn serten rekomandasyon. Avek sa Mosyon in permet mwan *on the top of my head* la, mazin en slogan ouswa en lartik oubyen en azanda ki *International Labour Organization* i toultan pouse e mon konnen ki Sesel i en Manm *ILO* - sa se '*equal pay for equal work*.'

E la mon anv i met serten senaryo devan nou Lasanble. Senaryo ki mon konnen ki nou Seselwa oubyen Sesel, i fer fas

avek e ki i ava en loportinite la ki Minis Finans, Minister Finans ansanm avek Departman Ladministrasyon i ava osi fer sa legzersis. Dan sa legzersis ki zot pe revwar kad saler, pou pran sa osi an konsiderasyon.

E letan mon tann koz lenzistis, letan mon tann koz defayans. Letan mon'n ekout bann Manm ki'n koze avan mwan e bann ki pou koze osi apre mwan, i ava osi en loportinite pou nou, letan ki *Employment Act* i vin devan nou, pou osi pran konsiderasyon sa bann rekomandasyon ki nou menm nou koman en Lasanble nou pe met devan, e ki Gouvernman i anv i vwar dan lavenir.

Eski i annan defayans dan kad saler Sesel oubyen pou Seselwa? Larepons i wi, Mr Speaker. Eski i annan lenzistis? Bokou fwa. Eski i annan lankourazman pou sekter prive donn lankourazman pou Sekter Prive. Donn loportinite sa Seselwa, la mon mazin sa *waiter*, sa *waitress*. Mon koleg Onorab Georges Romain in koz lo la. Sa *student* ki'n *study*, ki'n epanouir, ki nou'n ankadre li pou li sorti dan *middle management* pou *move* dan *upper management*. Eski nou

pe donn sa lankourazman, eski i annan?

Sa petet i bann keston ki nou menm nou koman bann Manm Lasanble e ki bann dimoun ki pran desizyon pei, e desizyon baze lo aktyalite, ozordi pou nou vremen fer bokou refleksyon lo la.

Ou konnen, mon a donn zot detrwa legzanp ki mon santi i annan serten lenzistis. E parfwa nou zet en regar lo sekte prive, me nou bezwen komans li dan lakour. Sa i mon lopinyon, nou bezwen komans li dan lakour.

The public service, the public servant, i annan serten kad ki nou bezwen revwar. Par egzant bann diferan *package* ki nou donn sa *officer*, sa asistan *officer*, sa Direkter, sa Direkter Zeneral. I annan serten keksoz ki nou kapab touse. Par egzant ou a dir avek en dimoun, ou konnen be pou ou gannnen en pos Direkter ou bezwen annan serten kalifikasyon baze lo sa, ek sa, ek sa. E ou kalifikasyon i pou atase ek ou *allowance*.

Me lenzistis i vin letan ou saler debaz, ou *basic* ki ou antre i diferan avek sa enn ki ti la avan ou. Sa i en lenzistis Mr Speaker. Letan zot in koz bokou lo *private sector*. Wi i annan lenzistis, i annan defayans.

Letan en *bar tender*, en pos i ganny mete lo gazet dizour e i dir ou i annan en *vacancy bar tender*, pran en legzanp *Ephelia*. Sa *package* ki sa Seselwa i antre lo la ler i vin fer *interview* avek sa *package* ki apre, Lalwa i demann ou 3 zour pou ou fer ou piblikasyon. Apre 3 zour si ou pa ganny kandida, si i ankor parey. Petet mon koleg Onorab Cosgrow i ava koriz mwan pli tar parske nou ti dan sa Departman.

Si apre 3 zour ou pa ankor ganny en Seselwa, la ou *apply*, ou fer laplikasyon pou en travayer etranze. Me souvandfwa ki nou vwar, se sa *package* ki sa etranze i vin avek i bokou plis. E la mon pe koz *basic*, i bokou plis ki sa Seselwa ki ou ti pou pran li pou travay dan sa letablisman. Vwala bann lenzistis ki nou pe koz lo la Mr Speaker.

E se pour sa rezon ki dan sa travay, dan sa diskisyon ki nou pe fer bomaten mon santi ki Departman Lanplwa i annan en travay ase entans pou li fer. Ozordi ki bann fakter ki pe kree sa lenzistis?

Souvandfwa se ou vwar diferan, en *post* ki annan diferan on. Ozordi i apel *cashier*. Demen i apel *general helper*, apredmen i apel en resepsyonnis. Me selman apre

ou vwar en *post*, sepanman en *Ambassador*, en *hotel Ambassador*.

Nou bezwen annan en liniformite dan bann *post* ki nou pe poste koman *vacancy*, en fason ki sa lespas pou nou kree sa bann lenzistis e defayans i fermen. Me sa ki pli enportan, mon santi ki en keksoz ki nou bezwen fer alavenri, se si par egzanp demen bomaten ou annan en pozisyon drayver par egzanp, annou pran drayver.

Annou met *package* sa drayver depi ler ki ou pe fer son *vacancy*. E sa *package* i reste ki swa i en etranze, ki swa i en Seselwa, i konnen poudir demen bomaten si mon pe *apply* sa *post* lala bann keksoz, bann *incentive* ki mon pou *entitled*. E si mon napa serten kalifikasyon dan serten domenn, lala i sa ki mon pa pou pe gannyen. Me nou pa kapab vwar en lenstans kot sa bann keksoz i kontinyen.

E se pour sa rezon ki ozordi nou pe vwar, wi i annan bokou travayer Seselwa dan sekter prive. Sirtou dan lotelri ki dekouraze avek sa bann tel sityasyon. E mon santi ki nou osi koman bann Manm Parlman nou annan serten travay pou nou fer. Me tout an respektan, ankor parey mon'n

dir o komansman, nou donn valer, valer sa travayer Seselwa.

I annan de mon koleg Onorab ki'n dir. Bokou fwa i annan sa sanson ki ganny sante dan nou zorey ki travayer Seselwa pa oule travay. Me pou sa Seselwa travay, nou bezwen fer sir ki nou pe donn li en bon keksoz pou al avek dan lakour.

En lot konponan enportan ki mon santi nou kapab ede pou koriz sa bann lenzistis e defayans, se *empowerment* avek *training*.

E la zis an pasan bomaten, mon ti pe regard en pe dan nou Manifesto kwa ki ganny resorti. En keksoz enportan se ki nou ti pou annan en *training college* pou kontinyelman donn, *empower* sa Seselwa ki dan *public service* pou plizyer lannen. Ankadre li pou ki demann bomaten nou vremen met li lo sa standar e nivo ki nou bezwen.

Mr Speaker, Onorab Labrosse in fer sorti en pwen ki enportan. Pa tou rekonpans ki bezwen monneter. Pa tou rekonpans ki nou bezwen donn larzan. E la osi mon pou dir i annan lenzistis Mr Speaker. I annan. Akoz?

Mon a donn ankor 2 legzanp san ki mon diskrimin personn. Annou pran en pozisyon en *Director of Human*

Resource oubyen *Human Resource Manager* ki antre dan *international chain of hotels*. Letan i vini i ganny li dan son *package* adisyonnèl, i ganny li en par egzanp en loto. Be ki anpes nou ankouraz sa Seselwa, ki ler li i pran en pozisyon Direkter *Human Resource*, li osi i ganny sa *package*. Sa i ava en lankourazman. I ganny sa ki ganny akonpanyen avek sa *package*, pou sa etranze. Li osi koman sa Seselwa i gannyen.

Ozordi nou annan bann lenstans kot en *bar tender* pe ganny plis larzan ki en *Human Manager*. I annan lenstans Sesel. Sa i bann lenzistis Mr Speaker, sa i bann keksoz ki letan ki nou pe fer sa Mosyon, mon santi nou osi koman en Lasanble nou bezwen, letan i annan bann Lalwa ki vin devan nou. Fer sir ki nou pe port atansyon. E ki dan lenstans kot nou bezwen regilariz serten keksoz nou fer li.

Mr Speaker, pandan sa bann dernyen letan, in annan serten mezir ki Gouvernman in anonse pou pran an kont sityasyon ozordi. E i annan serten mezir ki Gouvernman in dir i pe pran konsiderasyon, tel koman *performance based management*. Kot a lafen lannen ou pou annan

50poursan ki garanti e lot 50poursan i pou baze lo performans sa endividi.

Mon lankourazman ki mon ti a kontan donn avek mon bann frer e ser Seselwa, se kontinyen donn tou dan zot travay. Fer li avek lanmour. Fer li avek pasyon, fer li koman en vokasyon. E o fir e anmezir ki nou koman en Gouvernman nou vwar i annan lespas pou nou koriz sa bann lenzistis, mon santi e mon annan konfidan ki nou pou fer li.

Avek sa de pti mo mon ti a kontan aport mon sipor pou sa Mosyon, e mon swete irespektiv ki kote ou ete bomaten, ou osi ou aport sipor pou ou frer ek ser Seselwa. Mersi.

MR SPEAKER

Mersi Onorab. Laparol i aprezan pou Onorab Samynadin.

HON KELLY SAMYNADIN

Mersi Mr Speaker. Bonzour tou mon bann Koleg Onorab e tou travayer Seselwa. Pou komans mon ti a voudre remerci Onorab William pou sa Mosyon ki re valab e *long overdue*.

Mr Speaker, parmi bann misyon nou Gouvernman, se pou kre loportinite pou Seselwa. Fasonn en meyer pei e osi ogmant reveni ek standar

lavi. Dan sa lespas 2an ki ase kourt, nou pei in pas atraver en parkour ekonomik ase dir. Gouvernman in bezwen trouv li dan plizyer sikonstans pe pran bann desizyon enpopiler, me ki par konsekan pe ed pei sirmont bann defi, ki nou ti pe dezormen bezwen afronte avek bi pou nou kapab akonplir nou bann misyon ki mon fek mansyonnen.

Sa i enkli sispansyon trezyenman saler, logmantasyon dan laz retret, kontribisyon pansyon, ensidswit.

Malgre sa Mr Speaker, nou lekonomi pe finalman permet Gouvernman revwar serten polisi monter ki an plas pou kapab koriz sa lenzistis ki annan, dan bann diferan grad saler. Pli enportan logmantasyon dan saler bann travayer ki lo minimonm *wage*.

Dan son diskour pou Bidze 2022, Minis pour Finans, Naadir Hassan ti dir ki Gouvernman pe travay lo en nouvo *framework* saler pou sektè piblik e ki i espekte aplik sa nouvo striktir dan Bidze 2023.

Sa Mr Speaker, i demontre ki sa Gouvernman pa'n oubliy sa pep. I rekonnèt zefor ki sak travayer Seselwa i fer e osi konpran ki avek kou lavi ki

kontinyelman ogmante, pou plizyer rezon ki an deor nou kontrol byensir, Seselwa i bezwen soulazman pou kapab soutenir zot lekor e zot fanmir.

Mr Speaker, pou nou kapab analiz debalansman saler, nou bezwen kapab idantifye bann defayans ki deza egziste dan lanplwa Sesel ozordi.

I annan bokou amelyorasyon ki nou rekonnèt i bezwen ganny fer, afen ki nou kapab ankouraz plis Seselwa pou antre e reste dan lafors travay.

Pou nou kapab retenir traver Seselwa ki swa dan sektè prive ou piblik, nou bezwen osi kapab atrakte bann ki nouvo. Pli spesifikman bann zenn. Premyerman nou bezwen mazin bann etidyan pos-segonder ki pe ganny en *allowance* maksimonm R1800. Mon santi ki zot osi zot bezwen ganny soulaze an vi ki depans pou zot bann materyo skoler e pri lavi li menm in ogmant ase signifkaman.

Dezyenman nou bezwen osi mazin nou bann etidyan ki pe etidye Liniversite Sesel lo en *fulltime basis*, e ki aktyelman pe resevwar en *allowance* R3500. Mr Speaker, i annan ki annan zanfan e fanmir pou siporte, ensi ki lezot depans. E sa

larzan malerezman avek kou lavi aktyel i vreman ensifizan.

Dan sa ka, Gouvernman i devret osi get dan *welfare* sa bann etidyan, e ede soulaz zot osi. Avek lanons ki trezyenmman saler pou ganny donnen lo en baz *performance e results base*, mon santi ki sa i en polisi ki tre valab. Sa i a fer ki performans e servis dan sekter piblik i ava enn pli efikas e ki ava osi anliny avek bann revizyon saler ki Gouvernman pou pe antreprann.

I osi enportan pou note ki dan sa sekter, i touzour annan travayer ki pe trenn lipye. Prosedir birokratik i touzour ankor long. E mon pe demann avek tou Minister konsernen pou travay plis dan sa direksyon pou evite ki nou bann sitwayen i esper sitan lontan pou en servis, ki parfwa i enzistifyab pou annan retar.

Sa i enn bann defayans ki nou Gouvernman in promet pou travay, pou aranze. Sirtou kot persepsyon piblik bann pratik organizasyonnel osi ki bann direktiv apropiye, pou asir en pli bon *service delivery* anver zot bann kliyan i konsernen.

Mr Speaker, mon konnen ki avek lanons bann nouvo revizyon, bann *carers* pa'n

ganny oubliye. Me mon santi ki anplis ki revwar zot saler, nou bann *carers* i merit osi ganny bann pli bon lankadremman an term formasyon.

Dan bokou sironstans bann *carers* pa dire dan zot louvraz. E mon krwar ki sa i prensipalman aköz i annan en mank motivasyon, lanmour e devosyon pou sa louvraz. E ki mannyer nou pou kapab ranvers sa?

Sa se atraver formasyon adekwat pou zot kapab donn en pli bon *service delivery* nou bann dimoun aze e bann ki otreman kapab.

De lot kote, zot bann kliyan i devret osi ganny edike lo meyer fason pou tret zot bann *carers*. Aköz sa bann dimoun i la pou donn zot bann swen debaz, ki zot fanmir pre pa pe kapab ofer zot sirtou pandan lazournen.

Parfwa se sanmenm ki fer zot dekouraze. Sa i aplik sirtou pou bann ki pey zot *carer* zot menm kot bann *carers* i souvan vwar zot ganny abize. Swa zot ganny en louvraz an plis pou fer, oubyen zot ganny maltrete verbalman.

Mr Speaker, bann teachers Seselwa pe osi eksperyans en debalansman dan zot kondisyon travay, an konparezon avek sa ki pou

bann *teachers* etranze. Sa i an term saler e akomodasyon ki merit ganny revwar. I egalman annan en defayans dan saler bann diferan grad kalifikasyon.

Malgre ki bann *teachers* avek en *Degree* ou en *Masters* i ganny *housing allowance*, zot *basic salary* i bezwen ganny revwar an konparezon avek bann ki annan en Diplonm. Sa i ava ankouraz plis ansenyan ki mank serten kalifikasyon neserer, sirtou lo nivo segonder pou zot osi ankouraze pou *upgrade* zot lekor dan sa kad profesyonnel tre nob.

Dan ledikasyon osi Mr Speaker, i tre enportan ki nou pa oubliy bann *non-teaching staff*, ki zot depi lepok Minis Simeon zot ti benefisyer avek en revizyon saler.

I enportan pou note ki apard ki bann *teachers*, zot zwen en gran rol dan fonksyonman lekol koman en lenstitisyon, osi byen ki dan byennet bann zanfan.

Mr Speaker, en revizyon saler i tre enportan, akoz i en fason pou bann anplwayer montre lapresyasyon, rekonesans anver lakonplisman zot bann anplwaye.

Par kont i devret osi en loportinite, pou bann anplwaye reflesir lo zot performans e osi

fer okenn lazisteman pou ki zot ava anliny avek lakonplisman zot bann bi, an akordans avek zot revy performans anyel.

I dwa tou travayer pou benefisyer avek en revizyon saler. Me i osi egalman enportan pou egzers zot responsabilite koman bann travayer responsab, ki delivre zot servis avek responsabilite e efikasite.

I nou devwar koman bann Manm Lasanble, pou asire ki Gouvernman i swiv bann prosedir apropiye pou *deal* avek bann defi nasyonal, espesyalman kot revizyon finansyel i konsernen.

Mon garanti travayer Seselwa, ki mwan ensi ki mon bann koleg, nou pou toultan lager e defann zot dwa otan ki zot kapab afen ki nou ava kapab gard plis travayer Seselwa dan lanplwa.

Mr Speaker pou konklir, mon pe profit sa lokazyon pou felisit remerci tou travayer Seselwa ki leve tou le bomaten, pou desann pou al debourye avek responsabilite ek devosyon pou zot louvraz.

Bann ki pe trenn lipye, ki pa pe travay avek seryozite, annou sekwe nou! Nou konplent travayer etranze avek plizyer leskiz. Me annou asize e analiz lo nou performans an

konparezon avek bann travayer etranze dan nou pei aktyel.

Avek sa pwen refleksyon, mon pe konfirm mon sipor anver sa Mosyon. Mersi Mr Speaker.

MR SPEAKER

Mersi Onorab. Mon ava apel Onorab Ernesta pou son lentervansyon.

HON PAUL ERNESTA

Mersi Mr Speaker. Mr Speaker, koleg Onorab e tou dimoun a lekout, espesyalman nou bann travayer Seselwa ki ozordi pe ekout nou, mon dir zot tou en gran bonzour.

Mr Speaker, mon'n ekout avek latansyon *mover* Mosyon e osi tou le 6 entervenman ki'n koze apre Onorab William. E Onorab William dan son prezantasyon, keksoz ki mon'n kapab tire ladan, in koz klerman lo disparite saler etranze e sa ki pou travayer Seselwa. E sa, tou le 6 koleg ki'n koze avan mwan zot osi zot in koz dan sa direksyon.

Me mon trakase Mr Speaker, sel rekomandasyon ki mon'n kapab tandé apard serten prezantasyon Onorab Zialor, kot zot in koz zis lo nesosite pou fer revizyon grid saler. Me letan mon ekout sa Mosyon, letan mon konpran sa

Mosyon i al bokou pli lwen ki sa. E dan sa fason fer, mon per pangar naryen pa ava arive. Akoz sa Mosyon i sitan enportan kot mon krwar nou bezwen kapab donn tou nou latansyon e bann rekomandasyon pratik ki Gouvernman i kapab fer, pou nou kapab arive abouti sa ki nou anvi abouti.

Onorab Zialor in koz lo en prensip fondamantal e en prensip lo bann drwa koman en imen e sa in tous lo sa prensip *ILO* ki koz lo *equal right, equal pay for equal work*. E sa i ekstrememan enportan. E letan nou get osi Nasyon Ini, i osi pe pouse, ki par parti 2030 i arive ki tou son bann Pei Manm i kapab annan en fason fer standardize dan tou kote, e kot tou son bann pei manm, tou son bann travayer i kapab adopte sa kalite prensip.

Me sa prensip li menm *basically*, i pe koz plizoumwen lo egalite travay zonm avek madanm. Me letan nou get li dan konteks Sesel, i al bokou pli lwen ki sa. Me Sesel nou ozordi, nou bann travayer madanm e travayer zonm, i preski lo menm standar. Zot saler i preski parey, zot ganny preski menm dwa.

Me letan mon aplik li kote travayer etranze, la nou vwar sa

disparisyon. Mon koleg ki'n koze avan mwan in pran legzanp. Li osi koman en *teacher*, in pran legzanp en *teacher* e in tous sa laspe kot saler en *teacher*, sakenn i annan son diferan saler, reminerasyon ki zot gannyen.

Par egzanp *entry point* en travayer en ansenyan si mon ganny li byen i ant 8500 a 9000, sa i baze lo zot kalifikasyon ki zot annan. E petet si zot al pli lwen, zot a ganny en pti pe plis.

Me letan nou get menm sa travayer, sa ansenyan etranze ki pe fer menm kantite travay, menm kantite letan dan lekòl, pe *teach* menm size, li i pou ganny plis, i pe ganny plis ki sa ansenyan Seselwa. E Mr Speaker, sa i montre en disparite kler lo kote saler nou bann Seselwa.

Annou get dan lot domenn ankor, en lot *area*. Nou koz lo bann, si ou le lo nivo *Management* e menm nivo Egzekitiv. Dapre nou Lalwa ozordi, Lalwa travay i dir ki en travayer Seselwa, li son saler son *entry point* i sipoze *around* R48mil. Ok? Me par kont letan nou get, annou donn en legzanp, en Sef Egzekitiv li i antre lo R48mil, mon krwar mon koleg pli boner in fer sa refleksyon, ki i kapab sa menm lot Sef Egzekitiv ki pou pran sa

saler, sa louvraz si ti annan en etranze la. Sa etranze li son saler i 80mil plis ki saler konpare avek sa saler Seselwa ki preski double. Pa preski, i double.

Me an menm tan avek sa, sa etranz eli i pou ganny li en *allowance* lakaz, transpor si i bezwen, son zanfan i pou bezwen al lekòl dan lekòl prive. I a ganny li son *meal allowance* e tou son bann lezot keksoz, tou son bann lezot *perks* ki vin avek.

Me tandis ki sa Seselwa ki pe ganny R48 mil, petet i a ganny li de pti *allowance*. Me i pa pou zanmen *meet* ni menm ariv lo *basic salary* ki sa etranze i lo la. E letan si ou pou zanmen sa bann *perks* ki sa travayer etranze pe gannyen, i kapab menm sot si pa R100mil letan ou'n adisyonn tousala ansanm lo bann term non monneter.

Sa i montre klerman Mr Speaker ki annan, ankor mon repete, ki i annan sa disparite.

E letan nou koz lo motivasyon nou bann travayer, e vwala parmi diferan faktor ankor ki annan, e vwala sa enn bann *major factor* ki afekte, ki demotiv nou bann travayer Seselwa.

Largiman ki ou pou tande e bann refleksyon ki ganny fer,

akfer ki mwan mon bezwen donn tou, kan li sa etranze li i pe ganny plis ki mwan. *Ok?*

E dan sa konteks mon kapab tonm dakor avek zot, menm si zot dwa e zot bezwen, si zot in antre dan en landrwa travay, zot in pran en responsabilite e lezot bezwen delivre.

Me sa lenzistis bokou fwa i demotiv zot Mr Speaker. Me Vis- Prezidan yer nou'n tann li avek Sekreter Egzekitiv, zot in koz lo kontra performans, lo byensir ki nou pe *move* dan sa direksyon. Wi i en bon linisyativ.

E ki sa i fer ki a lafen lannen, sak travayer i kapab ganny *atest*, ganny *appraised* e ganny zot reminerasyon, bann benefis ki gannyen baze lo zot performans. De lot kote osi, nou'n ganny dir ki bann travayer etranze zot, zot lo *PSE* kontra. Problenm ki arive avek sa, ki nou vwar dan landrwa travay bokou fwa? Nou vwar sa *subordinate* ki ed sa travayer etranze pou li kapab egzekit son kontra, pou li kapab fer sir tou sa ki in ganny dir dan son kontra i ganny enplimante a lafen lannen.

Nou'n *disregard* sa travayer Seselwa e li sa travayer tranze i *tick* tou son bann *box* - tou keksoz i *ok*, in delivre - in

delivre lo depan sa travayer Seselwa. A lafen lannen li i ganny tou benefis. E sa Seselwa, ou kapab vwar dan menm lenstans osi ki sa i arive partou, kot viktimizasyon i antre. Sa Seselwa li i ganny bann *move appraisal*. I vwar li son trezyenm mwan saler, ki nou pe al bouz lo la i ganny afekte e li i ganny tou son gro *perks* i al avek.

So, i bann keksoz kot nou bezwen gete e nou bezwen kapab get byen nou bann travayer Seselwa. Tou sa ki'n koze avan mwan, ekspekte zis *mover* Mosyon ki mon pa'n tann li dir sa parol, i annan en sanson ki zot in sante dan zot lenterpretasyon. Sa mo 'Sesel i pares.'

Be nou bezwen kapab arete dir sa parol. Par natir nou ete koman en Nasyon, nou pa en pep ki pares nou ! Erite par nou bann gran paran, nou sorti dan en nasyon debouryer Get tou sa bann semen ki'n ganny fer. Bann la in kas makadanm, bat kannel pou devlop sa pei. Eski nou dir sa en pep ki pares? I bann persepsyon ki nou nou'n anmennen lo nou dimoun.

Nou komans par premye nou Dirizan dan *SONA* i ti dir, Seselwa i pares. *Echo* ozordi par Onorab ki'n fek koze avan mwan, nou trenn lipye. Mon pa

konnen petet i annan serten wi. I annan serten, me pa tou. Sa i en lapel pou tou sa bann ki pe trenn lipye, wi zot bezwen bouze.

Me selman annou pa pran tou dimoun, zeneralize, pran tou met dan sel sak, dan en sel pannyen apre noy zot! Fodre pa ki nou fer sa, e nou bezwen kapab, nou bezwen siport nou bann dimoun, nou bezwen kapab siport zot.

Lo sa size, i anmenn mwan lo en lot pwen. Lokalizasyon bann *post*, ki nou vwar? Ozordi nou vwar bokou bann *areas* kot nou'n servi sa mo, nou met en *understudy*. Nou met en *understudy* en Seselwa pou li pran sa *post* letan in arive pou li, sa travayer etranze i arive.

E mon apresye ki *mover* Mosyon in rekonnet ki pei in fer en ta progre. *Ok*, i annan en ta lavansman ki'n arive atraver nou Gouvernman avan. E nou'n vwar atraver sa ledikasyon pou naryen ki nou'n donn nou pep, sirtou sa loportinite ki nou'n donn nou lazenes, ozordi labank profesyonnel i bokou gran. Nou annan profesyonnel partou. Partou kote. Me nou bezwen kapab valoriz zot. E zot tou, zot in rekonnet tou bann ki'n koze avan mwan, nou bann

profesyonnel pa pe ganny valorize.

I annan en koleg in dir osi, kot nou vwar bann travayer etranze ki vini, i napa kalifikasyon, enn. E dezyenmman i mank leksperyans. E sa *understudy* li, li ki *train* sa travayer etranze. A lafen dizour travayer etranze i pase i ale, li i reste lanmenm.

I annan sironstans kot sa *understudy* ki sipoze pran pozisyon demen, i la ziska 7an. *Ok*, i dan sa menm pozisyon li. Letan ou vwar sa *manager*, mete sa travayer etranze, sa *expat* in vini pou 2an, son kontra i pou 2an. I fini son kontra 2an, en lot i vini i pran son plas.

Akoz ki arive sa? I pa kestyon i pa kapab bouze. Sityasyon i arive aköz son kondisyon in fer ki li bezwen *understudy* pou 7an pou li ganny leksperyans. Me solman dan menm lenstans, letan i sipoze ganny leksperyans, li ki pe montre sa *Manager* travay. Li pe montre sa enn ki pli o ki li travay.

Me eski kestyon nou bezwen demande, i pa'n *acquire* ase leksperyans pou li kapab pran sa pozisyon? Enn. E dezyenmman, eski i napa sifizaman *knowledge*, konesans sa lorganizasyon, pou li kapab

pran sa pozisyon? E Mr Speaker, keksoz ki arive ankor pou sa bann tel sityasyon, mon krwar Onorab Zialor in koz lo 3 zour piblikasyon ki ganny fer, pou okenn *opening* ki annan dan bann landrwa travay.

Sa *time frame* i ganny met pou nou Seselwa. Me keksoz *freaky* ki arive, sa travayer etranze li in deza - nou vwar nou bann *scouts* i al deor, i kapab en mwan, 2 mwan avan. I al deor pou li al fer son *scouting* e son *recruitment* deor, 2 mwan davans. Me nou Seselwa nou, nou ganny zis 3 zour swa en semenn, de semenn pou nou fer nou laplikasyon.

Tousala bann lenzistis, bann keksoz ki defavoriz nou bann travayer Seselwa, pou li ganny en pozisyon dan landrwa travay.

Mwan mon krwar nou bezwen annan menm kondisyon ki ganny mete, avek bann travayer etranze e osi avek nou bann travayer Seselwa, ki tou nou ava lo menm *level*. Si i pou 2 mwan, *opening* pou 2 mwan. Mon krwar zot *HR* i bezwen annan en plan, i konnen en dimoun in fer son 2an, son kontra pe al fini ankor annou dir an Oktob. In bezwen kapab *either*, swa zot

dan prosedir renouvle kontra sa dimoun, enn.

Ou dezyenmman si sa pa pe anvi renouvle kontra sa dimoun, swa sa dimoun i pa anvi renouvle son kontra, zot in bezwen kapab fini kler ladan, konnen sa dimoun pe ale ankor dan 2 mwan, annou komans fer prosedir.

Annou komans fer sa prosedir lokal e osi enternasyonal si zanmen nou pou al fer nou *scouting*, ki tou nou bann dimoun i ganny menm letan pou zot kapab fer zot bann prosedir. E lenformasyon ki nou donnen -

Par egzanp si nou dir sa travay nou pou bezwen pyos, pik ... ou pou ganny sa, sa, sa. Menm langaz ki ou pe koz ek sa travayer *expat*, i menm langaz ki ou pe koz avek sa travayer Seselwa. E li aprezan i kapab pran son desizyon. kote ki li i kler.

Be keksoz ki mon'n kapab konstate osi, sours tou nou bann problem se ki ozordi - Al gete ozordi, dan nenport ki lorganizasyon travay. Menm nou Lalwa Lanplwa ozordi i silans lo tou sa bann zafer. I napa okenn naryen, okenn par. Monn konsilte Lalwa Lanplwa lo sa size, napa landrwa ki mete kot tou keksoz i bezwen

egal. E vwala kote ki nou pe ganny anpaye, enn.

Aprè dezyenmman, annou get nou striktir saler baze avek sa ki pou sa etranze parey mon'n dir pli boner, akòz nou striktir saler ki petet sa ki reflekte sa ki Onorab pe demande, i pa kler, i pa drwat.

Napa naryen ki dir ki sa etranze li i pou v ini. Si ou Seselwa i pou antre 48 mil parey mon'n dir. Sa etranze i bezwen antre 48mil. Me sa i baze ankor, annou get *currency* osi. Konparab *currency* lokal avek *currency* sa *expat* ki pe vin travay lo la.

Si R48 mil, annou *convert* sa *currency*, fer li vin R48mil ki vin parey pou nou Seselwa. E sa keksoz ki nou bezwen ganny fer. E osi nou bezwen aret viktimiz nou bann travayer Seselwa. I sa bann keksoz ki'n ganny fer anba sa preteks performans. E nou bezwen osi revwar nou bann *appraisal*.

En keksoz ki nou'n rekonnet, ki nou'n konstate, partou ozordi nou annan bann profesyonnel dan preski tou *areas*. I annan ki nou annan mankman, me selman ozordi nou annan *qualified* profesyonnel dan preski tou bann *area*. *ANHRD*, mon mazin i bezwen annan labank tou sa bann dimoun ki

nou'n anvoy *train* e tou sa bann ki'n vini e tou bann ki'n reste deor laba. Nou bezwen kapab annan sa labank.

When the time comes, parey mon'n dir, si 2mwan nou annan sa *opening*. Sa lorganizasyon i kapab lyez avek *ANHRD*, gete nou annan sa *opening* la. Ki bann profesyonnel ki nou annan, ki pou kapab, baze lo bann kalifikasyon ki sa louvraz i demande nou kapab gannnen.

E la *ANHRD* i a kapab donn son konsiltasyon e sa dimoun i kapab. Parey i pe *scout* deor, i kapab *scout* lokal osi avek tou bann lenformasyon ki annan e i kapab dir li.

E mon'n konpran osi ki dan mon pti resers ki dan lespas e nou'n fer en legzersis ase konpreansiv. En *survey* ki'n ganny fer kot Minister Lanplwa sa lepok. Pou zot kapab vwar bann de balansman ki annan dan bann landrwa travay an se konsern saler, pou zot kapab vin avek en keksoz, bann propozisyon pli kler, pli drwat, ki pli eze ki nou bann dimoun.

E la petet mon a demann *mover* Mosyon pou koz ek Seksyon Lanplwa, pou vwar si i annan sa bann rezilta lo sa bann travay. E zot annan bann serten, bann rekomandasyon ki

ti pou kapab ede pou fer sir ki parey nou'n komanse pli boner, 'equal pay for equal work.'

MR SPEAKER

Onorab mon ava envit ou pou konklir. Pa ki mon pe enpoz letan. Mon a eksplik ou apre.

HON PAUL ERNESTA

Yes Mr Speaker. Mon pe al konklir.

E dezyenmman nou'n koz lo kote striktir saler. Mon propoze osi petet osi *mover* Mosyon i kapab komans sa konsiderasyon, ki nou kapab annan bann striktir saler, bann saler minimonm baze lo bann sekter ki kapab ede, tou dimoun nou kapab annan en *entry point* pou sak sekter ki nou konnen, ki personn pa pou ganny afekte dan okenn domenn.

E lot, nou kapab annan en *proper training program* ki ed nou bann travayer Seselwa pou zot kapab osi bouze, e baze lo bann kalifikasyon e bann *requirements* ki sak Lorganizasyon travay pe demande.

Mr Speaker, avek sa mon a dir ou mersi e pou donn mwan sa loportinite pou mon kapab anmenn mon kontribisyon. E mon demann *mover* Mosyon osi pou li konsider enn de sa bann

rekomandasyon ki mon'n mete, pous devan. Pour ki i kapab ede dan son konklizyon final. Mersi Mr Speaker.

MR SPEAKER

Mersi Onorab e mersi pou konpran mon. Mon pa ti anvi koup ou kourt, me e mon pa pe enpoz okenn limit letan lo bann entervansyon pou sa deba. Mon krwar nou annan sifizaman letan.

Selman mon oule zis eksplike mon krwar bann Manm i okouran ki nou annan en sityasyon kot plizyer Manm ek *staff* i enplike dan travay ozordi bomaten, sirtou avek rankont avek lezot antite Gouvernman. E akoz sa, mon en pti pe prese pou termin sa avan 11er, pou permet zot al dan sa bann sesyon travay.

Me osi, mon oule dir ki nou pou aret *sitting* la pou bomaten akoz nou bezwen permet sa bann travay ki nou pa kapab *postpone*, in arive *deadline*, nou bezwen fer.

E avek sa mon a dir ki nou a re pran sesyon kestyon 2er. Onorab Loze ou annan en pwen? A wi, byensir. Mon a met ou non lo papye. E mon oule osi remersye bann Manm pou zot konprenezon. Ki nou bann Manm in ganny enplike dan *meeting* avek SADC-PF dan

sa 2 zour, ki enkli mon menm osi e se pour sa ki zot in vwar serten Manm mank sesyon, mank *sitting* detanzaot. E sa pou aplike osi ozordi.

Mon remerisi piblik pou konpran nou lo difikilte avek nou *schedule* e nou a re zwenn 2er. Mersi.

(BREAK)

MR DEPUTY SPEAKER

Bonn apre midi tou Manm Onorab. bann *staff* e piblik a lekout. Byenveni a kontinyasyon nou travay pou sa Merkrede apre midi. Nou pe debat Mosyon prezante par Onorab Waven William. Zis pou rapel piblik ki Mosyon pe dir;

Swivan defayans lenzistis e diferans dan *salary package* travayer etranze Seselwa dan pei, Lasanble i demann Gouvernman pou koriz sa lenzistis dan en legzersis revizyon saler, e osi pou ankouraz sekter prive pou zwenn sa legzersis.

Prosen enterven an ki lo lalis Onorab Johan Loze. E mon ti ava apresye osi si i annan Manm si oule koze pou letan i pe pran laparol les mon konnen, aköz pou nou kapab kalkil dirasyon letan, pou nou fer sir nou fini sa Mosyon ozordi. Mersi. Onorab Loze.

HON JOHAN LOZE

Mersi Mr Speaker. *Sorry* mon krwar i annan en pe konfizyon, aköz mon krwar mwan ki ti dernyen lev lanmen sanmenm zot pe demande si zot lo lalis.

Mersi Mr Speaker. Mr Speaker Mosyon ki devan nou Lasanble, nou tou nou kapab agree e enn ki tre nob e ofet pou et fran i en Mosyon ki nou tou ki Seselwa nou bezwen siporte. Nou bezwen sipor son lespri sa diskisyon ki devan nou Lasanble ozordi. Aköz si i annan en keksoz i nou kapab agree lo la nou tou, se byennet nou pep. E sirtou byennet lafors travayer Seselwa ki li i pe kree larises e i pe kree byennet zeneral pou nou tou.

An dizan ki mon siport lespri Mosyon, mon pou sey dan mon diskisyon ozordi, se elarzi en pe deba pa pou al kont lespri Mosyon pa pou al kont sa ki Onorab in propoze nou pa koz zis pou nou lekor letan nou isi anndan, nou koz pou Lepep Seselwa an zeneral. E i annan serten panse ki mon mazine in ler pou konmans entrodwir dan nou sosyete.

Pou konmanse, annou rekonnet ki nou en faktori konman pei nou sosyete lafason ki'n ganny ankadre, nou en

faktori ki *mass produce* en lafors travayer ki fer en keksoz i vann 8 erdtan. I vann li 8 erdtan par zour avek en Lagreman ki an resanz pou son 8 erdtan, i ganny li *ex amount* par erdtan *which equal to ex amount* par mwan.

E sa se lanplwa. Nou pei i en faktori lanplwa ki kree bann anplwaye, ki *go out into the world of work*. I *take an employment*, e i espekte annan *secure employment* ziska son laz *retirement*. Sa i en pwen ki mon oule met devan.

Now eski sa i en bon keksoz ouswa i en move keksoz, oubyen i senpleman en keksoz ki devret adrese e korize dan sa pei ki nou pe viv ladan?

Depi ki mon'n antre dan Lasanble ki pa tro lontan - mon krwar mon ti fer mon zis 18 mwan dan mon premye fwa ki mon ti antre mon premye manda.

Be sa kourt parkour ki mon'n annan dan Lasanble, i annan en keksoz ki mon'n toultan kontan koz lo la, sa se ledikasyon finansyel.

Mon'n deza lev li dan bann Mosyon. Mon'n lev li dan deba Bidze enn de fwa e plizyer fwa mon'n koz lo ledikasyon finansyel dan lekol. Dan nou sistenm ledikasyon formel.

Mon'n deza ganny dir par SS Payet ki Labank Santral in deza pe *take up* sa. Be ki nou vwar Labank Santral li i dir ou ledikasyon finansyel i pou montre ou ki mannyer ou pou fer ou pti Bidze, ki mannyer ou pou balans ou depans kot lakour, ki mannyer ou pou plan ou larzan, plan ou depans eksetera.

E sa ledikasyon finansyel limite ki nou pe propoze pou montre manrmay dan lekol, li menm li i *still* tonm dan sa kad sa faktori ki prodwir en travayer, pou li vann 8 erdtan an resanz pou en saler.

Nou pa pe donn li en ledikasyon finansyel ki pou montre sa zanfan, *look* ou pou *graduate* lekol demen ou pou al dan *in the world of work*, ou pou pran ou en lanplwa natirelman, e letan ou'n travay la la ki mannyer ou fer ou *saving*. Be letan ou fer ou *saving* la, la ki mannyer ou pran R100mil ou fer vin en R1 milyon e la, la ki mannyer ou fer ou ou pran ou R10 milyon ou milyon Roupri ki ou'n fer *your first million*, ou fer li vin 10 milyon.

Nou pa ankor evolye nou *thinking* dan sa direksyon kot ledikasyon finansyel, i viz ver kreasyon larises e liberasyon lendividi kot lendividi i *attain*

financially independence throughout the cost of son lavi.

Nou ankor *sadly* pe koz zis montre dimoun ki mannyer pou fer son pti Bidze kot lakour. Limite. En keksoz tre limite. Bon, sa i enn bann keksoz ki pe ganny bezwen ganny adrese.

I annan en lot keksoz osi ki mon'n koz bokou lo la depi mon'n dan Lasanble e sa mon krwar zour ki Minis Zialor ti vin son *interview* pou vin Minis. Mon ti mansyonnen ki nou'n deza ganny gran konversasyon nou lo bann teknolozi modern, lafason ki en Seselwa i kapab *earn*.

Nou'n pas nou en dezyenm *safe cable* la i kout nou pei en kantite larzan. E nou pa pe servi li. Nou pa pe servi li pou rantabiliz lafason ki en Seselwa i kapab *earn from* sa bann keksoz koumsa.

Ozordi Sesel dan 4er edmi - 5er si ou kart telefonn i pri, ou fer en *call* ou rod en led ou pou tonm lo en *call centre Maurice, Zambia* ouswa *Sud Afrique*.

Be nou annan dimoun Sesel ki kapab fer *call centres*. E nou annan teknolozi enternet ase vit, ki kapab permet Seselwa pou *host* en *call centre internationally*.

E i annan bann loportinite travay *online*, pou dimoun ki

annan konesans kapasite pou li *earn individually*.

I annan en rezon ki mon pe al dan sa bann direksyon Mr Speaker mon ava eksplik li en pe pli tar.

So nou bezwen al konmans sa dan en direksyon kot nou get plis ki zis lanplwa, kot nou get *beyond* lanplwa pou Seselwa.

Nou pe bezwen konmans viz ver kreasyon plis loportinite, pou permet sa Seselwa, sa lendividi li menm pou li ganny loportinite pou kree plis larises.

Be letan nou pe vwar bann keksoz ki mon pe *go through* la, nou pe vwar poudir petet nou sistenm li menm i pa *setup* pou sa. Nou deza pe form nou pep pou li ale al travay 8 erdtan par zour. I zis travay 8 erdtan par zour.

So enn bann fason pou sey *achieve* sa ki Onorab William pe rode, sa ki Onorab William pe serse. I posibleman pou sey fer travayer Seselwa vin en komodite pli rar lo marse travay.

Letan mon dir travayer Seselwa, enn mon koleg in dir mwan 'be dimoun pou deza dir ou travayer Seselwa i deza rar.'

Mon pe koz ou travayer Seselwa ki posed kapasite ,konpetans, ki deza dan lemonn

travay ki pe vann son 8 erdtan. Be ki mannyer nou liber li?

Ki mannyer, eski nou liber travayer Seselwa bann ki pli kapab ki pli konpetans pou kree plas pou lezot. E pou kree bann sityasyon kot si en lakonpanyen ou bezwen en travayer Seselwa, ou bezwen ou sa lakonpanyen, ou travay ou *retain* li.

Ou fer zefor pou *retain* sa travayer Seselwa dan ou lorganizasyon travay, sansan i pou *pack up and go* li - i pe *pick up* i pe ale.

So basically mon krwar nou bezwen nou en lekonomi ki pe mars en pe pli byen, ki deza pe marse.

E nou bezwen kre kondisyon pou nou ganny lekonomi. Nou bezwen kree sa bann loportinite pou Seselwa kree larises.

Be i annan en keksoz nou bezwen en pe *careful* osi la. I annan dimoun letan pe ekout nou i kapab krwar poudir petet nou konman Lasanble, nou annan problemm avek travayer etranze. Ki pa ditou leka.

I pa ditou leka. En Seselwa i vin en lenvestisman pou pei depi son nesans. Akoz atraver nou sistenm lasante iniversel, en manman i al lopital pou li akouse. E sa i ganny pran ka par Leta.

So i vin en cost. Ou fer grandi sa zenn Seselwa, tou son vaksen tou son maladi i ganny *taken care of* par Leta. Sa zenn Seselwa son ledikasyon i ganny *taken care of* par Leta.

Ki fer ki ler i vin en *fully fledge* travayer 21, 22 *whether* 24, 24an 18an menm petet, Leta Sesel in investir bokou dan sa travay.

Be pran en travayer imigre par kont i aparet lo later a laz 24an *fully fledge*, ou pa'n investir naryen dan li ni son lasante, ni son ledikasyon, i la pare pou travay *plug and play*, ale laba dan lekonomi prodwir kree larises.

Lo sa kote la, travayer etranze i pa en move keksoz. Ou annan ou en travayer ki ou konman en pei konman Leta ou pa'n investir ladan, ou pa'n met gran so dan son formasyon. I zis vini i la i pare pou kontribye e ede kree larises.

I sifi ki ou konman en pei prezan ou kolekte *tax* avek li e dan direksyon ki nou pe ale la, ou kolekte kontribisyon pansyon avek li. Ou kolekte kontribisyon pansyon avek son anplwayer parey ou fer pou tou Seselwa, letan i ale ou rann li en porsyon sa ki li in kontribye e ou gard sa ki son anplwayer in kontribye. Balans sa liv pansyon la ki nou pe koze.

So travayer etranze si *in that particular light* i en *net contributor* ver lekonomi Sesel.

Alors nou napa problemm avek travayer etranze. Problem ki nou annan se, lenzistis dan reminerasyon ki zot pe gannyen vizavi Seselwa.

MR DEPUTY SPEAKER

Ankor 3 minit Onorab en.

HON JOHAN LOZE

Sorry Mr Speaker mon pa ti'n okouran poudir i annan limitasyon ler, aköz bomaten ...

MR DEPUTY SPEAKER

Sorry mon pe entervenir mon pe enteronp ou aköz i annan 10 entervenans.

So mon pe donn tou dimoun 15 minit pou nou kapab fini sa Mosyon 5er. Mersi.

HON JOHAN LOZE

Sorry Mr Speaker. Depi bomaten pa'n ganny dir mon pa ti'n ganny dir. Mon ti ava'n ... dan en lot fason.

MR DEPUTY SPEAKER

Wi vre ki bomaten Mr Speaker ti'n dir napa limit letan - i ti'n dir sa I lo *verbatim*.

Solman la apre midi i annan 10 dimoun ki'n endike poudir zot pe koze.

So mon pe donn 15 minit sakenn pou nou fini 5er. Mersi.

HON JOHAN LOZE

Ou a *indulge* mwan en pti pe solman Mr Speaker, aköz mon pa'n konnen vreman. Tou dimoun la i konnen.

Wi Mr Speaker, bon mon ava *rush* en pe.

Enn bann keksoz ki mwan mon pou dir. Mon napa *issues* avek en Seselwa fer en etranze travay.

Whether i lo en laferm ouswa pe netway semen, ouswa dan koupaye oubyen dan bat kannel, en Seselwa fer travay en dizenn etranze mon krwar i en *plus* pou nou lekonomi.

Be mwan konman en Seselwa kot i vin en *issue* se ki letan nou konmans vwar etranze ki pe fer Seselwa travay.

So mon krwar nou ava agree la deza, se ki enn bann problem ek lafason ki nou striktire se ki, nou pe tro anmenn etranze sirtou dan sekter prive pou konmann nou. Kan i devret lenvers.

Be i pa devret lenvers zis dan lanplwa osi. E nou pa pou sor sa zis atraver lanplwa. Fason pou *solve* sa se plis biznes, plis loportinite e ki Seselwa ki konpetan i a kapab sorti dan sa lesklavaz vann 8

erdtan e al ver biznes lo zot menm. E i annan fason pou propoze pou fer sa bann keksoz.

Sesel ou konnen nou en pei nou pare pou donn *scholarship* en zenn 18 19 ki pa ni pou ankor prouv son lekor, ou investir konman leta ou investir 1.6 - 1.5 milyon Roupri dan en *scholarship* pou anvoy li etidye.

Be en matir - en matir pou nou tir 50 malere R1000 konman en *seed capital investment* pou donn en zenn Seselwa pou li al fer biznes! 50 mil.

Be aköz 50 mil? Nou pare pou investir 1.6 - 1.5 dan en zenn pou li al fer en letid *with only one single caveat* ki i siny en *bond* i retournen i travay pou Leta Sesel.

I pa ni bezwen rann. I pa ni bezwen rann sa larzan. I pa bezwen rann en sou li. I retournen i travay.

Se sa ki Leta Seselwa i fer. Be aköz nou pa fer parey pou en zenn Seselwa ki le fer biznes? Aköz nou pa fer parey avek en Seselwa ki'n prouv son lekor in dan lanplwa i travay pou en labank, in dan lanplwa pandan 10 - 15an i anvi sorti fer en biznes, i anvi en *seed capital investment*, aköz napa en landrwa kot i kapab ale, ki

kapab met en milyon Roupri investir dan li *as seed capital*?

E mon pa konnen an resanz pran *equity shares* dan son biznes dizon. Ki ler son biznes i vin *successful* i avarrann ouswa i avaste sa bann *equity shares* avek ou.

Be deswit la ou konmans tir dimoun konpetan ki'n pri dan lanplwa e ou konmans fer en travayer Seselwa ganny plis valer pou bann anplwayer aköz i konnen li. I annan lot landrwa ki son travayer i kapab ale.

En dimoun in travay 10an 15an avek li, in *train* sa dimoun sa dimoun i plen ek konpetans i konnen sa dimoun i kapab al laba demen bomaten. Vin ek son proze biznes, *apply seed capital* i ganny en milyon i ale i fer son biznes. Sa i en propozisyon.

En lot propozisyon aköz nou ankor pe vann later pou fer biznes avek Seselwa atraver *lease*? Aköz nou pa donn li?

En Seselwa i oule fer en biznes i oule later akfer nou vann li later? Aköz nou pa lev s a bout later e nou donn li an resanz nou dir li *ok* Gouvernman i pran serten *equity shares* dan ou biznes. E ou an retour zour ki ou decide vann ou biznes, vann ou later ou pey Gouvernman *market value of the day* ki ou vann *full*

market value no subsidy, nanryen.

E ki ou'n fer? Le moman ki ou'n vann li sa later ki ou'n donn li sa later ou'n transfer lo li, imedyatman i ganny en sekirite kot i kapab ale pran en *loan* konmans son biznes fer son biznes avek.

Ankor ou tir ou en Seselwa ki'n pri dan lanplwa, ki kapab kree larises anploy lezot Seselwa kree konpetisyon, bouz marse lekonomi Sesel.

E liber Seselwa dan lanplwa pou ede *achieve* sa ki Onorab William pe serse pli vit petet, ki si Gouvernman li menm li i bezwen zis vin lager avek bann anplwayer atraver *framework* e Lezisasyon.

E i anmenn e deliber dimoun ki travay dan Gouvernman, pou li osi sorti ale al kontribye dan masin kreasyon larises.

E mon pe koz lo sa zafer donn later lo menm fason ki mon pe dir donn en *Grant* an larzan donn li en *Grant* dan form later.

E sel fason ki nou pou rezourd nou problem ekonomik se plis Seselwa dan biznes.

Mwan si i annan en keksoz mon'n deza dir, mon ti dir sa dan enn mon repons lo Bidze *in fact* mon ti servi

legzanp Cap Ternay mon ti dir pran Cap Ternay gete si nou kapab tir en 300 kare later, donn bann Seselwa les zot devlop bann *small tourism business*.

Akoz si i annan en keksoz ki'n prouve depi 2008 ziska la. Se ki Seselwa dan bann *small tourism businesses* ki'n ede kree sa rezerv 500 ekek milyon Dolar ki nou annan dan sa pei.

Tou sa ki nou anvi *achieve* dan lekonomi Sesel i pou ganny fer zis en sel fason. Par met konfyans dan Seselwa pou li *take ownership* son lekonomi e *drive* sa pei de lavan napa lot fason. Sa mon garanti zot sa enn.

Si dan sa prosen 10an, nou reisi ganny nou en 300 - 400 fanmir Seselwa fer zot envestir dan bann *small tourism developments*, *this country cannot go wrong economically*.

E Gouvernman i annan zis pou tir kare *prime land*, *provide* later nou arete ek sa gro devlopman 5 zetwal 6 zetwal 10 zetwal la.

Nou met dan lanmen Seselwa.

MR DEPUTY SPEAKER

Wrap-up Onorab.

HON JOHAN LOZE

Mersi Mr Speaker. Zot avawwar ki mon entervansyon mon'n al debord Mosyon en pti pe, mon'n al dan bann direksyon ki mwan mon'n santi i kapab pous deba en pe pli devan. Mon pa'n vin fer politik.

Me mon'n plito vin defann lakoz mon pep ki apel Seselwa.

Mon santi i enportan a sa moman kot nou mete pou defann lakoz sa pep, par met konfyans dan li. met konfyans dan Seselwa pou li rezourd tou son sor ki pe afliz li.

E *whatever* kote politik, *whoever* ki lo pouvwar ozordi *whoever* ki o pouvwar 2025 sa i en *constant* ki pa pou kapab sanze dan sa pei.

Seselwa i sel solisyon pou problemn Sesel. Mersi Mr Speaker.

MR DEPUTY SPEAKER

Mersi Onorab.

(APPLAUSE)

MR DEPUTY SPEAKER

Prosen entervenans. Parey mon ti pe dir zot anba *Order 57 (1)* mon pe *set time limit 15 minutes*. *Why* pou permet tou le 10 Manm ki'n montre lentansyon pou zot koze pou ganny en loportinite pou eksprim zot lo sa Mosyon. Me

pli enportan pou nou fini avek sa enn Mosyon ozordi.

So annou respekte sa. Prosen entervenans Onorab Naidu.

HON SATHYA NAIDU

Bonn ape midi Mr Speaker. Bonn apre midi tou koleg Onorab ek tou dimoun ki a lekout. Espesyalman zabitan Saint Louis.

Mosyon ki devan nou i dan lentere travayer, travayer Seselwa. Mon'n vremen apresye tou bann pwen ki entervenans avan mwan in *submit*. Mon krwar si nou travay avek sa mantalite ver tou bann diferan size, nou pou kapab vremen bouz nou pei delavan.

Ler nou pe regard sa size nou pe koz lo disparite ki i annan ant travayer Seselwa e etranze. I pa en keksoz de nouvo pou plizyer lannen plizyer travayer dan diferans sekter in soumet zot konsern. Zot in soumet fristrasyon.

Me kwa ki'n vremen arive. Nou'n vwar ki pli ale sa lekar i kontinyen ogmante e nou vwar ki dan landrwa travay menm bann ki dan menm pozisyon avek en etranze, pa pe neserman donn sa zefor ki zot merit pe donner akoz sa ki zot pe gannyen i pa ase.

E ler nou pe al lo disparite in ganny met devan poudir ki bann ansenyan zot ganny mwens an konparezon avek en etranze ki vin isi i ganny son *housing*, e menm loportinite pou anvoy son zanfan ver ledikasyon ki Leta li menm li i pe donner. E sa i vin en depans. *Then* nou pe regard li lo en laspe pli global pou bann *tax payers*.

E mon demande si nou konman bann Onorab, nou kapab ganny egzanpsyon parey lo *excise tax*, pou transpor, pou ki rezon nou pa fer parey si i annan kek potansyel pou fer sa analiz nesaser, pou kapab donn nou bann ansenyan menm privez, e sa i aplik osi pou nou bann ners e nou bann dokter.

E ler nou pe pran en tel mezir i pou fer zot ganny akse avek en transpor. E a en pri pli ba e zot osi zot pou santi ki zot ape ganny valorize.

E si nou oule retenir nou bann ansenyan dan sa profesyon, olye les zot ale dan bann lezot profesyon parey i leka ozordi. Mon krwar nou osi regard sa konponan *housing*.

Mon konnen in annan en polisi lo kote *housing*. E lo kote sistenm pwen, plis ou annan zanfan ou ganny plis pwen mon krwar nou kapab regard sa en

pe. E donn pwen baze lo profesyon. E vreman valoriz bann travayer esansyel kot si ou en ansenyan ou pou ganny *ex amount of points and this will push you further to have access to housing*.

E ler byensir en etranze i sorti kek par i antre dan pei, i ganny en lakaz tandis ki sa lot i ape zis senpleman ganny en *housing allowance* ki pa lo menm nivo.

Byensir i pou dekourazan. Ler nou pe koz lo bann travayer etranze menm dan prizon, nou'n vwar dan letan Bidze a plizyer repriz nou'n soulev sa pwen kot nou'n fer referans avek sa ki en etranze pe gannyen konparezon avek en Seselwa.

Me selman si sa etranze i kapab ganny R18mil, pou kwa pa nou pa pou kapab valoriz nou Seselwa ki pe travay dan menm domenn?

Wi i kapab baze lo leksperyans. Me selman nou bezwen konmans kekpar. E *unemployment* in reste en size ki'n toultan lo latab kot referans in ganny fer. E i osi en konsern.

E ler nou pe regard bann landrwa travay ki pe met bann *vacancies*, zot demann sepa konbyen lannen leksperyans.

E ou bezwen konmans kek par pou kapab ariv lo sa nivo

osi. E mon krwar i bezwen annan plis konprenezon lo kote sa anplwayer osi ler zot ape soumet zot bann *vacancies*.

E zisteman lo bann *vacancies*, e zisteman lo bann *vacancies*. sak fwa ou vwar *vacancies* pe ganny pibliye konmela i zis met tit e pa pe neserman dir konbyen an term saler ki zot ape donnen ver sa pozisyon.

E se la kot ou pou vwar sa dekalaz ant sa ki en etranze i gannyen konparezon avek en Seselwa.

E ler sa etranze pe antre dan pei, i annan son *airfares*, i annan son *accommodation cost*, i annan serten ki ganny *food and fuel allowance* e plizyer lezot ankor.

Mon pe koz lo bann *medium and low skill*. So *medium* avek *low* zot ape ganny tou sa benefis, pou ki rezon eski sa anplwayer Seselwaz, i pa pou kapab pas sa benefis avek sa travayer, pou donn li sa lankourazman pou gard li dan sa lanplwa.

Me selman lo sa menm size sa ki bann biznesmenn dan sekter prive i fer resorti, se zot ganny difikilte pou ganny en dimoun ki Seselwa pa oule travay.

Se sa ki serten biznesmenn dan sekter prive i

dir. E ler ou regard sa size, wi i annan en group. I annan en group ki anplwayer i ganny difikilte enorm avek.

E nou bezwen pare pou admet sa defi e nou bezwen regarde ki mannye eski nou pou kapab adres sa pou bouz delavan. Pou fer sir ki nou annan en lafors travayer ki annan bann etik, bann valer ki nou menm nou, nou kapab pran lafyerte ladan.

E ler ou fer sa konparezon avek sa vye zenerasyon an konparezon avek sa enn ki nou annan ozordi, malerezman zimaz ki pe ganny penn se zot pa vremen prodiktiv parey zot ti ete lontan. E se la kot nou lafors travayer i ganny enpakte lo en laspe negativ, baze lo sa problemm lalkol avek drog ki nou annan ozordi.

Sa osi i en defi ki ozordi zour sosyete pe fer fas avek e kwa ki nou, nou anvizaze fer konman en Gouvernman, nou bezwen kapab pran sa size konman en priyorite, e rod en mwayen neserer lo laspe reabilitasyon.

Nou pou toultan fer referans avek bann kliyan ki lo *methadone*, me selman partou kote dan nou bann distrik nou vwar en senkantenn si non plis, pe asiz partou pa pe neserman antre dan travay.

Malgre ki zot lanmen tou keksoz i *ok*.

Me selman ki kalite zimaz ki nou, nou pe kree pou nou menm konman en pei, ler nou pe koz lo lafors travayer? Byensir lo sekter konstriksyon se sa sekter kot nou annan sa gran kantite etranze pe travay.

E lo kote bann lekol pos-segonder kwa ki pe vreman ganny fer, pou kapab *reduce the gap* ki egziste? E kwa ki pou ganny fer k asire ki ler en zanfan i al dan sa lenstitisyon, demen i pou reste dan sa landrwa travay ki li o konmans in ganny tou bann zouti neseler pou li kapab antre ladan.

Nou vwar en bon pe zot, zot al en lekol apre finalman zot pa dan sa metye ki zot in dedye en parti zot lavi ladan.

E se la ler nou pe koz lo diferan sekter se la kot *ANHRD* i antre ki rol *ANHRD*?

Onorab Ernesta in met en propozisyon devan. Malgre ki in kapab met sa devan dan lepase i pa'n ganny tande. Me selman safwasi mon krwar nou annan en Gouvernman ki proaktiv, ki pare pou tande, ki pare pou fer bann lazistaz neseler. Pou nou kapab regarde ki rol ki vre rol *ANHRD*.

Eski zot ape vitman fer swivi neseler pou asire ki ler en zelev in fini fer lesansyel, pou li

kapab ganny tou bann bagaz neseler ki demen i pou kapab antre dan en landrwa travay, san pas lo zournal en karantenn fwa, pou li kapab antre dan en landrwa travay.

Mon krwar lo kote *placement* lesansyel i pou bezwen ganny fer. E Onorab Samynadin i ti'n fer resorti lo kote bann zelev pos-segonder zot ape ganny R1800. Wi i en sonm ki minim, me selman mon krwar nou osi nou devret kapab ankouraz en kiltir parey leka ler ou al aletranze pou al etidye pou travay dan en letablisman.

Part time employment lo kote bann zelev. Mon pa vwar li en problem espesyalman konmela, dan bann pei aletranze zot abitye travay dan *Burger King, Mac Donalds* isi laba.

Be dan konteks Sesel osi nou annan en bon pe *take aways*. E lakantite etranze konmela ki ou pe vwar i fer ou poz serten kestyon poudir be nou bann Seselwa pa pou kapab fer sa?

Mon krwar nou be zwen kapab regard sa osi pou kapab met zot lo *part time employment*. Pa neselerman demann Leta en sonm adisyonnal, pou zot osi pran responsabilite a en tre zenn-az, avan ki zot pe rantre

dan lanplwa formel pou kapab annan sa responsabilite.

Ler nou pe fer referans avek lapey, lakantite ki en travayer i gannyen, nou konnen ki i annan en disparite. E si nou oule vremen atrakte nou bann frer ek ser Seselwaz ki pe reste aletranze, pou desann Sesel e kontribye ver devlopman zot pei, nou bezwen kapab si nou pe vwar zot annan kapasite pou ranplas sa etranze li menm li, nou bezwen kapab donn zot menm *package*.

E se sa ki pou vremen atrakte nou diaspora ki laba e dapre lo en rapor lo *National Migration Policy - Labour Migration Policy* zot pe fer resorti i annan apepre 5000 Seselwa aletranze.

Mon krwar la baze lo menm Mosyon ki ti'n annan avan par ou menm ou Mr Speaker, lo kote diaspora, mon krwar sa Diaspora Yunit i pou bezwen vremen angaz li lo en nivo kot zot pou kapab idantifye ki kantite Seselwa nou vremen annan laba deor *and what is the skill set*.

Pou nou kapab kote Gouvernman li menm ki ler i annan en *vacancy* ou pou kapab anvoy avek zot pou regarde si zot vremen enterese *to come onboard*. Pou kontribye ver devlopman zot pei. Sansan

nou pou trouv nou dan menm sityasyon, si nou pa pe adopte bann mezir pli proaktiv.

Ler nou pe koz lo standar an term satirasyon lo kote lapey, mon krwar travayer osi. Parey mon'n fer resorti pli boner *there is a certain ethic that's come to it as well*, ki bann dimoun dan sekter prive zot dir zot soulaze, ler zot ganny etranze akoz i vin a ler, zot kapab met konfyans dan zot. Zot pa ganny okenn problem. e zot biznes i marse san okenn lenteripsyon.

Sa i bann defi ki zot, zot rankontre se la kot fer vini en etranze.

Me dakor ou fer vini en etranze, me selman dan serten pozisyon fodre ki i annan en plan siksesyon. Parey in ganny fer resorti oparavan.

E dan Sekter Tourizm dan sa rapor menm i fer resorti poudir ki 80poursan bann travayer dan Sekter Tourizm, dan sekter lotel i fer fas avek sa lenzistis ler i konsern disparite lo kote saler.

E sa i en rapor date 2019. Me kestyon mon pe demande wi mon vwar serten mezir proaktiv lo kote *Seychelles Tourism Academy* ki pe ganny pran finalman, pou met anmas bann demars neser pou kapab ankouraz bann zelev, poudir ki

tou bann zefor ki ou pe mete pa pou al anven, en zour ou pou kapab pran bann pozisyon pli o. E sa i bezwen ganny aplike pou tou lezot sekter, pou kapab garanti ki nou bann zenn pe ariv ver bann pozisyon anler menm.

E ler nou pe koz lo ...

MR DEPUTY SPEAKER

2 minit Onorab.

HON SATHYA NAIDU

Ler nou pe koz lo *curriculum* lekol mon krwar sa osi i bezwen annan kek modifikasyon, pou kapab reflekte bezwen diferan sekter, diferan sekter dan pei.

Annefe ou menm ou avek ou Mr Speaker, ler nou ti'n lekol Belonie nou ti'n vwar en size *Design & Technology*.

Sa ti en keksoz ki ti'n enpresyonn mon poudir ki *there is a step forward in that right direction*. Konmsi nou pa pe zis montre bann size Konvansyonnel. Me selman nou pe bouz ver en lot direksyon pou kapab atir zot lentere.

E sa konversasyon lo kote *carriers guidance*, i bezwen arive en nivo pli ba, depi *S2 onwards* zot bezwen kapab ganny edike lo kwa ki ou bezwen fer pou ou kapab vin en

Avoka par egzanp. Ouswa nenport ki lezot metye.

E ozordi zour nou'n trouv nou dan en sityasyon, kot nou pou kontinyelman depan lo en etranze, si nou pa pe fer lesansyel lo kote ledikasyon li menm. Pou nou kapab *fill in the gaps*.

Me selman nou osi bezwen konsyan poudir ki si lekonomi pe grandi, i pou toultan annan dependans lo etranze.

E Mosyon sa ki pe demann ou se pou koriz sa lenzistis, pou osi asire ki nou viv dan sosyete kot napa limozite ant en etranze avek en Seselwa, kot i annan koezyon sosyal. Mersi Mr Speaker.

MR DEPUTY SPEAKER

Mersi Onorab.

MR DEPUTY SPEAKER

Prosen entervenans Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Mr Speaker mon lentervansyon ozordi lo Mosyon anmennen par Onorab William, i enn ki pou ase bref e pou reste *within* sa *time limit* ki ou'n donn mon.

Me selman Mr Speaker mon'n ekout bokou bann lentervansyon avan mwan e

pou dir ki mon krwar nou tou nou annan en - menm si nou diferan an term politik - an term lopinyon politik e mon krwar nou tou nou annan en menm dezir, pou vwar ki travayer Seselwa i pas premye, travayer Seselwa i benefisye.

Mr Speaker mon oule konmans mon lentervansyon par koz en pti pe lo listwar, e pou bann petet ki'n vin pandan sa bann letan dan listwar nou pei, zot ava kapab konfirman, zot ava kapab ateste, lo sa ki sa bann keksoz ki mon pe al dir, malgre mon pou tre bref. Akoz loter Mosyon dan son lentrodiksyon in fer referans avek listwar. In fer referans avek 43an lepase.

E konmsi i o portinen la ki nou fek selebre nou Lazournen Nasyonal, ki nou osi kwensid avek zour nou Lendependans, mon santi ki i enportan ki an bref nou rapel tou Seselwa kondisyon travay e kondisyon travayer Seselwa labaz nou lekonomi sa letan.

E Mr Speaker nou konnen sa letan labaz nou lekonomi, ti fonde lo lagrikiltir kot nou bann prodiksyon prensipal sa letan, sete kannel, kopra, patsouli, lavannir eksetera, eksetera.

E listwar ki'n ganny rikorde Mr Speaker ankor i pou

testifye, bann kondisyon travay sa bann letan.

E ozordi mon konnen sak fwa nou koz en pti pe lo la i annan serten nimerasyon. Me ozordi mon fyer poudir enn bann travay primordyal Parti *SPUP* sa letan sete pou lager for pou travayer Seselwa.

E i enportan nou antre ladan. I enportan akoz i set en pti pe listwar kot nou'n konmanse *or* en bon parti nou listwar, pou nou konpran en pti pe ki nou pe pas ladan ozordi, e ki mannyer nou bouz dan lefitir.

Parey mon'n dir Mr Speaker. nou'n travay e nou'n lalit en kantite pou travayer Seselwa, pou anmenn bann kondisyon pou ki pei Sesel i menm li kapab devlope e travayer dimoun i kapab epanouir.

E ler mon dir sa mon tante pou mon dir wi vre transformasyon ti ariv 1977. A longer ditan Mr Speaker, prensip ek vizyon kler Gouvernman in amenn nou kot nou'n arive ozordi.

E kote nou ete ozordi Mr Speaker? Atraver en sistenm ledikasyon iniversel nou'n kapab elev nivo *literacy* e nivo ledikasyon an zeneral nou pep, atraver bann Polisi Sosyal, nou'n kapab asire ki menm

bann ki ti bezwen swazir ant anvoy zot zanfan lekol ouswa al travay, ti swazir lekol ek ledikasyon pou zot zanfan - en loportinite ki petet zot, zot pa'n gannyen dan lepase.

Ki sa in fer Mr Speaker? Nou'n kree en baz lafors travayer tre edike. Nou fyer nou dir nou, nou fyer pou dir Seselwa atraver Seselwa dan son mazorite tre edike, tre kapab.

E nou'n kree zot pou zot kapab diriz devlopman pei. E nou souvandfwa servi sa fraz nou'n met imen pep o sant devlopman nou pei. Sa i en fe Mr Speaker. bokou nou bokou nou la nou'n benefisye. Ler mon dir benefisye *being* nou'n pran loportinite ki a nou dispozisyon e nou'n bouz delavan.

Eski Mr Speaker ti annan posibilite fer pli byen? Petet wi. Eski Mr Speaker ozordi nou kapab fer pli byen? Definitivman wi. Definitivman nou kapab fer pli byen. Menm si nou servi lepase pou gidans nou pa viv dan lepase Mr Speaker. E mwan mon enn ki krwar ladan.

Alors mon krwar ki nou devret pe rod tou sord fason pou asir meyer kondisyon travay pou tou Seselwa tout an prenon kont ki nou viv dan en

lemonn global e ki travayer Seselwa nepli *compete* antre nou. Me avek tou sitwayen sa *monde* global.

Mr Speaker mon konmans koumsa akoz mon santi poudir nou kapab avans devan, nou bezwen rapel nou listwar e servi li konman gid nou fitir.

Diskisyon lo sa Mosyon dan mon pwennvi, i pa devret lo travayer etranze *versus* travayer Seselwa. Lapey ouswa reminerasyon travayer etranze, *versus* travayer Seselwa. Me i sipoze lo travayer ki pe travay dan Sesel dan Sesel dan sa *monde global*.

Fer ki travayer Seselwa i kapab vin osi konpetitiv e komann son pri li menm li lo marse lanplwa. Ozordi Lalwa Sesel i fer provizyon pou ki tou travayer ki dan Sesel, i ganny menm drwa.

Par egzanp Sesel in ratifye Konvansyon lorganizasyon Mondyal pou travay lo reminerasyon egal pou travay egal. Wi i vre ki sa Konvansyon i koz prensipalman lo reminerasyon egal ant zonm ek fanm. Me sa i en form labaz.

Si nou dakor ki ou ki ou lapey i pa devret baze lo ou sex, nou osi bezwen dakor ki i pa devret lo okenn lezot diskriminasyon dan lapey dan okenn landrwa travay. Si nou

annan menm kalifikasyon, nou travay menm erdtan, nou fer menm louvraz eksetera, eksetera, nou devret pe zwir menm saler e benefis.

Mon lopinyon lo sa i parey pou tou mon frer ek ser Seselwa Mr Speaker, akoz mwan osi mon rekonnet kapasite kapabilite tou mon frer ek ser Seselwa.

Zis get zistans Mr Speaker ki nou'n arive ekonomikman ozordi. E dan devlopman nou pei.

Si sa pep pa ti kapab parey bokou i dir, si sa pep Seselwa ozordi pa ti kapab nou pa ti pou la ozordi dan sa nivo devlopman kot nou'n arive.

Si nou osi regard sa militid travayer Seselwa, ki pe osi travay aletranze, ki pe fer bann louvraz dann bann diferan pei aletranze. E i annan ki lo *top* nivo. Sa nou rekonnet.

Mr Speaker prezan ki mannyer nou pou asire ki nou valoriz e met nou travayer Seselwa lo menm par avek sa etranze dan tou domenn. Parske se sa ki lesansyel Mosyon, e se sa ki mon krwar Mosyon pe sey demann Gouvernman.

Ozordi parey loter Mosyon in fer resorti boner, statistik i montre ki mazorite Seselwa i dan sekter prive. E nou konnen

ki i annan en serten letan sirtou par egzanp dan bann domenn lotelri, ti annan en nesesite.

Nou bezwen admet ti annan en nesesite pou kree bann *package*, bann *incentive* pou atir sa ki nou apel bann *knowhow*, bann leksperyans. E tou sa ki bann lafors travayer etranze ti anmenn Sesel dan bann diferan sekter e prensipalman dan *tourism*.

Be parey mon'n koz lo la pli boner Mr Speaker, nou sistenm ledikasyon ozordi i permet nou kree en lafors travayer tre kapab. E avek devlopman serten sekter nou lafors travayer i pa zis kapab an term ledikasyon, me in osi anmas leksperyans *over the years*, par egzanp depi tou sa letan ki nou'n fer Sekter Touris, Sekter Lapes, Sekter Finansyel, Lavyasyon Seselwa in osi anmas leksperyans.

Dan bokou lenstans ozordi, Seselwa i a menm nivo e dan serten ka pli o nivo ki sa etranze ki nou pe anmenn Sesel.

Mr Speaker prezan lot letap. Se asir egalite an tou travayer, *be it* ou etranze ou Seselwa. Ler nou fer sa Mr Speaker sa zafer *brain drain* ki nou koz lo la, pou mwan i pou vin en zafer lepase, *thing of the past*.

Akoz Mr Speaker? Sa ki sa dimoun i sey reserse dan mazorite ka, sa ki sa dimoun i al reserse laba deor, si nou kapab ganny sa byen sa dimoun i pou vwar li isi Sesel e i pou travay isi Sesel e i pou kontribye dan devlopman son pei. E sa i pa zis larzan. Larzan i enn.

Me i annan lezot keksoz ankor ki konekte ek kanmarad dan sosyete, ki pou fer sir ki sa travayer Seselwa i vwar li *happy* pou li reste Sesel, *happy* pou travay dan devlopman Sesel e non pa al kontribye *elsewhere*, akoz tou sa bann keksoz i tonm an plas, kondisyon sosyal, lakaz, transportasyon *you name it*.

So nou bezwen *strike a balance*. Ou konnen Mosyon i koz lo i koz en pti pe lo reminerasyon. Me nou bezwen get de la reminerasyon nou bezwen get bann lezot keksoz ki pou fer sir ki sa travayer Seselwa i *content*, i annan lakontantman avek son travay, son sityasyon lavi tou keksoz otour li ki fer li vin sa travayer prodiktiv.

Prezan Mr Speaker, nou ava kapab osi koz lo ranplasman travayer etranze dan plas zis anmenn travayer etranze isi Sesel.

Nou ava koz ranplasman travayer etranze par nou bann Seselwa ki'n kit Sesel ki'n al travay aletranze.

Zot ava kapab tournen avek sa bann lezot leksperyans zot in anmase zot ava kapab vin kontribye Sesel. Me parey mon'n dir larzan reminerasyon i enn dan bann fakter ki pou fer okenn dimoun ki deor tournen. I annan tout en kondisyon lanvironnman ki bezwen byen, ki bezwen *right* pou nou kapab *achieve* sa ki nou anvi. E fer sir ki travayer i *content*, i satisfè e i kapab vin prodiktiv.

Ler mon dir tousala Mr Speaker, ki son remed dan *short term*?

Parey mon'n dir mazorite travayer i dan sekter prive. *Now* ki mannyer ou regle sekter prive *short term*, pou fer li fer sir k ii donn sa legalite ant travayer Seselwa avek etranze? Nou bezwen annan nou en *framework*. Ou bezwen annou nou en *framework* ki ankadre nou bann travayer lokal Seselwa, *back* par Lalwa.

I bezwen *back* par Lalwa akoz sansan ou pou vwar ou kontinyen dan en sityasyon par egzantp ozordi nou annan nou *Localisation Policy* nou met an plas, me apre 3an - 4an sa anplwayer i kontinyen dir ou poudir sa dimoun pa bon,

ouswa in fer tout sord fason pou ki sa dimoun ler i ariv lan sa dimoun i fristre i sorti i ale. E li i kontinyen *enjoy* anmenn *foreigner*. I kontinyen *enjoy* i kontinyen dir ou Seselwa pa pe kapab delivre.

So nou bezwen *back* li *by law* e fer sir ki Seselwa avek etranze i vin *at par* kot i konsern premyerman son reminerasyon *basically* reminerasyon.

E osi son posibilite pou li pran plas sa etranze e evantyelman ler in anmas ase sa leksperyans.

Mon ava donn en pti legzanp Mr Speaker. si nou get pa tro lwen si nou al lanmen la UAE ozordi 89poursan lafors travayer UAE se bann *expat ok?* Nou tou nou'n al *Dubai, Abu Dhabi* nou konnen. Mazorite se bann *expat* ki travay.

Me par kont zot fer sir ki bann *Emirates* son *package* saler i enn ki reste ki dan benefis son sitwayen.

E ler mon pe get en pti zafer la, mon'n vwar ki bann *Emirati graduates* zot ganny en o poursantaz saler leve par lao bann *expatriate*.

So si zot, zot kapab fer sa atraver en *legal framework*, kwa ki anpes nou fer sa atraver en *legal framework?* Ou konpran?

So posibilite pou nou bouz devan pou nou rod bann nouvo fason fer, i annan petet ki ava dir i annan ki pe dir aköz nou pa ti fer avan.

Mon fek dir taler si nou kontinyen viv dan lepase la nou pou pri dan lepase, e Sesel pa pou bouze dan lefitir. Nou pou kontinyen pri dan lepase.

Mr Speaker nou bezwen koz osi dan lo redinamizasyon nou sistenm ledikasyon.

MR DEPUTY SPEAKER

Tyek letan tou.

HON WALLACE COSGROW

Mersi. Konman en solisyon lonterm Mr Speaker. Nou'n dir ki nou annan nou en bon sistenm ledikasyon pandan sa 40 ekek lannen. E mon koleg Onorab Loze in dir nou'n *train* dimoun pou li vann son 8 erdtan.

Me eski ozordi, nou pa devret revwar nou sistenm ledikasyon petet pa abandonn sa metod, sa prensip ki la, me *alongside* sa metod annou revwar ki mannyer nou kree antreprenner, teknisyen, dimoun avek *skill*, ki antre direk dan sa landrwa travay, *plug* laba i fer sa zafer e nou pa bezwen neserman anmenn etranze pou vin fer sa louvraz.

Ki *the trade* zot ganny sa *skill labour* ki zot bezwen, pou zot travay avek.

So sa pou mwan Mr Speaker *it's long term* e nou bezwen bouz dan sa direksyon. Pe enport lekel ki la, nou bezwen bouz dan sa direksyon redinamiz nou sistenm ledikasyon.

But pou mwan terminen Mr Speaker, eski Gouvernman ozordi i pare pou fer sa? Eski zot pare? Akoz nou konnen e souvandfwa in ganny dir poudir sa Gouvernman i en Gouvernman liberal e Gouvernman li okenn Gouvernman liberal pa an faver *framework*, Lalwa pou regle tou sa bann zafer. I dir *let the market decide itself*, desid son pri, desid son isi, desid son laba.

So eski malgre ki Onorab William in anmenn sa Mosyon ki mon santi petet mon krwar i dan bon lentansyon, me eski zot fason panse eski zot bann Polisi i pou les zot fer sa konman en Gouvernman liberal ki *practice* bann prensip liberal?

Mwan mon ti ava kontan arive. Ti ava kontan arive sa bann keksoz. Me eski nou pou vwar li arive?

Mr Speaker mon pou terminen an dizan ki ozordi Sesel nou tou nou anvi vwar

nou travayer Seselwa ti maksimonm benefis dan son landrwa travay; travayer Seselwa pe okip tou bann pozisyon enportan, kle dan landrwa travay. E travayer Seselwa i a latet prodiksyon e a latet devlopman pei.

Me lemonn in sanze. Keksoz i nepli parey i ti ete avan. Nou bezwen *be bold*. Nou bezwen pran bann desizyon ki bezwen ganny pran. Nou bezwen re-aziste serten keksoz pou nou bouz dan lot letap devlopman nou pei e fitir nou pei.

So avek sa Mr Speaker mon pou aret la. E mon krwar ki i en diskisyon ki nou devret kontinyen - pa zis neseserman dan Lasanble Nasyonal me en diskisyon ki bezwen ganny en kontinyen nasyonalman pou benefis tou travayer Seselwa. Mersi Mr Speaker.

MR DEPUTY SPEAKER

Mersi Onorab.

(APPLAUSE)

MR DEPUTY SPEAKER

Onorab Woodcock.

HON WAVEL WOODCOCK

Mersi Mr Speaker. Mr Speaker se nou pase ki enform nou lavenir. Se atraver bann

legzanp lepase ki nou kapab tir leson pou progresyon nou pei.

Sa Mosyon ki devan nou ozordi i en Mosyon ki pe get lavenir. I pe demann nou pou get larealite ki nou pei i ladan ozordi. E i pe *press* Gouvernman pou pran bann aksyon, pou adres defi bann defi ki egzistan ozordi.

E kontrerman avek sa ki Onorab avan mon in dir bann liberal zot, zot krwar dan *progressive reform*.

Nou pa krwar dan regresyon. Nou pran bann legzanp bann fot lepase, nou aprann e nou rod bann manner fason. Pli bon modalite pou nou anmenn nou pei pou nou pran desizyon ki pou anmenn nou pei pli devan.

I size ki devan nou ozordi, i pa en size ki fek konmanse ozordi ki nou fek leve bomaten sa size soudennman in aparet.

Disparite ant saler Seselwa e etranze, menm si en etranze ouswa pe fer menm louveraz en etranz e pe ganny bokou plis ki sa Seselwa, sa i pa en zafer ki nouvo. Nou'n legzanp in vin dan sa Lasanble dan Lasanble lepase. Mon krwar sa depi bann Lasanble oparavan. *In fact* dan sizyenm Lasanble nou'n adres sa size.

Me malgre ki nanryen pa'n ganny fer. Napa okenn aksyon

ki'n ganny pran tanzib pou *deal* ek sa size.

Nou'n tann konplent dan lepase kot en *teacher* ki sorti aletranze ki ganny li bokou plis ki en *teacher* lokal menm si zot pe fer menm louveraz. E nou'n vwar sa dan sekter piblik. Nou'n osi vwar dan sekter Gouvernman dan *tourism sectors* kot nou ganny bann plizyer bann konplent sorti kot bann Seselwa ki travay dan plizyer bann letablisman touristik.

I sagrinan Mr Speaker ki ennler nou menm nou Seselwa, nou pa valoriz nou dimoun ase. E bokou fwa nou tant pou met lanfaz plis lo etranze.

E i osi malere Mr Speaker ki menm si nou, nou pa valoriz nou prop dimoun - parey i annan en vers dan labib ki dir en profet pa zanmen ganny rekonnet dan son prop vilaz.

E leka pou nou Seselwa, kot ennler nou pa met ase lanfaz nou pa valoriz nou dimoun ase. Me ler nou Seselwa nou bouz aletranze, nou ganny bokou en kantite laport i ouver pou nou, nou vwar nou bouze, nou vwar nou pran bann pozisyon.

Zisteman bomaten nou fek tann Onorab Mondon koz lo en pozisyon ki i fek pran pou en

pti parey Sesel pou pran en pozisyon pou li vin Prezidan *Caucus Les L’Afrique*. I pa en pti *feat*.

Me selman petet sa bann loportinite i pa ganny afordab avek Seselwa akoz nou menm nou petet nou pa valoriz nou dimoun ase e sa i en keksoz ki nou Gouvernman i merit fer ozordi.

Apres ki nou pei in pas dan bokou difikilte, sirtou nou tou nou konnen atraver e bann lezot kriz mondyal, nou Lasanble ozordi Mr Speaker nou’n anmenn en Mosyon pou demande ki nou reget *package*, nou reget saler, nou re ankadre nou bann t travayer Sesel, reget saler ki zot gannyen a *oppose* sa ki bann etranze i gannyen.

E i enportan Mr Speaker ki nou sitye nou kot nou ti ete avan e kot nou ete ozordi. Fodre nou pa bliye poudir Mr Speaker nou konman en pti pei Sesel, nou’n sorti vreman, vreman lwen. Dan mwens ki 2an pase nou pei ti pe fer fas avek *mass redundancies, unemployment*.

E la ozordi nou Gouvernman pe koz lo anbank en reform dan en revizyon nou *salary grid* ki pou vin an fors an 2003.

E deza nou Gouvernman akoz lafason ki nou’n zer nou

lekonomi, nou’n refer nou pe, i ozordi nou Gouvernman i kapab pe donn en pti logmantasyon en pti lasistans R500 bann ki pe ganny en saler R8500 ouswa pli ba.

E en revizyon konpreansiv pe vini dan nou *salary grid* pou 2023. Konmsi i montre en pti pe poudir nou pe get dan progresyon nou pei.

Nou konnen kot nou sorti. Nou konnen kot nou ete ozordi. E nou annan en direksyon kot nou anvi ale konman en pei.

Trezyenm mwan saler kantite deba ki’n ganny souleve dan nou Lasanble kot malerezman dan nou letan difisil nou pa’n kapab Gouvernman pa’n kapab donner menm sekter prive ki ti ater konpletman. E la ozordi i annan bann desizyon ki’n ganny pran ki 50poursan trezyenm mwan saler pou ganny peye e sa lot 50poursan pou baze lo en *result base management*, pou ede pou fer ki tou travayer dan sekter prive e osi menm dan sekter piblik i vin pli performan.

Mr Speaker, ozordi nou pe koz lo annan en bon saler ki nou ti ava kontan ki nou tou ozordi nou vwar nou pe ganny en bon saler, ki nou ti ava kontan vwar Seselwa ranplas bann etranze. Nou ti ava

kontan vwar bann pozisyon pli enportan pli kle dan lanplwa dan Gouvernman, dan sekter piblik.

Me i enportan osi Mr Speaker ki bann zenn osi nou pran nou responsabilite. Ki nou bann etidyan i pli serye dan zot letid skoler.

E Mr Speaker i fer mon mazin ozordi Mr Speaker kot bann zenn ki i annan en loportinite egal, pou fer zot *IGCSE* ozordi i annan en *selection exam S4* ou bezwen ganny ou zis 30poursan, ozordi pou ou kapab fer ou *IGCSE free of charge* ou pa bezwen pey nanryen.

E mwan mon rapel mon letan ler mwan mon ti *NYS*, ou ti bezwen mon krwar pas mark ti 55 a 60poursan, ozordi in desann 30poursan pou kapab fer en *IGCSE*.

Menm si i annan en let ki pe ganny sirkile mal apropro bann politik bon marse ki pe ganny fer, nou tou nou konnen poudir *IGCSE* Sesel i *free* pou tou zanfan tou etidyan ki nobor ganny son *pass mark* 40poursan, a leksepsyon bann ki bann *mature student* ki al *SIDOL* sa i en lot zistwar.

Nou Gouvernman in met tou a dispozisyon ozordi, pou sey ed nou zenn aköz letap difisil ki nou'n pas ladan, nou

bann zanfan ozordi pou ganny goute, bann zanfan pou ganny goute, pou ganny dezennen. Segonder zot osi zot pou ganny zot goute.

I annan ki ti dir pou donn goute apre zot in kit dan semen. Me ozordi i annan bann desizyon ki pe ganny fer. Tousala pou ed nou zenn devlope pou ariv lo en nivo pou zot kapab epanouir, e monte e progrese dan zot karyer dan zot lavenir.

Pli gro defayans kot nou vwar Mr Speaker, ki bann konplent kot i konsern *disparity* in vin sirtou kot i konsern lendistri touris, kot menm bann konplent i sorti kot plizyer fwa bann dimoun dan bann *GM* ouswa bann ki dan Lotorite dan bann letablisman touristik, zot tant pou favoriz zot zanmi, zot fanmir zot fer faver zot bann dalon.

E parey i annan Manm lo lot kote latap osi in fer sorti sa plan lenportans. E parey i annan Manm lo lot kote latap osi in fer sorti sa plan lenportans i annan en *succession plan* pou ranplas sa bann dimoun dan bann diferan pozisyon kle dan bann letablisman touristik.

E menm dan bann lezot lanplwa, i enportan ki i annan en *succession plan* pou donn

loportinite bann Seselwa, pou pran sa bann pozisyon, ler sa bann pozisyon ler sa bann etranze ale; en keksoz ki petet napa ase lanfaz in ganny mete dan lepase me ki nou bezwen kree plis lanfaz ozordi.

Mr Speaker parey mon'n dir i enportan pou nou ankouraz laprantisaz devlopman nou zanfana. E parey mon krwar Onorab Naidu in koz lo ANHRD osi i annan en rol enportan pou zwe, lo *development plan* nou pei, lo donn met an plas ok bann fasilite *scholarship* pour bann kad pour bann pozisyon, pour bann *field* ki petet nou napa ase Seselwa ki pe *venture* ladan, ki nou bezwen depan lo etranze.

Sa i en keksoz ANHRD i bezwen get ladan. E i enportan osi pou note Mr Speaker, fodre ler nou pe get dan devlopman nou bann zenn, nou profesyonnel i enportan ki nou osi nou get en lizye pre lo nou bann zenn, nou bann etidyan Praslin - La Digue. Onorab Samynadin in koz en pe lo la.

E i enportan pou nou get lo devlopman osi bann zenn lo Praslin - La Digue, par lefe ki mon santi poudir nou bezwen pous en pti pe plis pou devlop nou bann zenn Zil Pros.

E parey bann zenn ki vin lekol e i vin etidye lo Mahe

ozordi, en konsern ki *in fact* pou 20an napa gran amelyorasyon ki'n arive. *Allowance* in toultan vremen ba. E i en konsern avek lenformasyon ozordi kou lavi ki'n monte, akouz lenflasyon parey bann faktor enternasyonal ki'n afekte nou. COVID e lezot ankor.

Bann zenn ki vin possegonder Mahe zot vwar zot pe vremen *struggle* ozordi, e i malere ki i annan en bann ki ozordi zot pe dekouraze pou zot vin etidye Mahe. E i annan menm paran pe vwar li difisil pou anvoy zot zanfana vin etidye Mahe akouz sa *allowance* ki zot pe gannyen. Mazinen manrmay *youth hostel* ozordi pe ganny en *allowance* R1200.

Mwan 20an pase ler mon ti *youth hostel* mon ti ganny mwan en *allowance* R800. Dan lespas in mont par selman R400.

E ozordi avek sa sityasyon ki nou ladan ozordi, i enportan pou nou get dan lentere nou bann zenn lo Praslin ek La Digue ki pe vin etidye Mahe ki pe ganny en *allowance* ki sitan ba, e sa i pou *cater* pou tou zot kou pou aste zot manze pou zot bann *utilities*, pou zot bann *house hold item* ki zot bezwen kot zot pe reste *hostel*.

E menm si zot pe reste kot en dimoun i annan en kou ki

involve, e sa i en keksoz ki nou Gouvernman i bezwen gete i bezwen get dan lentere nou bann zenn ki vin etidye lo Mahe.

Si nou anvi vwar larelev osi lo Praslin avek bann zenn avek bann nivo ase eleve, pou pran bann pozisyon, pran plas bann etranze ki pe travay lo zil.

Onorab Ernesta in koz lo valoriz nou bann profesyonnel, nou bann travayer, me i malere Mr Speaker poudir dan lepase petet en fot ki sa Gouvernman in fer e enn pti admet en Manm ti admet dan sizyenm Lasanble ki zot in tro get zot dan lepase. Kot ti annan tro bokou' ek nou pa ek nou. ‘

Kot konmsi bokou bann zenn bann dimoun pa'n ganny sa loportinite pou zot bouz devan. Zot in ganny sere, zot in ganny anmare. E sa in nou'n vwar menm atraver bann dimoun ki'n dan zot kote ki'n travay avek zot. Annefe loter Mosyon i enn ki mon ti sagren mon rapel sistenm Lasanble ler i ti lo *IPU* ti pe fer en bon travay, zis akoz en diferans lopinyon, zot ti met li a kote.

Konmsi i montre valorize i konmans avek nou premye. Nou bezwen konmans valoriz nou dimoun ki avek nou, avan ler nou valoriz dimoun ki an deor.

E ozordi si ou gete dan Gouvernman ozordi, i annan menm bann manm ki lo zot Komite Santral i annan bann pozisyon kle dan Gouvernman ozordi ki lontan i pa ti pou leka.

Akoz lontan si mon ti annan en lopinyon politik, ouswa mon ki ti Gouvernman ou pou ganny koudpye mon ti krwar mon deor.

E sa i bann keksoz ki nou pe sey tire dan nou Gouvernman pou donn loportinite tou dimoun - Sesel i pou tou son zanzan. Nou tou nou travay nou perform *at the best of our abilities* e loportinite i la pou nou. Sa i direksyon ki nou Gouvernman pe gete pou nou ale pour lefitir.

Sa zisteman saler ki Gouvernman in propoze, i annan lakonpanyen dan sekter piblik Mr Speaker la ki'n pare pou donn sa logmantasyon e zot in menm dir avek Gouvernman ki zot pou donn sa logmantasyon sa ki Gouvernman i bezwen donner zot, zot pare pou fer li.

E sa i egzampler. Sa i en legzanp ki lezot lakonpanyen i kapab swiv zot pe solider avek zot travayer, zot pe solider avek Lepep Seselwa. E i annan serten sekter ozordi Mr Speaker ki pe fer ase byen ki zot biznes

pe ganny ase reveni, pe fer byen pe fer profi.

E i enportan pou zot get bann kondisyon ki zot pe donn zot travayer si zot pe fer byen pas en pe sa benefis osi lo zot travayer.

E zisteman i annan bann lakonpanyen ki'n benefisyé anba *FA4JR* zot in ganny *tax break* avek nou Gouvernman, zot biznes in refer. E la i sa letan ozordi Mr Speaker, pou rekonpans zot travayer pou annan konpasyon pou zot travayer, ki ozordi petet i pe pas dan en sityasyon ase difisil avek sa kou lenflasyon ki pa non selman Sesel, me ki pe ki partou dan lemonn.

I malere Mr Speaker ki dan lepase in annan bokou labi osi dan *FA4JR*, kot nou ti vwar bann lakonpanyen ti donn bann fo deklarasyon, fo *payroll*, i annan ki' ganny peye 10 fwa.

R1.4 bilyon ekek ti ganny depanse e i annan bann biznes ki pa ti merit ganny asiste, in ganny asiste. Tousala i bann labi wi in arive dan *watch* Gouvernman avan. Me nou okenn lasistans, *Grant*, larzan ki ou pou donner *loan* nou bezwen fer sir i ganny fer dan en fason ki byen ki drwat, nou servi *rule of law*. Sa ki bann parti liberal i krwar ladan nou krwar *the rule of law* e pou fer

sir ki napa bann labi ki arive ankor.

Pou konklir Mr Speaker, mon pou al lo en keksoz ki Onorab Ernesta in koz lo la. in koz lo revizyon *Employment Act* e revizyon *Employment Act* nou tou nou konnen poudir i en keksoz ki lo enn bann *main* priorite. I lo azanda nou Gouvernman aktyel me i enportan pou note Mr Speaker ki sa *Act* i n vin an fors depi 1995.

E zanmen in annan en revizyon en revizyon konpreansiv lo sa. Menm si ozordi mon tann en Manm lot kote latab pe koz lo reviz sa *Act* me mazine depi 1995 sa *Act* i la.

E si mon pa tronpe Onorab Cosgrow sa letan i osi pou en peryod letan in Minis Lanplwa, e mon pa'n vwar revizyon okenn revizyon tanzib dan *Employment Act!*

E la i plis ki ler pou reviz sa *Act* Mr Speaker pou fer sir ki i azour avek sa letan ki nou ladan ozordi, pou donn maksimonm benefis bann travayer Seselwa ozordi.

E mon bezwen dir Mr Speaker i byen rar sa mon dir en keksoz koumsa, me mwan Mr Speaker mon pou siport en keksoz ki Onorab Loze in dir. Kot in koz kot nou bezwen donn

plis *Grants*. Donn plis *Grant* ouswa fasilite *loan* pou ankouraz bann biznes Sesel.

Me Mr Speaker i enportan note poudir sa bann keksoz in egziste zis dan lepase.

Anba *ESA* - avan *SENPA* apre *ESA* ti annan bann *Grant* ki ti ganny donnen 50 mil 100mil Roup.

Me ki nou'n vwar labi i tro bokou. Politik ti antre ladan. I annan ki'n ganny sa bann larzan in aste loto, in fer *shopping* in al *Dubai* in al sepa ki bor. Zot pa'n servi sa bann larzan byen.

E nou menm vwar osi lo kote *loan* ki'n donnen *SBFA* i legzanp tipik kot *loan* i ganny donnen. *Loan* in ganny *write-off* bann dimoun ki pa egziste in ganny *loan*.

Tousala wi nou dir donnen. Me selman i enportan ki nou pa fer parey Gouvernman presedan, nou pa fer parey keksoz ti deroule avan. Si nou pou donn *Grant* nou bezwen fer sir sa *Grant* i al anver bann pti lantreprenner, ouswa bann biznes ki pou servi li byen pou ede, devlop son biznes e kree lanplwa ki bann zenn Seselwa i kapab antre ladan.

Nou tou nou pare pou investir. Nou tou i nou anvi

vwar plis lenvestisman dan nou zenn dan nou Seselwa ozordi.

Me selman i enportan ki nou fer keksoz dan en fason ki byen kot napa labi, kot napa vol, kot napa koripsyon kot sa larzan ki nou Gouvernman i fer *available* atraver *Grant* atraver *loan*, i al kot i merit ale pou ed bann biznes bann zenn antreprenner Seselwa.

Avek sa de mo Mr Speaker mon pou siport sa Mosyon ki Onorab William i met devan sa Lasanble, akoz mon krwar i en Mosyon ki pou sa letan ki nou ladan ozordi. E pou ed nou pei bouz pli devan. Mon dir ou mersi Mr Speaker.

MR DEPUTY SPEAKER

Mersi Onorab. Mon a pas laparol avek Onorab Vidot.

HON AUDREY VIDOT

Mersi Mr Speaker. Bonn apre midi Mr Speaker tou Manm Onorab, tou dimoun ki a lekout, zabitan Roche Caiman en bonzour spesyal osi pou bann travayer Seselwa.

Mr Speaker levidans i la pou antre ki diran sa 45an devlopman imen Sesel in enn ki'n anmenn bokou zistis pou Seselwa. Espesyalman kot i konsern ledikasyon de kalite e iniversel, san bliy sa levantay kreasyon lanplwa. Se avek

fyerte ki nou vwar nou bann zenn ozordi ankor pe zwir bann lenfrastruktir ek lantrennman pli avanse avek sipor e langazman nou bann ansenyan byen ankadre. E zis zet en regar lo nou bann lenstitisyon lorganizasyon, Lazans ek Departman servis piblik e prive.

Nou pou kapab obzerv e rekonnet sa kantite profesyonnel ek travayer byen ankadre ki sistenm *SPUP/SPPF/Parti Lepep e United Seychelles* in kree atraver son bann Polisi e program ki'n asir egalite dan nou loportinite pou Seselwa.

Zis regard dan nou Lasanble Nasyonal e son Sekretarya ozordi levidans i la si menm si i annan pa tro kontan ler nou lo sa kote latab nou koz lo lakonplisman. Se pourtan nou tou dan en fason ou en lot nou benefisyè.

Mr Speaker Gouvernman in dir zour i annan en responsabilite pou kontinyen fer tou posib pou ki nou bann lenstitisyon edikasyonnel i perform pli byen avek bann ansenyan byen okipe e pli efektiv.

Mon lans en lapel avek mon bann koleg, mon bann ansyen koleg ki ozordi zot dan Egzekitiv e ki ti donn lanmen donn sipor nou bann ansenyan

desann lo semen kot baro *State House*, pou ozordi dan Egzekitiv pou montre kontinite pou kree plis loportinite ek sipor pou bann ansenyan, ed zot pou prodwir sa sosyete kot i annan bon sitwayen e profesyonnel ki pou bezwen pou ranplas bann etranze dan nou pei.

Sa sipor ek loportinite i bezwen osi aplik pou lezot kad profesyon e kreasyon lanplwa pou nou pep.

Nou Seselwa i bezwen bouz dan bann *skill* e sipor dan bann lendistri afen ki zot kapab ganny sa leksperyans nesese e kot personn pa ganny kit deryer.

Bomaten mon koleg pou distrik Rivièrè Anglaise in *remind* nou ki Seselwa in vot pou sanzman. Seselwa dan sa dernyen 21 mwan apre ki zot in vot in tann koz plis lo plan Gouvernman.

Me zot ankor pe espere vwar aksyon dan lenplimantasyon sa bann plan.

Mr Speaker si nou pe rod zistis *salary package* pou nou travayer Seselwa espesyalman bann ki i annan sa disparite ant travayer Seselwa ek etranze, Gouvernman i merit regard dan en Lalwa kot i garanti lapey egal pou travayer, egal dan sekter prive.

E annan en Polisi ki kapab asire ki en Seselwa avek menm kalifikasyon ki en etranze, e ki fer menm louvraz dan menm letablisman avek li i ganny menm saler debaz.

Dan pei nou, nou annan Seselwa byen kalifye ki pare pou ansenny nou bann Seselwa pou ranplas etranze. Me zot bezwen ganny sipor neserer avek Gouvernman.

Alors i bezwen annan plis sinerzi pou met presyon dan serten sa bann lorganizasyon ou lendistri, pou donn nou Seselwa ki merite dan son plas travay.

Mr Speaker Gouvernman pa pe ase transparan lo sa bann mekanizm e program, ki sipoze met lanfaz lo kiltir lentegrite profesyonnalizm ek lonnekte dan travay.

Zot kouraz, zot koz ankor lo bon servis e devlopman karyer selman. Travayer pa pe ganny rekonnet.

E zot in pran zot zis 21 mwan pou koz lo diferan striktir. Si in pran zot zis 21 mwan pou koze, zot travayer Seselwa e dir ki zot bezwen ganny rekonnet.

Si zot pe dir zot, zot pou ganny rekonnet lo baz performans, legzanp i bezwen konmans avek sa ki dirize parey mon koleg Onorab Wavel

Woodcock in fer resorti atraver ou Mr Speaker.

E la mon pou donn en senp pti legzanp parey li osi in donn.

Pran legzanp lo son Gouvernman. Bann Minis i dir avek Seselwa annan en kiltir travay dir.

Selman sa travay Seselwa ki'n li in pas plis letan, dan son landrwa travay ki Minis ankor pe donn li tou e fer sakrifis.

I pa son dernyen i pas pou dernyen ler i pe ganny konpliment son zefor ki li ki'n travay.

Kontrerman avek li Minis, in okip son lekor ava li. Son donn son lekor son pti *allowance* palto, pou li fer son pti *check up*. Pou li kapab organiz son pti *allowance* lakaz.

Aprè i dir avek Seselwa pou ou pou vin firanmezir e tanporer. Alors si nou pe koz Lasanble Nasyonal pe donn Gouvernman pou koriz sa lenzistis dan revizyon saler, Lasanble i bezwen osi pe demann Gouvernman dizour pou arete avek sa kalite lenzistis ki pe arive dan nou pei ozordi.

Akoz pa sa sanzman ki zot ti vote atraver ou Mr Speaker, mon oule pas avek mon koleg Onorab Labonte.

Si nou pe dir avek travayer Seselwa pou donn plis zot kouraz, an servi mwens, bann Minis osi i bezwen donn plis zot kouraz e koup mwens dan sa bann depans ekstravagans.

Pratik sa ki zot presye. E arete vin diktater avek dimoun pou dir ek zot fer sa ki zot, zot dir e pa fer sa ki zot bann Minis i fer.

Dirizan i merit pe donn legzanp parey dikton i dir '*lead by example*'.

Si nou pe koz en sel langaz pou promot kiltir travay dir i bezwen aplik anler pou dekoul anba. Sa i osi aplik pou serten sekter prive.

Zot pa kapab dir travayer napa larzan pou rekonnet zot travay dir, selman etranze ki vin aprann ek Seselwa ki pou ganny plis larzan ek lezot benefis.

Oubyen ou pou vwar *Management* pou donn bal avek serten privez ki zot gannyen, san pran kont sakrifis ki lezot zot bann kad travayer ki pli ba dan zot striktir lorganizasyon pe fer sakrifis pou fer zot zwir sa bann benefis.

Mr Speaker si Gouvernman pe vin avek en kontra performans pou konpliment revizyon saler travayer, zot bezwen annan en sistenm fer Bidze dapre

performans, pou elazir dan tou letablisman Gouvernman pou asire ki larzan piblik i ganny byen servi. Ki dimoun i kapab rann kont. E ki bann resours i ganny byen zere.

Par kont nou swete ki sa kontra performans pa vin en zouti pou serten endividi ki ankor pe abiz son pouvwar, pou li penaliz son kanmarad aköz li i annan en rezon personnel avek sa dimoun.

Sa osi i pou aplik pou trezyenm mwan saler ki'n ganny anvoye lannen de lannen konsektiv nou pa swete vwar travayer ki'n travay ki'n donn tou pou pa ganny son *full* trezyenm mwan aköz malis. Pliferans oubyen sa dimoun i zis termin son lanplwa, aköz i pa'n anvi donn sa travayer son Trezyenm Mwan. E sa bann kalite latitid ankor pe arive.

Annou pa krwar i zis lepase. I ankor pe arive. E dan sekter prive osi en kantite nou bann travayer Seselwa pe pas dan sa bann difikilte.

I pou enportan ki travayer i kontinyelman ganny edike lo zot drwa e responsabilite.

Sa i kapab ganny fer atraver sa bann mekanizm apropiye ek en meyer partenarya ant sekter prive ek sekter piblik.

Nou bezwen son pe kontinyen promouvwar sa reprezantasyon legal apropiye pou sofgard drwa nou travayer.

E nou Lasanble Nasyonal nou pou kontinyen met lanfaz dan endik travayer lo zot drwa e responsabilite atraver nou bann deliberasyon. E ankouraz travayer Seselwa pou gard sa kiltir travay dir ek en bon konportman etik dan travay.

E parey mon'n dir i bezwen konmans anler pou de-koul anba.

Mr Speaker sa Mosyon ki devan nou ozordi i annan son merit. En lalit pou rekonnèt nou bann Seselwa ki pe travay ki swa dan sekter prive ek piblik, pou ki zot ganny le meyer loportinite dan nou pti pei - dan son prop pei. Me mon oule met lo rikord ki nou pa kont travayer etranze dan sa pei. Nou konnen ki nou bezwen travayer etranze pou konplimant bann pozisyon travay ki mank travayer Seselwa kalifye. Par kont i annan Seselwa nou bezwen donn zot bagaz ek loportinite pou okip bann pozisyon ki sa bann etranze i okipe dan nou pei.

Nou oule arete vwar sa pratik kot Seselwa i pe montre etranze travay pou etranze okip pozisyon ki li ki merite.

Nou annan bokou zenn ki ler i fini segonder i pa ganny post segonder. Menm si i *appeal* i pa gannyen.

I annan ki pa menm ganny okenn loportinite dan bann program ki lanplwa i ankor pe ofer.

E la mon mazin bann zenn ki lo bann program *TIVET*. Akoz ki napa en program en fason ki Gouvernman i kapab antre ankor plis partenarya avek prive, pou ki nou ava donn loportinite sa bann zenn ki pa ganny lekol, pou zot antre dan en travay - omwen si zot pa ganny en *full* saler me konman parey en *allowance*, ki a permet zot ganny serten leksperyans e pou zot kapab ganny anploye e ranplas bann etranze.

Mr Speaker mwan mon'n dir mon pou aport mon sipor pour sa Mosyon, alors mon pou demann avek Seselwa ki pe don tou pou pa bes lebra. Pa bes lebra, akoz nou konnen poudir i annan en kantite zot ki pe fer en kantite sakrifis.

E nou dir zot mersi. Mersi pou annan sa kouraz pe enport sa presyon lavi ki zot annan ozordi, zot leve zot al travay.

Al travay pou sonny zot fanmir e pey zot det. Me zot pa kapab zis travay, travay pou nanryen.

Alors i enportan ki nou bann Seselwa i ganny valorize pou zot kontribisyon, pou zot zefor ki zot donnen dan travay.

Ankor mon pou fer resorti si nou anvi donn bon legzanp i bezwen konmans avek nou.

Annou arete sa sistenm kot nou get nou anler, me nou bliye poudir sa ki anba laba, ki donn nou sa sipor ki donn nou tou sa bann loportinite.

Nou bezwen valoriz zefor ki sakenn travayer Seselwa i kontribye dan sa lekonomi Sesel. Mersi Mr Speaker.

MR DEPUTY SPEAKER

Mersi Onorab. In ariv zis ler pou nou pran *tea break* letan nou retournen i reste nou ankor *plus* avek entervenans ki pou fer son *Right of Reply* - 6 entervenans ki pou anmenn nou pres 6er.

So mon ti ava demande ki *unless* nou pare pou travay ziske sa ler. Me si non get ler nou entervansyon e fer le pwen. Nou ava *break* ziska 4er. Mersi.

(BREAK)

MR DEPUTY SPEAKER

Bonn apre midi, *welcome back*.

Nou kontinyen avek deba lo Mosyon par Onorab Waven William.

Prosenman lo mon lalis se Onorab Porice.

HON DOYACE PORICE

Mersi Mr Speaker. Bonn apre midi tou mon bann koleg MNAs tou dimoun ki a lekout.

Mr Speaker sa Mosyon anmennen par Onorab William in vin dan en moman apropiye kot pei i dan en transformasyon signifikan, kot nou'n temwannou pei Sesel kot in sorti pandan sa 2an e la kot i ete e kot nou pe ale pou benefis tou Seselwa.

Lepase e menm konmela nou pe vwar bokou sa bann problem *salary package*. Diferans ant etranze ek Seselwa. Kot menm i annan etranze ki pa neserman i konn fer sa travay, oubyen annan leksperyans ladan pou li ganny sa saler an plis ki Seselwa.

Nou'n vwar ki menm travayer Seselwa pe bezwen montre sa etranze serten travay, me sa etranze pe ganny plis larzan lo zot saler ki en Seselwa. Eski sa i byen?

I annan en bann lannen sa zafer pe deroule dan nou pti pei Sesel.

Me zanmen in ganny adrese par Gouvernman ki'n diriz nou pei oparavan e nou travayer Seselwa in toultan konplent.

Me zot lavwa pa'n zanmen ganny ekoute. Se sa ki ozordi sa Mosyon in vini. Pou sa nouvo Gouvernman ekout lavwa nou Seselwa.

Mr Speaker alor nou ti ava kontan ki ler bann Lazans ouswa Minister i mazin pou anploy nenport travayer etranze pou get byen zot kalifikasyon. E fer sir ki sa travayer i pe donn sa vre sertifika. Mon repete sa vre sertifika.

E ki kalifye dan sa travay. Akoz mon dir sa? Set akoz pou zot pa vin anbaras serten nou bann travayer Seselwa ki vreman konpetan e osi kalifye pou sa menm travay ki sa etranze pe vin fer.

Nou'n tande e osi vwar sa bann tel problem ki'n arive dan plizyer landrwa travay.

Nou konnen ki Sesel Mr Speaker, nou bezwen etranze dan sekter Gouvernman e osi prive.

Me nou santi ki i annan osi sa travayer Seselwa ki kapab fer serten travay ki sa etranze i fer.

Alor nou santi ki sa travayer Seselwa, i kapab ganny en pe sa saler ki etranze

i gannyen, apard ki zot lozman ek bann *allowance* an plis. Nou konnen ki lakonpanyen prive zot depan bokou lo travayer etranze. Me nou sipliy ek zot pou get nou Seselwa osi.

Mr Speaker i menm annan etranze ki pe reste aletranze, pe ganny en lapel pou travay pou Sesel. I en gro lapey, kot la Gouvernman ozordi pou bezwen get ladan. Akoz sa i byen lontan pe ganny deroule.

I pa neserman tou kalite travay ou metye ki bezwen ganny revize. Me dan lotel serten Minister lezot sekter prive.

Me parey konstriksyon i diferan lezot travay akoz nou bezwen bokou lezot travay akoz sa travay i bezwen bokou dan Sesel atraver bokou konstriksyon ki e ganny fer.

Travayer Pralinwaz osi pa pe ganny eparye, kot plizyer ki mon'n zwenn pe konplent ek mwan. E zot pe vreman dezapwente akoz zot donn tou dan travay. Me zot lapey i reste parey zis etranze ki benefisyé,

Zis parey mon zanmi Josianne, Pamela, Roddy pe rankontre dan lotel aktyelman.

Pa zis lotel Mr Speaker, osi dan landrwa Ministryel i annan sa problem kot nou'n v war etranze pe ganny saler plis ki travayer Seselwa.

Nou annan bokou Seselwa ki annan bon kalifikasyon travay. E zot merit pe ganny zot saler.

Nou pa dir ki nou travayer etranze pa konn travay i annan ki vremen kalifye. Me i annan osi ki napa sa kalifikasyon. Zis zot ganny mete dan travay e ganny en pozisyon kle. La kot Seselwa ki dan sa lanplwa i bezwen vwar li pe fer tou.

Gouvernman Mr Speaker pou bezwen revwar tou nou Seselwa ki pe pas dan sa tel difikilte. E donn zot saler ki zot merite.

E revwar bann travayer etranze ki pe travay Sesel si vremen zot bezwen ranplas Seselwa. E ganny plis saler ki nou Seselwa.

Se sa ki sa Mosyon pe demande. Alor avek sa de mo mon pou donn mon sipor sa Mosyon. Mersi.

MR DEPUTY SPEAKER

Mersi Onorab prosen lo lalis Onorab Aglae.

HON EGBERT AGLAE

Mersi Mr Speaker. Bonn apre midi tou dimoun a lekout e tou Manm Onorab.

Mr Speaker Mosyon ki la devan nou, si mon ti pou met en tenm avek sa Mosyon, se met konfyans dan travayer Seselwa.

Sa, ti pou sa tenm. Mr Speaker Mosyon pe demann en revizyon dan serten lenzistis ki antase avek revizyon saler pou ankouraz bann sekter bann ki enkli sekter prive dan sa legzersis.

E pour mwan Mr Speaker sa demann i enn bann mayon ki enportan, me i pa sel solisyon ki pou rezourd sa problem dan sa inegalite ki annan avek disparite ant saler en etranze e en Seselwa ki pe fer menm kalite travay.

Mon dir sa Mr Speaker aköz in annan bann sirkonstans enportan ki'n arive dan lepase pou nou kapab konpran ki mannyer nou'n ariv a sa pwen la ozordi.

Enn bann eleman ki mon santi ki nou bezwen osi adrese, atase avek sa size, se en *change of mindset* lo lafason ki nou portre en travayer Seselwa fas a en travayer etranze. E nou tou nou konn nou listwar byen dan lepase depi apre Lendependans e apre ki nou'n sorti anba kolonizasyon.

Bann travay ki ti disponib pou Seselwa sa bann letan aköz nou konnen poudir pei ti dan en kalite, mon kapab dir lamizer ti napa gran, gran modernizasyon, ouswa gran devlopman pou ofer en gran

varyasyon ouswa en gran *pool of kalite* travay.

Nou tou nou konnen bann travay sete bokou pou fer avek travay fizik, dir, labourer, kot nou ti annan bokou ki ti pe travay dan domenn konstriksiyon, ti annan ti lo plantasyon, ti annan ti pe travay avek bann koman nennenn avek bann, mon pa anvi servi sa term bann gran dimoun mon kapab dir.

E pour mwan Mr Speaker sa bann moman letan i bann moman ki ti mark en peryod lapovrete dan pei e pe de nou Seselwa ki ti ganny sans perse avek sa nivo ledikasyon pou zot kapab al dan bann profesyon ki en pe pli akademik mon kapab dir, swa ou ti pou planter osi swa ou ti pou peser.

Me avek modernizasyon, avek labolisyon ki'n arive nou'n war poudir Seselwa in ganny bann diferan loportinite pou zot kapab met nou en pti pe pli azour avek lemonn ouver, global pou kapab antre firanmezir ki devlopman ti pe antre dan pei. E nou zenn Seselwa avek sistenm ledikasyon ki ti modernize, ti ganny bann diferan loportinite pou pouse, pou oz zot nivo ledikasyon e avek bi ganny en travay en pti pe pli akademik.

E se la ki semen in komans ou ver pou nou kapab annan bann diferan profesyonnel, ki ozordi i egziste e nou bezwen konpran sa tre byen. Me dan sa parkour Mr Speaker mon kapab dir ki poudir a en pwen ti annan son merit pou mon pou kapab annan, nou bann zenn enzenyer, nou bann pilot, nou bann dokter, nou bann profesyonnel ners, nou bann ansennyan, bann diferan profesyon akademik ki ozordi i egziste.

E dan sa parkour petet mwan mon pou dir in annan dan en fason kot nou pa'n neserman get deryer en pti gin an mezir ki nou pe al de lavan.

Mon dir sa aköz sirtou avek lekol ozordi e dan mon letan kot nou ti ganny pouse pou al ver bann travay akademik ki byen. E la nou tant pou neglig en pe bann travay ki annan bann konponan fizik parey mason, sarpantye, e bann metye ki ozordi ki nou war en sekter ki parey konstriksiyon ki nou war plis bann etranze ki ladan.

E sa se en sekter ki anmenn plis devlopman dan pei e nou pa war byen, byen Seselwa. So ler mon dir poudir nou'n kit en bout deryer e nou'n

tay avek en bout devan, se la kot keksoz in pa'n neseserman pe mars dan nou faver, e sa ki nou pe rekolte ozordi avek sa gran kantite etranze ki pe travay dan sa bann sektor.

E pour mwan Mr Speaker, mon krwar poudir i moman letan pou nou kapab redres serten keksoz e anmenn serten solisyon dan sa direksyon.

Enn bann solisyon ki mwan mon santi ki nou kapab aporte ozordi, se en ledikasyon depi dan sa lekol kot ozordi i annan sa, en pe mon pou dir en pe tabou, kot nou bezwen komans pous nou bann etidyan osi, pou kapab pran e tann bann travay ki pa neseserman annan sa bagaz sitan onivo akademik.

Ki zot osi zot kapab pran bann travay dan bann sektor ki bokou sa bann etranze i la, me selman pa pou zis vin parey mon dir ler ou komanse ou vin en zouvriye me avek en lespri e en plan ou ver pou zot *take ownership the business*, apre ki zot in ganny leksperyans 5an, 10an.

E kot ozordi Gouvernman ki ti la ansanm i annan en kantite *Scheme* ki ti'n ganny met an plas ki kapab permet sa arive. Me pour kapab annan *Scheme*, be si ou napa sa bann travayer ouswa sa bann

dimoun ki ou pou bezwen pouse pou zot al lo sa, i pa pou neseserman marse.

En lot konteks ki mon santi nou bezwen adrese e peryod *COVID* in montre nou, akoz i annan bann deklarasyon ki'n ganny fer sirtou atraver Minister Lanplwa kot ler i ti mont lo televizyon ti dir ek bann dimoun ou bezwen pran travay ki deza la. I byen sa napa problem.

Nou annan *vacancy*, nou annan Seselwa, nou annan etranze ki nou kapab ranplase met seselwa dan zot plas napa problem. Me kan a bann skoler ler zot pe fer bann desizyon *careers* mon krwar i enportan osi pou nou pa zis dikte ek zot poudir zis regarde *labour market* Sesel ki nou annan e al dan sa direksyon.

Sa pou mwan i pa neseserman en tro bon direksyon akoz ou pou'n anpes serten rev parey nou ti dir '*Be what you want to be*,' a sa bann etidyan ki anvi pourswiv en karyer dan en donneren ki pa pe neseserman egziste ozordi, me ki kapab egziste dir si 5an a 10an.

Akoz i kapab osi a lavenir ou ganny ou en *foreign direct investment*, ki ganny antre dan en sektor ki pa neseserman deza egziste Sesel e ki en pe

nouvo e ki sa investiser i anvi investir dan pei. E ki ou fer de la, ou pou vwar se ki si ou pa'n prepar ou bann *scholars* pou fer bann letid aprofondi, pou zot ganny bann kalifikasyon neserer ou pou war ki se etranze ki pou kontinyen antre.

Be si ou ti'n fer bann preparasyon pa vedir tou etidyan i bezwen al dan verserten kategori *field*, i annan ki pou pli mwen ki kapab pran sa ki *available on the local market*, me ou kapab pous en pti group pou zot gete, ale.

Wi nou napa sa ozordi me vizyon pei li menm, pou permet ou ler ou'n fini ou letid kapab annan sa domenn pou ou aprofondir ou karyer ladan *once* ki ou'n fini ou letid. So, sa i bann vizyon i nou bezwen regarde.

Lot eleman i mon santi ki i enportan ki nou pouse, se ozordi sekter prive li i kapab dikte son saler *labor market*. Kan servis piblik li i ganny gide par en Departman Ladministrasyon ki avan ti *DPA*, se li ki pou dikte nou la fason ki ou pou fer bann saler baze lo sa *salary grid* ki nou deza annan ozordi.

Bon, eski nou pa kapab osi dir poudir be annou senp, petet i ava vin atraver serten regilasyon ouswa Polisi ki nou

ava annan en varyan saler avek en poursantaz dizon ki i a reflekte diferans ki i pa ava annan en gran gap, petet en 10 a 15 poursan ant varyasyon en saler etranze ek Seselwa ki pou dan menm *post* dan servis prive.

Eski sa pa en keksoz ki nou kapab petet etidye atraver regilasyon, pou nou kapab vwar si i kapab marse? Mon dir sa Mr Speaker akoz? Mon'n koz ek en endividi ki dir mwan li *ok*, i dan sekter konstriksyon e ki li i annan en lekspertiz enzenyer ki *operate* en kalite masin ki pa bokou Seselwa ki annan lekspertiz ladan.

E li in fer me gran parkour ek sa lakonpanyen me selman i ti pe ganny li zis R8mil, kan i ti vin en etranze e sa menm lakonpanyen i pey sa dimoun \$2500 par mwan, *plus* en lakaz avek en loto.

E li ler in al plenny son sor, i dir be gete mon pe fer menm louvraz e mon pe montre sa menm dimoun ki ou'n anmennen ki ou pe pey sa saler donn mwan en logmantasyon petet ant 15 a R20mil e mon a kontinyen travay. E la lakonpanyen i *call meeting* e zot donn li zis R1500 logmantasyon.

So i montre ou poudir i vre nou pa pe valorize sa bann

kalite dimoun ki'n fer sa bann travay e ki fer ki i kre serten lenzistis, e se sa ki Mr Speaker ki ozordi Sesel parey bokou pei i fer fas avek sa ki nou apel *brain drain*. E ler ou war poudir serten etidyan osi i al etidye dan e pei e i get sa *package* ki petet ler in fini letid i ganny ofer, e i konpar sa ki avek Sesel i war poudir sa gran disparite e i deside reste laba e pey son *bond*.

Se sa bann keksoz ki atrakte akoz sa *incentive* ki i ti pou gannyen ler i pou retournen i pa parey sa ki - i byensir nou pa pou kapab pey li parey sa bann pei Eropeen pe peye. Me selman akoz ki dan sekter prive li menm li, e in arive dan sekter piblik osi, kot ler ou pe al rod sa travayer ki ou mank lekspertiz dan ou pei ou kapab ki li i vini i tal son kart e i vin ek en nivo negosyasyon *face a face, tête a tête* avek ou, e zot tonm dakor lo en *package* zot donn li.

Be eski nou pa kapab fer sa ek nou prop Seselwa? Kwa ki anpes nou fer sa? Ou pe donn li lakaz, ou pe donn li loto, mon pa pe dir donn tou travayer lakaz donn tou travayer loto, e an menm tan ou pe donn li en *package* vreman *high* koman en saler.

Annou pran serten konsiderasyon dan sa laliny, mon krwar sa i sa bann zouti enportan kot nou kapab regard dan konteks aktyel pou nou kapab annan sa balans, se sa ki nou pe rode nou se sa balans dan saler ant etranze ek Seselwa.

Lot keksoz ki mon krwar nou bezwen met lipye ater e poz en fren se saz zafer *understudy*. Bokou pei i annan bann formel ki zot met devan ki si ou pe vin *understudy ok*, ou *expatriate* mon pou fer enn mon dimoun *understudy* ou, e sa ki pe *understudy* li i ganny pli byen peye, i annan pei ki ganny, la parey *UAE* pli ganny peye ki sa enn *expat* li.

Sa se pou don li lankourazman, pou li aprann sa travay e *take over the position*. E ler mon koz *understudy* ou bezwen annan en *time frame* ki atase avek. Tro bokou souvandfwa menm dan senkyenm Lasanble Gouvernman avan Minis in vini, in koz lo *understudy* me naryen dan en sans ou a dir pa bouze akoz nou napa en *timeframe* avek.

Ou war en dimoun in vini depi 2010 i dan en pozisyon i vin pran en Kontra 3an, Kontra i *extend* ankor 3an i ale 5an e sa dimoun ladan menm sa

expat pe demann sitwayennte apre 10an pou li reste ouswa in zwenn en Seselwa.

Be eski sa en pratik ki nou, nou ti a kontan? Si ou pe vin travay pou vin donn ou servis i annan en *time frame* e si mon pou renouvle ou kontra avan ou ale pou a dir mwan, be lala travay ki mon fer pou Seselwa. Prezan nou a konnen, nou a deside la nou annan sa sistenm *result based management* nou a gete si in *perform*.

Si i annan sa Seselwa in serye pou li pran sa ki sa *expat* pe fer e la ou ava bouz li dan pozisyon pou li ranplas sirtou dan bann *pozisyon management* isi i annan serten sekter mon krwar ki i merit kapab ganny fer e i kapab ganny fer. E i annan Seselwa ki kapab travay sirtou dan sa *tourism sector* ki nou pe war ozordi.

E nou, nou pe ganny felisite dan sekter tourizm e nou en model ki pe ganny swiv lo bann diferan, menm lo nivo Losean Endyen. Nou annan en lekol ki pe marse. E i annan benn perse enternasyonal ki nou bann etidyan i fer, i ganny plis lekspertiz, me ki nou war apre nou seselwa i ganny kit deryer, laplipar 80poursan nou bann *GM*, nou bann *Sous*

Chefs, nou bann diferan pozisyon kle *Chef* se bann etranze ki pe pran.

Ki anmenn mwan lo en konteks koman en legzanp ankor Mr Speaker, mon annan enn mon zabitan ki en *Executive Chef*, partou kot i ale i al negosye son saler i dir avek mwan mon en *Executive Chef* mon annan mon kalifikasyon in travay dan diferan pei Lazi.

I dir omwen petet Mr Aglae mon a ganny mwan en 30 a R35mil par mwan. Partou kot i pase zot refiz li zot pare pou donn li zis anviron R20mil par mwan. Be ki fer ki sa menm etranze ki li i antre pou pran sa menm pozisyon i pe ganny li *above 40thousand plus, accommodation*. Son zanfan i ganny lekol, i ganny peye sa lakonpanyen menm. Be *is that fair?* Eski nou pe pran Seselwa serye dan sa bann kad travay?

So, me selman pou nou kapab adres sa mon pe dir i pa zis sifi avek en logmantasyon revizyon saler, i bezwen annan en *framework* legal an term Polisi ek regilasyon ki bezwen ganny met an plas, san ki nou bezwen vin diktatir ouswa enpoz sirtou lo sekter prive. Akoz i pa pou en norm ki pou ase ... me solman ou merit

annan serten barenm ki bezwen ganny mete.

So Mr Speaker mwan mon dakor ki nou *labor market* ozordi ki nou, nou annan ozordi i merit ganny revwar dan en fason vizyoner mon kapab dir. Akoz sa ki nou pe vwar avek modernizasyon, se ki pou annan bann lezot potansyel travay ki pou egziste a lavenir, ki pa ti egziste ozordi. E *COVID* in montre nou sa en pe sirtou dan domenn *IT sector* e domenn *trade* nou'n war sa.

E avek bann Lazans dan sekter finansyel ki ozordi i egziste, nou pou war osi bann lavansman sirtou si parey sistenm *crypto currency* ki *on the verge of* pe fer ase byen. So nou pou annan bann lekspertiz ki nou pou bezwen, be nou pa anvi war etranze nou. Annou komans *train* sa Seselwa.

Sa enn ki laba kot Liniversite Sesel, annou komans pous li sa *teachers*, sa ki fer sa *careers guidance* komans koz ek nou bann zelev boner, san ki nou bezwen dir zot pran sa ki deza egziste akoz i pa en bon lapros poudir be pran sa ki egziste. Ou bezwen *aspire more, push zot more*, pou zot kapab vin sa ki nou, nou dir '*be what you want to be.*'

So avek sa Mr Speaker sa bann mayon lenzistis i kapab

ganny korize avek en bon saler wi, me solman avek en bon *guidance* i ganny mete, avek en *policy framework* ki kapab asire sekirite sa vann travayer avek zot bann salaryal kot ava pa kre sa bann gran disparite.

E mwan mon pare pou donn sipor Onorab William avek son Mosyon, akoz mwan mon pe get 15an, 20an, *down the line*, kot i konsern travay Sesel e annou donn Seselwa son valer dan son travay. Mersi.

MR DEPUTY SPEAKER

Mersi Onorab. Mon ava apel Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg e tou dimoun a lekout.

Mr Speaker loter Mosyon atraver nou Lasanble, pe rekonnet ki i annan defayans e osi lenzistis dan saler etranze ek Seselwa dan pei e i pe demann Gouvernman pou koriz sa lenzistis e osi pou ankouraz sekter prive pou zwenn sa legzersis.

Mr Speaker pou bokou lannen nou'n tann sa leokri kot etranze in toultan ganny priorite e ganny bokou lavantaz dan travay par devan Seselwa.

I kler ki dan nou pei nou ti bezwen prezans travayer etranze pou anmenn soulazman dan diferan sekter kot ti mank travayer, me sa ti sipoze pou en serten letan, kot enn fwa ki Seselwa in kapab rebran kontrol dan son travay e dan sa travay spesifik, kontra sa travayer etranze i sipoze termin la amwen ki i vreman neser ki i reste pou ankor en pe letan.

Mr Speaker ozordi ki nou pe war, etranze i kontinyen a latet dan bokou seksyon travay. I enportan ki nou retourn en pe an aryer e rode aköz nou war nou dan sa sityasyon. Mr Speaker nou'n obzerv la kantite etranze antre dan nou pei dan lannen 1977 an montan, apre ki bokou bann frer e ser Seselwa ti oblize kit pei an gran kantite pou al an egzil dan diferan pei.

Sa ti fer ki Sesel ti perdi en gran lafors travayer profesyonnel dan bann sekter kle, tel ki Dokter ansennyan, Lapolis, travay piblik, *manager* dan bann letablisman touristik e osi dan plizyer lezot lanplwa.

I ti en gran perd pou nou lafors travayer lokal aköz bokou sa bann Seselwa ti'n deside kit nou pei pou rezon sekirite.

Ki nou'n war an rezilta sa laport ti ouver pou etranze

antre an gran kantite pou ranplas sa mankman sirtou dan ledikasyon, dan lasante e sirtou lotel ek dan Lafors Lapolis osi. Mwan menm mon Mr Speaker mon pas dan plizyer lanmen bann ansennyan etranze. Mon ankor mazin zot tou e mon pou dir zot merci pou bokou keksoz ki mon ti aprann avek zot.

Mr Speaker byensir tou sa bann etranze in vin ek zot bann *package* spesyal, parey loter mosyon in mansyonnen, lakaz, transpor, en gro saler avek zot *allowance* antase ek lekol pou bann ki anmenn zot zanfän.

Mr Speaker parey loter Mosyon in fer resorti e osi lezot bann koleg Onorab no pa kont okenn travayer etranze dan nou pei, zot in fer bokou lo tou nivo e zot ankor pe fer. Zot in form bokou nou ban zanfän, zot in anmenn zot bann ekspertiz dan plizyer Departman e plizyer adilt osi in ganny diferan lantrennman avek serten etranze e ozordi zot pe byen debourye.

Nou rekonnet e osi aksepte ki annan travayer spesifik tel ki konstriksiyon ki nou ankor bezwen lasistans etranze. Me sa ki pa tonm byen e ki i pa akseptab se ki letan nou get nou bann fer e ser Seselwa ki zot, zot pare pou

donn tou dan zot travay pou lanmour zot pei, e lafason osi ki zot kontan zot travay, dousman nou war zot perdi preski tou zot bann *incentives*.

Lo Seselwa serten *incentives* i ganny koupe, zot war zot kole dan sa plas kot zot in ete pou bokou lannen e zot saler i reste touzour parey.

Mr Speaker sa Mosyon i pous nou Lasanble plis ankor pou aport nou sipor pou bann frer ek ser ki annan plis ki 10an dan en travay e ki zot ankor lo menm saler, e sa se pirman rezilta lakour pou zot travay.

Fristrasyon ankor i leve letan en Seselwa pe montre en etranze travay, e i dekouver ki sa etranze pe deza ganny en saler plis ki li pou li menm ki i pa ankor konnen ki mannyer ou pou antreprann travay e i ankor pe aprann avek enn nou fer e ser Seselwa.

Letan serten zofisye dan diferan Departman i ganny anvoye pou al fer serten travay par egzanp lo bann zil, deplasman zot nepli resevwar okenn *allowance*.

Apard en pe manze oubyen en landrwa reste, napa naryen dan zot lanmen pou zot ganny ni en boutey delo ouswa en *juice*, me dan sa ka sa etranze tou i ganny pran bon ka avek son *allowance* i ganny

prepare byen davans, i ganny tre byen trete, i ganny son zoli *guest house* e i dan bokou konfor.,

Mr Speaker sa i vreman dekourazan nou bezwen siport nou travayer Seselwa a tou pri e valoriz zot travay. Letan nou get nou Seselwa li menm pe kraz son fer ek ser Seselwa zis pou donn lavantaz etranze i vreman sagrinan, akoz zot montre ki zot napa konfyans dan ti prop Nasyon e napa sa lenterere pou fer son prop travayer Seselwa monte.

En legzanp en kwizinyen dan en lotel ki pare pou donn tou, sakrifye son bann zour *off* akoz i santi ki sa letablisman i bezwen li, ki mannyer i ganny rekonpanse pli tar?

Letan i a pe donn tou son kouraz i *ok* pou Sef, me letan pou donn li en pti promosyon pou aranz son saler zot rod tou *sport* kalite leskiz, eski mon demande, eski sa i *fair*? E se sa eski se ds fason ki nou ankouraz nou frer, ser Seselwa pou reste e pran son travay dan lanmen etranze.

Ozordi nou bann fer ek ser Seselwa ki zot pe touy zot lekor zot plito vin viktim. Zot travay pa ganny valorize e i annan menn ka kot zot saler i ganny koupe kot nou rod nenport ki rezon, zot *appraisal* pa bon

ditou, letan travay i bon me *appraisal* li i pa bon.

E la etranze i kontinyen monte, zot kontinyen ganny gro saler menm ki parfwa laplipar pe travay egal, menm kantite erdtan akote en Seselwa zot *income* i 3fwa plis, me napa naryen an plis ki zot, zot pe fer.

Ozordi sa Mosyon pe demann Gouvernman pou koriz sa lenzistis e donn nou bann frer ek ser Seselwa valer pou zot travay.

E nou pe osi demande ki bann sekter prive pli spesyalman dan bann gro lotel, bann etablisman touristik, zot rekonsider zot fason rekonpans nou bann fer ek ser Seselwa ki travay e vreman travay dir pour ki zot letablisman i kontinyen agrandi.

E ki atraver zot rekonpans nou bann Seselwa ava annan sa kouraz pou pran kontrol dan zot lanmen e pou kontiny sa travay ki ban etranze pe fer ozordi dan zot plas. Mersi.

MR DEPUTY SPEAKER

Mersi Onorab. Prosenman lo lalis se Onorab Philip Monthy.

HON PHILIP MONTHY

Mersi Mr Speaker e bonn apre midi a tous.

Mosyon anmennen par Onorab William i en Mosyon ki

mon asire pe atir bokou latansyon pou le senp rezon ki bokou nou bann frer ek ser pandan plizyer lannen pe war zot pe fer fas avek sa lenzistis ki Mosyon pe fer referans avek.

E ki avek sa transformasyon ki pei in anbank lo la depi Oktob 2020 zot pe swete ki enn fwa pour tou sa bann tel lenzistis a ganny adrese enn fwa pour tou.

E mon kontan pou vwar ki sa transformasyon in komans tous osi nou bann koleg lo lot kote latab, kot Onorab Ernesta in admet ki mazorite Seselwa pa en Nasyon ki pares e mon antyerman dakor avek li. E alors pa byen pou en Gouvernman devlop en kiltir kot son pep i bezwen depan lo *welfare*, i enportan ki sa ki annan lafors i leve i al debourye olye zis depan lo sa pti larzan *welfare*.

Welfare i la pou asiste sa ki vreman dan bezwen e ki pe war li difisil pou fer 2 bout zwenn. E pou ankouraz nou fere ek nou ser Seselwa pou travay e vin prodiktiv, fodre zot ganny en saler ki egal avek sa zefor ki zot pe mete e non, pa vwar bann etranze pe pas par lao zot parey in touzour le ka anba sa ansyen sistenm.

Mosyon Onorab William pe demann avek sa

Gouvernman ki la o pouvwar, pou fer tou sa ki i kapab pou sey las sa lenzistis, ki nou bann travayer in sibir pandan tou sa lannen kot preski naryen pa'n ganny fer pou adres sa bann tel sityasyon.

Nou'n tann koz lo Lalwa Lanplwa me parey Onorab Woodcock in fer nou remarke pli boner nou an en *Employment Act* ki dat depi 1995 Mr Speaker. E la i lo nou Gouvernman pou moderniz sa bann Lalwa, ki ava ede fer en zistis nou bann travayer.

Mr Speaker mon'n personnelman war bann tel lenzistis dan enn bann lenstitisyon kot mon deza travay. Kot ou vwar sa Seselwa ki ti pe okip en *post* ki ganny transfer dan en lot seksyon i ranplase san okenn rezon valab par en etranze, e kot *salary package* sa etranze ti bokou pli o ki sa Seselwa ki ti dan sa *post* ti pe gannyen, lakaz i ganny peye, tiket avyon preski tou le 3 mwan pou li retourn dan son pei.

I fer ou demande kwa spesyal ki i ti pe fer ki sa Seselwa ki i dan sa *post* oubyen en lot Seselwa pa ti kapab fer? E i fer ou demande osi ki kantite larzan taks Seselwa i ganny gaspiye, pandan sa plizyer lannen ki sa ka spesifik ki

mon'n mansyonnen in dire. Sa in zis en ka ki mon site ki mwan mon'n konnen.

E mon asire ki i annan plizyer bann tel sityasyon ki pe kontinyen sirtou dan bann lakonpannyen, parastatal kot bann *salary package* ki sa bann etranze pe gannyen i egzorbitan e ki bann *post* ki zot pe okipe ki souvan dan bann seksyon finans i kapab ganny okipe par Seselwa.

Onorab Romain in fer referans avek bann etidyan Lakademi Tourizm ki'n al fer zot degre kot *Shannon College*, e ki a zot retour zot pa pe vwar zot pe ganny sa rekonesans ki zot mete. Sa Mr Speaker i pa verdir ki kan en *Graduate* i retournen sirtou dan ka sa bann etidyan ki zot devret pe ganny bann *post supervisor* oubyen *Manager* deswit.

Mer i enportan ki en *pathway* i ganny etabli e ki sa bann zenn i war sa posibilite progresyon dan zot karyer pou ede gard zot dan sa sekter dan lekel zot in depans bokou lenerzi e fer bokou sakrifis pou kapab ganny sa kalifikasyon neser.

E kot pei in depans bokou larzan pou kapab donn zot sa konpetans e konesans. Wi in annan detrwa lotel ki'n valoriz sa bann zenn. Me an menm tan

in annan bokou zot ki pa'n ganny sa rekonesans e ki'n abandonn sa sekter. Ti pou enteresan konnen konbyen sa bann zen depi premye group ki ti al *Shannon* ki ankor aktiv dan Lendistri Tourizm.

E mon kontan pou vwar ki la anba nouvo Gouvernman, i annan en renouvelman zefor par Minister Tourizm pou swiv sa bann zenn e fer sir ki zot pa ganny abandonnen e kot sa ki'n la mal dan lepase i ganny korize.

Mr Speaker bann tel sityasyon ki mon dekrir koman lenzistis zis parey Mosyon i fer referans avek in touzour prezan dan nou bann landrwa travay ki swa dan sekter piblik e osi prive, kot mon santi ki zefor mon bann fer ek ser Seselwa pa pe ganny rekonnet e valorize o maksimom.

Mosyon Onorab William pe rekonnet ki in annan sa lenzistis e ki pe ankor kontinyen, e pe demande enn fwa pour tou ki sa i ganny korize ler Gouvernman i antreprann sa legzersis revizyon saler ki pou ganny fer an 2023, si nou sityasyon ekonomik i permet parey Minis Finans in fer resorti.

Me selman an dizon sa Mr Speaker nou bezwen fer sorti i klerman ki Mosyon pa pe

demann Gouvernman pou ranplas tou etranze ki pe travay Sesel par bann Seselwa. Nou konn tre byen ki pou sa pa pou posibil, an vi nou grander popilasyon kot nou pou touzour war nou pe bezwen troun ver mende etranze sirtou dan sekter parey tourizm, konstriksyon e menm ledikasyon.

E fodre ki nou osi dakor ki i pa posibil pour ki *salary package* en Seselwa i egzaktaman 100poursan egal parey ou en etranze ki pe okip menm pozisyon.

Ler nou konnen ki sa travayer etranze in bezwen kit son pei, e ki i pou normal ki pou annan serten *allowance* ki pou diferan ava ek sa travayer Seselwa ki li i pe travay dan son pei natal e i pa'n bezwen fer sa deplasman. E sa ki devret arive se ki saler debaz en etranze e sa Seselwa ki pe okip menm *post* i devret parey.

Osi byen ki serten *allowance* tel parey ki *housing allowance*, si en etranze pe ganny en *housing allowance* e ou annan en Seselwa ki li i pe bezwen lwe en lakaz oubyen ki'n pran e *loan* pou konstrir son lakaz e i pe peye tou le mwan li osi i devret pe benefisye avek en tel *allowance*.

Eski i pa pou normal ki sa Seselwa osi i ganny sa *housing allowance* ki a permet son sityasyon finansyel vin enn ki pli stab e sa i a vin koman en lankourazman pou li met plis zefor e vin pli prodiktiv.

E sa Mr Speaker mon santi ki an fezan sa, nou pou pe ede ankouraz nou bann prop frer e ser Seselwa pou vin pli prodiktiv dan lafason ki zot antreprann zot bann responsabilite e ede retir sa santiman fristrasyon ki plizyer travayer Seselwa pe retrouv zot ladan dan zot lanplwa.

E ankouraz bann zenn *graduate* pou swazir bann profesyon dan bann sekter parey mon site pli boner, kot nou war i annan en gran norm etranze e kot pei i devret pe fer son maksimonm posibil, pou ki nou vwar plis Seselwa pe al dan sa bann sekter.

E kot parey loter Mosyon in fer resorti, nou bann zanfan a ganny sa lankourazman pou met plis zefor dan zot letid e oze reve pou okip bann *post* dan lekel nou p vwar zis etranze pou le moman. Mr Speaker tout an rekonesan kontribisyon ki bann etranze pe fer dan lekonomi nou pei, mon pou aport tou mon sipor pou sa Mosyon.

Akoz parey koze i dir lasarite i komans kot lakour e i

enportan pou donn nou bann frer e ser Seselwa ki pe leve e debrouye sa valer e saler ki zot merite. Mersi Mr Speaker.

MR DEPUTY SPEAKER

Mersi Onorab. Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Mr Speaker i annan bokou keksoz ki'n ganny dir depi bomaten lo Mosyon anmennen par Onorab William.

Mr Speaker sa size defayans lenzistis e diferans dan *salary package* travayer etranze e Seselwa dan pei, i enn ki anmenn bokou komanter negativ e menm fristrasyon parmi nou bann travayer Seselwa ki i ganny touse par sa size.

Permet mwan komans mon pti lentervansyon par felisit tou travayer Seselwa, swa ki dan domenn sekter piblik oubyen prive ki pe vreman desarz zot responsabilite dan zot diferan landrwa travay, menm si zot santi ki zot saler pa ekivalan oubyen ase pou sa kantite travay ki zot pe fer. Me toudmenm mon ankouraz zot tou pou kontinyen travay dir e delivre pou pep Seselwa.

Mr Speaker lenzistis e diferans dan saler travayer Seselwa i reel e personn pa

kapab nye sa. Mon konstate psi ki sa i akoz diferan sirkonstans, me parkont dan serten sirkonstans sa diferans i tro gran e se sa ki fer travayer Seselwa konsernen e annan bokou konplent.

Letan nou lo sa size, mon ti a voudre osi tous lo lenzistis dan saler diferan kous travayer Seselwa zot menm. Mon osi tre konsernen avek saler *minimum* ki serten kous travayer Seselwa pe gannyen isi Sesel. Annou pran legzanp, ozordi en *field worker* anploye pe ganny li en saler de baz R6206.

Annou zis mazine en *père de famille* oubyen en manman tousel avek 3, 4 zanfan pe tous li en saler R6206, ek sa lavi tre dir ozordi i pa fasil pou li pran byen ka avek son fanmir. Be *carer* nou tou nou konnen la anndan i pe ganny li en *allowance* R6633.47 si i pe fer *full day*, si i pe fer en *half day* i pe ganny li R4145.92.

E annou mazin byen ki zot in ganny dir ki zot napa drwa fer en dezyenm louvraz menm apre zot ler travay, in plis ki ler pou ankadre sa group dimoun, anploy zot formelman e donn zot en pli bon saler de baz ki sa ki zot pe gannyen ozordi.

Mr Speaker ozordi nou war etranze pe fer ledikasyon fizik dan serten lekòl, zis get sa

diferans dan zot saler, en *PE Teacher* Seselwa i pe ganny li R7649, i ganny li en *supplementation* R382.45 sou e i ganny en *inducement* R18san, an tou i fer li R9067.

En *PE Teacher* pran legzanp i sorti *Zambia*, li i pe ganny li en saler de baz R11mil401, i pe ganny en *inducement* R2mil, en *supplementation* R4mil, i fer li R17mil, 401, son saler. Ladan menm zot lakaz Minister ki peye enkli zot bil litilite. E dan serten ka i enkli en dimoun pou netway zot lakaz. Sa i vreman en gran lenzistis sa!

E la Mr Speaker mon oule ankouraz nou bann zenn fiy ek garson pran loportinite enportan en karyer koman ansennyan ledikasyon fizik e ranplas sa bann etranze ki pe pran en gro morso dan Bidze Minister Ledikasyon !

Annou prezan regard travayer Seselwa ant Seselwa, dan diferan Minister Departman e Lazans i annan bann Zofisyè *Senior* e Zofisyè Prensipal, i annan bokou Zofisyè *Senior* ki pe ganny plis ki en Zofisyè Prensipal, ler ou gete sa Zofisyè Prensipal i sipoze pli o ki sa Zofisyè *Senior* li.

Mon pran legzanp
Direkter Zeneral dan

Gouvernman, i annan ki annan menm kalifikasyon menm lannen travay, pe fer preski menm louvraz, me zot pa pe gannyen menm saler.

I osi annan serten labi parfwa ki nou pe war par Gouvernman sa nou pa pe dir i fer ki komanse. An sa ki konsern met en dimoun *held against the post*, oubyen sa travayer i ganny demande pou fer sa travay pou en pozisyon pou 3an, avan ki i ganny konfirman dan sa pozisyon.

E pli tar e laplipar ditan sa konfirmasyon pa zanmen otomatik, par kont sa menm travayer i pe fer sa travay i pe travay byen i pe delivre. Dan ler en pozisyon i ganny *advertise* avek son saler benefis ki i al avek, okenn dimoun ki ganny apwente dan sa pozisyon i devret apepre 6mwan ki in prouv son lekor, ganny konfirman dan sa pozisyon e ganny peye tou son benefis ki vin avek.

Ler ou pran en travayer etranze ki vin isi Sesel pou pran menm pozisyon, napa sa zafer *held against the post*, i ganny antre direk ek son *full* saler ek tou son benefis ki i vin avek !

Nou devret apresye tou bann travayer Seselwa dan diferan pozisyon ki pe travay dir. Wi nou bezwen travayer

etranze, me mwan santi ki nou devret pli byen valoriz lo travayer Seselwa. Mr Speaker mwan mon pa long mon toultan *short and brief to the point*, mon pou terminen.

E an terminen mon pou rekomande ki en odit detaye i ganny fer par bann biro konsernen, pou a kapab met en lord e regulariz en pli bon sistenm saler.

Partou kot i annan en etranze ki pe travay i osi neser pou annan en bon *training plan* dan sak Minister, Departman e Lazans pou fer sir ki tou travayer i ganny loportinite *training* e ki zot ganny byen *appraised*; ki travayer Seselwa i benefisy avek bann *increment* a sak fwa ki zot in ganny en bon *appraisal*.

E sa i a fer ki zot war en amelyorasyon dan zot saler lannen apre lannen, akoz ler ou regarde Mr Speaker en travayer i sipoze si nou pe fer en sistenm travay normal, tou le lannen i sipoze ganny *appraised*. Me pa tou Minister ki pe fer sa.

E la mon pe mazine avek sa nouvo sistenm ki Mrs Mohideen yer in vin la in koz lo la avek sa *result base* ki nou pe mazin tou Minister al lo la, mon mazine ki tou le lannen travayer i ganny *appraised* e

bann ki'n travay dir ki war ki benefis son travay dir e i ganny en pti saler ogmante ;- par egzanp ou sorti lo en *step* i mont en *step* or en *step* par en *step at least* i war ki i pe gannye e i kontinyen delivre.

Kot i annan travayer etranze *management* i devret asire ki i annan *understudy* travayer Seselwa pou pran pozisyon e non, pa kontinyen renouvle kontra travayer etranze ki zot reste dan sa pozisyon leternite. E sa Seselwa li i ganny letan degoute.

Kote *understudy* i ganny pozisyon, donn li en bon saler e osi benefis ki i al avek menm pozisyon ki sa etranze ki ti pe okipe. Avek sa Mr speaker sa i mon de mo. Mon dir ou mersi.

MR DEPUTY SPEAKER

Mersi Onorab. Nou pe fer tre byen lo letan, Onorab Loizeau.

HON NORBERT LOIZEAU

Mersi Mr Speaker. Ozordi mon ganny en pti laz mon fer sir mon pa pou koz tro bokou, selman mon a dir enn de pti keksoz.

Mr Speaker mon'n ekout tou entervenans koz lo Mosyon sirtou bann lo kote laba, lo kote Lopozisyon. Me mwan ler mon koz ek Onorab William pli boner in fer mwan resorti ki sa Mosyon depi lontan i dan

pipeline sa. Depi ler i ti lo zot kote menm avan zot ti decide zet li par lafnet sa Mosyon ti la li.

Me selman i pa ti ganny sans anmenn devan, akoz zot pa ti krwar dan li. Me ozordi Onorab Aglae nou dan LDS nou krwar dan Onorab William e dan sa transformasyon ki pei pe anmennen, mon krwar ki Prezidan pou pran kont Mosyon Onorab William ki i pe vin avek.

R500 Onorab Cosgrow pa zot dir zot propozisyon dan Kongre ?

MR DEPUTY SPEAKER

Address the Chair.

HON NORBERT LOIZEAU

Met zot propozisyon dan Kongre atraver ou Mr Speaker nou'n pase. Mr Speaker sa bann *issues* nou pe koz lo la, la, en vye *issue* sa, selman lot kote latab zot pe fer nou krwar nou krwar ki sa fek arive la pandan sa 18mwan, 19mwan ki Gouvernman LDS in vin o pouwar. Reste Mr Speaker.

Mr Speaker be premye keksoz mon pou al lo la, se sa zafer siksesyon, sa plan siksesyon pou en etranze ki zot ti pou met en Seselwa *undersee* en etranze pou li pran sa plas. Mr Speaker be sa en vye plan

sa. Pou *understudy* en etranze pou li pran son plas.

Me selman ki nou'n war in arive program in la, selman program pa'n marse. Mon a dir zot akoz program pa'n marse, akoz ti annan serten politik ki ti ganny zwe ladan Mr Speaker. Kot en dimoun li i *understudy* sa *foreigner* li, kontra *foreigner* i fini sa etranze i ankor la li, kontra i *extend* e ler sa dimoun ki *understudy* sa etranze, ler i ganny lenformasyon i realize etranze in fini vin Seselwa.

E prezan i reste la, aprezan li sa zenn ki pe travay anba li, i dekouraze i sorti i al rod en travay aletranze. E zot sa bann etranze Mr Speaker zot annan en bi ler zot vini zot, ler zot vini zot vin ek zot madanm, ek zot zanfan, zot fer sir ki zot zanfan i etidye. E i annan bokou sa bann zanfan sa bann etranze ki'n vin Seselwa ozordi zot pe tenir bann gro, gro *post* ankor Mr Speaker.

E pou mwan Mr Speaker se sa, sa lenzistis ki'n arive parmi nou bann Seselwa. E la Mr Speaker en keksoz ki vremen enportan ki mwan mon panse, nou Seselwa e Prezidan toultan i *stress* lo la - nou Seselwa nou bann paran nou bezwen pran nou responsabilite anver nou bann zanfan.

Pous nou bann zanfan pou etidye, pou zot kapab fer en bon swa dan lavi en bon swa travay. Ozordi Mr Speaker i annan nou bann zenn ki pa pe fer en bon swa, ozordi i annan bokou bann zenn ki al *STA* e apre zot pa fer sa louvraz lotelri. I annan dimoun i annan zenn ki al *SIT* ler zot sorti *SIT* zot pa fer sa louvraz ki zot ti fer *SIT* Mr Speaker.

Enn *SIT* la, Mr Speaker bann lenstitisyon skoler Onorab Audrey Vidot in fer resorti nou bezwen amelyor en pe lo la, akoz manrmay i sorti dan sa bann lenstitisyon sirtou *SIT* i annan manrmay i sorti zot pa sorti dan bann gran konesans dan bann landrwa travay. E ler zot sorti ler pou zot ante dan en travay zot napa sa konesans, alors zot pa ganny aksepte, akoz laplipar bann dimoun zot al dan prive.

E dan prive en dimoun ki dan prive li i anvi en *skill worker* akoz i pe *invest* son larzan dan prive i pe pran bann kontra i anvi delivre son kontra *on time* e i bezwen pran bann dimoun kalifye e se lala Mr Speaker kot ou war bokou *GOP holders* i ganny antre, etranze i ganny antre sirtou dan bann, dan bann konpanyen konstriksyon Mr Speaker.

Ozordi ou pou reste sezi Mr Speaker la kantite etranze ki pe fer bann louvraz ki nou Seselwa ti fer lontan, plonber, elektrisyen, mason, menm *painter* etranze ki pe fer. Tir salte, Mr Speaker ozordi *Nepale, Bangladeshi* ki pe tire, nou Seselwa nou pa war zot.

E la Mr Speaker permet mwan al lo en size ki mon'n tann koz en pe for lo la, sa *result based management* la. Mr Speaker sa lontan i egziste sa, yer ler mon'n ekout Ms Shella Mohideen, i ti dir klerman yer ki kot *Guy Morel Institute* laba i annan sa - mannyer i dir sa - i annan sa program, sa *module*. E tou bann dimoun ki vin bann *course SIM* zot ganny entrodwir sa *module* pou zot anmenn dan zot landrwa travay.

Me selman Mr Speaker sa pa'n fer, sa zanmen in ganny arive. Aprezan sanmenm sa ki ou trouve aprezan ler nou Gouvernman in vini pe entrodwir sa dan sekter piblik, prezan ou war sa lakoler antre bann dimoun, zot krwar nou pe fer zot ditor, kan si sa ti'n ganny entrodwir lontan nou ti pou'n fini adapte avek, i ti pou ok.

E sa, sa *module* Mr Speaker set en fason ki *set* en bar pou bann travayer ou pa kapab zis vini travay pou lapenn ou pe zis vini travay.

Ou bezwen annan en bar ki ou anvi arive zis parey en dimoun ki zot *high jump* ou pa kapab sot 1met 80, 2met, i oule toultan al pli o, sa i pous ou, e se sa ki nou, nou Gouvernman i trouve.

Nou Gouvernman in trouve ki i neser ki sa i ganny entrodwi, e sa in ganny entrodwir pou nou kapab pous nou dimoun e ki sa zafer trenn lipye dan sekter piblik i ganny met de kote enn fwa pour tou.

Mr Speaker i enportan ki nou valoriz nou zonn Seselwa byen, i annan Seselwa ki travay dir parey kot *PUC* Mr Speaker kot *PUC* i annan bann enzenyer Seselwa i annan bann teknisyen Seselwa ki travay dan *power station*, zot ki *maintain* sa *power station* tou dilon lannen pou nou ganny elektrisite.

Me selman ler pou fer servis lo zenerater, en konpanyen sorti dan *L'Inde* ki vini pou fer servis lo la e zot pe ganny zot dapre konpran \$10milyon a \$20milyon pou fer sa me selman bann menm travayer Seselwa ki travay lo sa plan tou dimoun lannen se zot ki la, pandan sa servis pe fer pe donn lanmen pou fer.

Me pa ti a byen, e sa bann operater zot kapab fer, me pa ti a byen vi ki zot kapab fer olye

anmenn sa konpanyen vini pou ganny 20mil, 20milyon sepa \$10milyon olye pran 20milyon, pran 10milyon, donn zot en pti *incentives* zot ti a fer sa, ou ti a vin en lankourazman pou zot Mr Speaker. E mon larzan i reste isi.

Mr Speaker ozordi ler nou pe koz travayer Seselwa, travayer etranze ozordi i annan travayer etranze dan serten Departman ki'n fini sot 70an, mon'n ganny en teks la en fiy i dir mwan zot annan en *Deputy* kot zot Departman i annan 70an, en etranze, selman nou Seselwa ler i ariv 60an zot dir li pran *early retirement*.

Be la mon mazine mon annan en zanmi Roland Sans Soucis ler i ti ganny 59an, i ti travay dan en landrwa dir li i pou bezwen arete, i telman for i anvi travay i ti rod en lot travay en landrwa.

E ler i ti ganny 60an zot dir li i pou bezwen arete pou son laz, ou konnen ki i fer aprezan Mr Speaker i ti bezwen al met presyon lo *Pension Fund* pou li kapab ganny son pansyon a laz 63an kan ki i pa ti anvi sa li, i ti anvi reste pou li travay e kontinyen kontribye dan devlopman nou pei ziska ler i ava ariv son laz ki i merit pran son retret.

Me selman etranze laz 70an zot ankor *still* la pe travay. Ozordi Mr Speaker napa disparisyon zis dan lapey etranze ek Seselwa. Mr Speaker ozordi i annan en disparisyon ozordi en *advisor* i ganny plis ki Prezidan Larepublik ki *head* pei, ki pe ansarz pei.

Ozordi en *CEO* i ganny plis ki Prezidan Larepublik ki pe ansarz pei. E i annan diferan kalite *CEO* en i annan ki son lapey i dan 80, i annan 100, i annan 200, i annan diferan kalite *CEO* Mr Speaker.

E tousala se bann keksoz ki nou koman sa nouvo Gouvernman nou bezwen fer. Akoz oparavan nou pa'n fer. Nou konnen i pa pou en keksoz popilis, se sa ki pa'n ganny fer avan. I pa en keksoz ki bokou dimoun pou kontan, me selman nou pa pe fer li pou dimoun kontan nou, nou pe fer li pou byennet tou dimoun.

Me ozordi Mr Speaker malgre nou pe koz lo etranze ki pe pran plas Seselwa nou. Nou bann Seselwa nou bezwen serye nou en kou Mr Speaker be nou pa kapab nou bomaten Seselwa i annan Seselwa avan al travay bomaten i bezwen met en *steam*. I bezwen al obor laboutik pou kas latet, tousala se bann mannyer fer ki nou bezwen sanze dan nou pei.

Akoz sa dimoun li ki annan son biznes, i anvi son biznes i bouze li. E la Mr Speaker e i annan se sa ki parfwa prive i prefer etranze, rod *GOP* pou etranze travay ek li.

Seselwa i kontan *sick leave* i annan, nou bezwen sanze sa *mindset*, kan in ariv wikenn si nou'n pran en profesyon ki nou bezwen travay wikenn nou bezwen serye. Nou pa kapab koz wikenn nou bezwen al welele nou bezwen pran en *sick leave* e afekte travay sa dimoun dan prive ki li son lanmen i anmare.

Mr Speaker sa Mosyon i en Mosyon ki - an terminan mon anvi dir ki sa Mosyon vreman enportan. Parey mon'n dir anba sa transformasyon ki Prezidan Ramkalawan pe anmennen, ek son Gouvernman pe anmennen pou pei mon krwar sa Mosyon i antre byen ladan.

Nou konnen Mosyon pa *binding* lo Gouvernman me selman mon krwar Legzekitiv i konpran ou e zot konpran li laliny ki nou pe al ladan. Mr Speaker mersi pou donn mwan permisyon pou dir 2 pti mo.

MR DEPUTY SPEAKER

Mersi Onorab. Dernyen entervenans lo sa Mosyon avan

nou *Right of Reply Leader of Government Business* Onorab Georges. Ou pe sede?

HON BERNARD GEORGES

Mersi Mr Speaker. Wi mon krwar letan in tar, bokou keksoz in fini ganny dir. Mon ava sed sa plas pou *mover* Mosyon. Mersi.

MR DEPUTY SPEAKER

Donn Onorab Loizeau loner pou swiv ozordi. Donk mon ava envit loter Mosyon pou prezant son *Right of Reply*. Onorab Waven William.

HON WAVEN WILLIAM

Mersi Mr Speaker. Mr Speaker Mosyon parey in ganny ekrir i lir *comme* swivan;

Swivan bann defayans lenzistis e diferans dan *package* saler travayer etranze e Seselwa dan pei, sa Lasanble i demann Gouvernman pou koriz sa bann lenzistis pou fer en legzersis revizyon saler e pou ankouraz sektè prive pou form parti sa revizyon.

Mr Speaker premye enstan mon ti a lontan remerisi tou bann Manm Lasanble ki'n entervenir tou lede kote latab. Mr Speaker mon'n vreman fasinen avek bann diferan kontribisyon ki'n sorti dan sa deba. E Mr Speaker letan mon

ti a pe ekoute mon ti pe dir avek mo lekor ki eski pa i ler pou nou Lasanble pran en lot direksyon lo nou bann Mosyon.

Mr Speaker letan ou asize en zournen ou fer deba lo bann size ki tous lavi Seselwa, ou fini avek en deba avek bokou bann rezolisyon, sizesyon ki vreman pertinan. E sa manm piblik sa travayer ki pe ekout nou la deor ki'n ganny ankouraze mon kapab dir ou pou pran sa letan pou ekout nou, li osi i pe demann son lekor sa menm kekyon par lefe ki nou menm nou dan sa Lasanble koman Manm nou pe dir ki Mosyon pa *binding*.

So Mr Speaker mon pe propoze ki letan nou'n fini vote lo sa Mosyon ki nou ganny lasistans avek en *parliamentary reporter* pou nou *compile* tou sa bann propozisyon ki'n ganny met devan pou kapab annan en *feuille de route* Mr Speaker, pa pou met presyon lo Gouvernman ouswa fors lanmen sekter prive.

Me par lefe ki Gouvernman in fini angaz son lekor pou fer revizyon e nou konnen ki sa osi i afekte osi bann travayer dan sekter prive ki pe reve ki zot sityasyon osi i sanze par rapor avek *package* saler ki bann travayer etranze pe gannyen.

Mr Speaker petet lot kote taler ti annan en Manm petet pa'n tro konpran, letan in entervenir pou dir ki Mosyon pe *focus* lo saler, non, Mosyon pe *focus* lo *package*, enkli saler avek tou bann *allowance* ki vin avek.

Mr Speaker alor mon rekomandasyon mwan ozordi se ki setyenm Lasanble pa devret pe aret la lo sa Mosyon ki nou'n fini debat, nou reste trankil. E ki nou *compile* tou sa bann rekomandasyon vwar li en kour term, lo en mwayen term kwa ki posib lo en baz merit, pou kapab amelyor kondisyon pou bann frer e ser Seselwa profesyonnel, menm ki pa profesyonnel me ki annan leksperyans dan diferan sekter dan lasenn travay dan pei.

Mr Speaker Lasanble ti ratifye en Lagreman lo komers lib Kontinan Lafrik an Zilyet lannen pase. Mr Speaker letan mon'n fer mon bann resers e vwar osi bann progre ki pe ganny fer, sa lagreman ki Sesel in ratifye, i annan bokou benefis pou nenport profesyonnel Seselwa ki pe reve ki anvi pou li ariv pli lwen Mr Speaker.

Me kekyon ki demande, eski ozordi Seselwa nou bann zanfan lekol ki pe aspire dan lavenir, pou pran bann

pozisyon enportan, zot pe gannyen ouswa zot annan akse avek sa bann lenformasyon.

Akoz si nou pa veye, nou pou vwar plis etranze ki pou antre Sesel, ouswa pli komodite e servis sorti deor ki antre kot nou, kot nou menm nou Seselwa ki pe reve ki anvi, me si preparasyon entegral pa ganny fer nou pou mank sa sans Mr Speaker, nou pou mank sa sans.

E parmi bann rekomandasyon se ki ozordi i en *wake up call*. I en *wake up call* pou paran, paran ki donn nesans zanfan e bann zanfan ki dan laz konesans, ki konpran ki direksyon ki pei pe ale avek son devlopman.

Gouvernman koman fasilitater i bezwen met an plas bann kondisyon e bann eleman enportan ki pou kapab ed sa zanfan, ouswa bann travayer ki kapab al pli devan pou li kapab pran benefis avek sa bann loportinite.

Mr Speaker nou pe koz osi lo lekonomi. En ta loportinite. Nou pe koz lanvironnman, en ta loportinite. Nou pe koz sant finansyel Mr Speaker en ta loportinite pou nou bann zenn. Me selman si zot pa ganny byen prepare Mr Speaker nou pou vwar etranze ki pou antre pou pran sa bann benefis.

Mr Speaker de lot kote nou bezwen osi motiv e ankouraz sekter prive. Lasanble Nasyonal pa la pou fors lanmen sekter prive, Lasanble Nasyonal pa pe dir ki nou pa bezwen travayer etranze dan pei. Me Lasanble i anvi ankouraz sekter prive pou osi ankouraz bann zanfan pou kontinyen reve lekol, pou ankouraz e motiv sa travayer Seselwa ki dan lakonpanyen prive, pou zot kapab ganny valorize e ganny bann benefis ki zot merite.

Mosyon pe koz lo merit e Mosyon pe dir kot i posib. Mr Speaker mon anvi azoute osi ki Lasanble Nasyonal pou bezwen osi kapab, parey in ganny sizere par Onorab Lemiel ganny en kopi ouswa ganny en lavi sa lodit si i ganny fer, mon krwar poudir i pou enportan aköz i bezwen komans kot Egzekitif i bezwen annan en lodit.

E mon kontan ki Minis Francourt in deza koz lo la, me koze li menm, aksyon bezwen ganny swivre pou nou kapab vwar ki bor nou'n komanse, ki kote nou pe ale, pou fer sir ki i arive e ki sa Seselwa ki pe ekoute laba deor i vwar son rev ladan Mr Speaker.

E nou ava osi kapab propoze avek Gouvernman ankouraz li, kot nou santi poudir i annan serten keksoz

pet ki li Egzekitiv pa pe vwar, be ki nou koman Lasanble nou kapab met devan zot pou zot konsidere dan sa demars.

Mr Speaker mon kontan ki defen Mr Constance koni *comme* 'Mazaren' in ganny rekonnèt koman en lezann.

Mr Speaker i vremen gou, e mon krwar poudir sa msye i merit en meday donner. E la mon ti ava lans en lapel avek Komite ki pe travay lo sa legzersis pou pran sa konsiderasyon. E Mr Speaker parey Seselwa i dir me i ti a bon avek sa meday i vin *something - something* osi tou.

E la mon pa pe dir konmsi donn larzan mwan. Me solman i annan en tan keksoz ozordi si en dimoun in vremen donner e i annan merit ganny rekonnèt, sa meday tousel letan in met li anler Mr Speaker dan en fanmir i pa vremen, i ganny aksepte wi.

Me selman mon krwar poudir i annan serten keksoz par egzanp Zournen Nasyonal, kwa ki nou kapab fer, ouswa par egzanp mon pa konnen mwan, laz pansyon dan lavenir, si sa bann dimoun in vremen donner kot serten keksoz i ganny konsidere.

Mr Speaker sa an pasan, me mon anvi dir ankor enn fwa ki mon'n vremen apresye sa deba, sa deba in donn sans tou

kous sosyete pou kapab sezi sa moman la pou reflexir en pe direksyon transformasyon ki pei pe pran, loportinite ki pe vin dan laporte Sesel.

Me Gouvernman li tousel san partisipasyon tou Seselwa, tou zanfàn Seselwa Mr Speaker nou pa pou ariv lo sa nivo ki nou anvi. Alor avek sa 2 mo, mon ti a kontan demann tou bann Manm pou solider annou pran en vot dan lenterè pou valoriz sa travayer Seselwa. Mersi.

(APPLAUSE)

MR DEPUTY SPEAKER

Mersi Onorab pour ou rezimen. Avan ki nou pran vot lo Mosyon mon a zis relir pou *remind* piblik Mosyon prezante par Onorab Waven William ki nou ti pe diskite lo la, Mosyon i dir;

Swivan defayans, lenzistis e diferans dan *salary package* travayer etranze e Seselwa dan pei, Lasanble i demann Gouvernman pou koriz sa lenzistis dan en legzersis revizyon saler e osi pou ankouraz sekter prive pou zwenn sa legzersis.

Donk mon ti ava demann tou bann Manm ki an faver pou endike silvouple. Mersi. Okenn Manm ki kont? Mersi. Alor vot lo Mosyon ki mon fek lir i annan

23 Manm ki an faver, okenn Manm pa'n vot kont e okenn Manm pa'n abstenir, savedir Mosyon in pase.

E mon krwar dan son rezimen loter Mosyon in osi met en *challenge* ki mon ava dir pou *Standing Orders Committee* koman Chair, akoz ou'n demande ki fason Mosyon i ganny dil avek, nou a regard sa dan revizyon *Standing Orders* si nou kapab fer en keksoz, *how deep* ki mannyer nou *proceed from* Lasanble tou Egzekitiv.

Bon, mersi pou partisipasyon po sa semenn e nou ava *adjourn*. E nou ava rebran travay Lendi akoz i annan en sesyon spesyal Lendi apre midi 3er ki piblik ava ganny plis lenformasyon lo la pandan Nouvel, keksoz koumsa. Selman Lasanble pe zwenn Lendi 3er apre midi. Mersi.

(ADJOURNMENT)